

Wantok

Namba 540 — 6 Oktoba inap 13 Oktoba, 1984

25¢

Tambu Long Holim Gan

Bikpela tok save bilong Plis Fos i sut stret long ol pipel bilong Westen Hailans, Isten Hailans, Simbu, Enga na Morobe Provins namel long dispela wok.

Dispela tok save i tokaut long ol pipel husat i no gat laisens long lukautim ol gan i givim bek ol gan i go long Plis Stesin insait long hap bilong ol. Na de bilong givim ol gan i go long ol Plis Stesin bai stat long 20 Oktoba na pinis long 20 Desemba, 1984.

Nesenel Minista bilong Plis, Mista John Giheno i putim pablik notis long Nesenel Gaset na tok klia long dispela samting long 25 Septemba, 1984. Em i tok klia olsem ol pipel husat i no gat laisens long sotgan, raifol o pistol bilong ol bai no gat kot, sapos ol i givim bek ol dispela gan i go long

Plis namel long 20 Oktoba na 20 Desemba, 1984. Dispela tok klia i go long ol pipel insait long Westen Hailans, Isten Hailans, Simbu, Enga na Morobe Provins.

Ol pipel long Nesenel Kapital Distrik i kisim wankain askim tu long givim ol gan i no gat laisens long en i go long Plis. De bilong givim bek ol dispela gan i no gat laisens long en bai stat long 20 Oktoba, 1984.

Dispela taim namba long 20 Oktoba na 20 Desemba em i de bilong mari-

mari. Na Plis i no inap sasim ol manmeri husat i givim bek ol gan i no gat laisens long en. Na Plis Minista, Mista John Giheno wantaim Komisia bilong plis, Mista David Tasion i laikim ol pipel insait long Westen Hailans, Isten Hailans, Simbu, Enga, Morobe na Nesenel Kapital Distrik long bihainim dispela askim.

Bihain long dispela taim bilong marimari i pinis, bai plis i ken holim pasim na kalabusim ol manmeri husat i no givim bek ol gan i no gat laisens

1 go moa long pes 3

Ol Tari I Win

• Ol dispela yut bilong Tari long Saten Hailans i amamas long taim ol i bin opim nupela Kristen Komuniti Senta bilong ol las wik. Lukim stori long pes 22.



Provinsal ileksen

ILEKSEN bilong Sandaun na Madang Provinsal gavman bai stat long dispela mun.

Gavana jeneral bai sainim pepa bilong statim ileksen bilong Sandaun long Fraide Oktoba 19 na pepa bilong statim ikeksen long Madang long Mandé Oktoba 22.

Olgeta bikpela Pati i wok long redi long salim bik man bilong ol i go insait long dispela tupela provins long makim kendidet bilong ol.

Long Trinde long dispela wik Nesenel Kodineta bilong Melanesian Alaiens Pati, Mista Pedi Anis i flai i go long Vanimo long bungim lida bilong em Pater John Momis. Tupela i stat long redim Pati bilong ol traime ileksen bilong Wes Sepik na bai ol i go long Madang long mekim wan kain wok.

Ol narapela pati bai go aut long dispela tupela provins liklik taim bihain.

Long Wes Sepik ol lokal pipel i kirapim wanpela nupela grup ol kolim Sandaun Independen Grup. Dispela grup i laikim long ng ol long ok ol bin

sapotim Pangu long planti yia na Pangu i no mekim wanpela samting long helpim ol.

Deputi primia bilong Sandaun, Zachary Enda, i bin statim dispela grup tasol nau wanpela viles kaunsila, John Tiake, i kamap olsem siaman bilong grup.

Dispela grup i tok olgeta pipel bilong Lumi, Amanab, Telofomin na Vanimo i sapotim em long autim Pangu long provins. Sandaun Independen Grup i makim nem bilong 25 man bai resis olsem independen kendidet tasol ol sapotim Sandaun Independen Grup. Long Madang Primia Bato Bultin bai pinis long wok politik olsem na em i no inap ran insait long ileksen.

Namba tu bilong em, Galen. Lang i wok long raun yet long Australia tasol long taim em i kam bek em bai kempein strong long kamap primia.

Ol pipel bilong Wes Sepik bai stat vot long Novemba 24 i go inap Sarere Disemba 15. Ol long Madang bai stat long Sarere Disemba 1 na pinis long Disemba 22.

Insait

Pinisim olgeta Provinsal Gavman O? - pes 2

Plis laikim gan bilong yut? - pes 3

*Ausa long lo - pes 4
Husat bosim Yut? - pes 5
Pis bilong Nu Ailan - pes 5
Spot Nius: - soka, ruzbi, sofbal*


Traim Bun

Ragbi em i taim bilong ol pilala long soim strong na hevi bilong ol. Ragbi lig sisen i pinis nau long PNG.



DU
740
A2
W3
—
V.540

**NUT
CONUT
CONUT
COLATE**



Paradise

COOKIES

Redi long Ats Festival

Wok bilong redi long Saut Pasifik Ats Festival em bai kamap long Numia, Nu Kaledonia long Disemba i wok long go het yet tasol ol "Kanak" i plen long bagarapim dispela bung.

Projek Opisa bilong Nesenel Kalsa Kaunsil long Papua Niugini Mista Momoru Kini i tok lain bilong em i wok long redim yet dispela festival long wanem Mosbi i no save long

wanem samting i wok long kamap long Nu Kaledonia.

Mista Kini i tok, "Em i hat long mipela long painimaut sapos kros bilong ol Kanaka i bikpela o nogat. Bung bilong tok welkam long olgeta pipel husat i go long Ats festival ya bai kamap long Kalsa Senta bilong ol Kanak.

Long dispela taim yet Kalsa Kaunsil Opisi i wok long salim pas i go aut long wan wan atis na grup husat i gat nem pinis

long go long festival long Numia.

Opis bilong kalsa i askim tupela tieta kampani, Raun Raun na Nesenel Tieta Kampani long painim K5,000 ol yet. Na Raun Isi wantaim Dua Dua i mas kamap wantaim K3,000 wanwan. Kaunsil bai baim rot bilong Kisi Bambu Ben bilong Not Solomons na sampela man bilong mekim kaving dro na raitim stori. Long bungim olgeta wantaim Pa-

pua Niugini bai salim. 146 pipel.

Sampela opisa husat i go pinis long Numia long sekim wok long hap i askim wanwok bilong ol long Numia long givim bikpela spes long Papua Niugini long wanem Papua Niugini i gat planti samting long soim ol pipel long festival.

Mista Kini i tok lain bilong em long Nu Kaledonia i redi pinis, olgeta ples bilong slip na kaikai long taim bilong Papua Niugini.

Yabob Pipel Kisim Kompensesen

Nesenel na Madang Provinsal Gavman i bin kisim K120 tausen dinau-man long PNG Benking Kopresen na givim narapela K100 tausen long ol pipel bilong Yabob Viles long Madang, long ranim nupela Gauai bisnis kampani.

Tupela gavman i helpim ol Yabob pipel long bekim kompesesen bilong graun em Madang Taun i stap long en. Na wanpela helpim bai go long ol pipel bilong Bilbil, Kranget, na Biliau long graun bilong ol em Madang Taun i karamapim.

Minista bilong Industrial Developmen, Karl Stack i bin givim dispela pe bilong kompesesen long ol pipel bilong Yabob long Fraide Sepetmba 28.

Namba tu primia bilong Madang Provins, Galen Lang i bin stap wantaim Minista bilong em, John Gosiba Gik, husat i bosim wok fainans long provins.

Ol pipel bilong Yabob i bosim nau olupela supamaket bilong Jomba Treding, aninit long nupela nem, Gauai

Bisnis Kampani. Dispela supamaket i gat bikpela stua bilong salim kaikai, wanpela petrol stesin, wanpela haus kaikai na wanpela stua bilong salim ol strongpela dring.

Namba tu seketeri bilong Industrial Developmen, Anday Watson i bin go wantaim Minista Karl Stack long dispela bikpela de bilong ol Yabob pipel.

Em i tok, "Dispela nupela supamaket, gavman i helpim Madang Provinsal gavman long baim ol pipel bilong Yabob long graun bilong ol. Dispela em nupela samting tru long kamap long Madang provins.

"Rabaul Treding Kampani bai helpim ol pipel bilong Yabob long ranim supamaket bilong ol inap long taim ol pipel yet inap mekim dispela wok." Watson i tok.

Madang Provinsal Gavman i gat 50 pesen sia insait long Rabaul Treding Kampani. Dispela ol sia i bin Madang Developmen Kopresen, bisnis han bilong provinsal gavman.

Gauai Bisnis Kampani em nupela nem, makim ol pipel bilong Yabob viles grup. Ripot bilong 1980 sensus i soim olsem i gat 455 manmeri tasol

i stap long Yabob Viles grup.

Mista Watson i tok, "Gavman bilong Madang Provins i no inap givim bek graun bilong ol pipel i go long ol. Olsem na dispela rot bilong bekim long givim bikpela bisnis long ol asples em i nambba wan."

Dispela em i namba wan taim tru wanpela viles grup long Madang Provins i bin kisim helpim olsem i kam long Nesenel na provinsal gavman wantaim. Tasol toktok kros i kamap pinis egensim dispela kompesesen bilong graun.

Peter Yama, mausman bilong ol setelmen pipel long Madang i bringim namba wan tok kros egensim provinsal gavman. Em i tok, "Dispela kainpasin em bilong baim bot. Long wanem provinsal ileksen taim i kamap klostu nau na ol memba i mekim olsem bai ol pipel i votim ol gen long dispela yia."

Peter yama i wanpela bilong ol lain husat i resis long sanap long provinsal ileksen long pinis bilong dispela yia (Desemba).

Em i bilip namba tu primia, Galen Lang i kamapim dispela tingting long baim vot bilong ol pipel bilong Yabob.

Las Wina



• Mis Moide. Meri bilong Hawks pilaia, John Ben Moide i kisim winmami prais K5 i kam long Treni ripota Patrick Matbob bilong Divine Word Institute long Madang. Mis Moide i sapota bilong Tarangau long Mosbi.

Gavman bai askim pipel

Nesenel Gavman bai lusim samting olsem K3 milion long ranim wanpela referendum long painimaut tingting bilong pipel long provinsal gavman. Referendum em i wankain olsem ileksen tasol yu no inap votim wanpela man i go aut long opis. Ol pipel bai tokaut tasol long tingting bilong ol long sampela bikpela samting i wok long kamap long kantri.

Sampela Nesenel na Provinsal lida i no wanbel fong dispela tingting bilong nesenel gavman.

Primia bilong Morobe Provins, Mista Utula Samana, i sapotim tingting bilong Nesenel gavman. Tasol em i tok em bai gutpela moa sapos ol pipel inap autim tingting bilong ol long wok bilong olgeta kain gavman insait long kantri.

Lida bilong Melanesian Alaiens Pati, Pater John Momis na Primia bilong Milen Be, Lepani Watson, i gat wankain tingting liklik. Tupela i tok olsem sapos Nesenel gavman i skulim gut ol Pablik seven husat i wok aninit long provinsal gavman, bai wok i ran gut. Mista Watson i tok rong i no stap long ol provinsal politisen. Wok bilong ol politisen em bilong mekim lo na i mas gat gutpela saveman insait long pablik sevis bilong provins long karim aut dispela wok gut.

Primia bilong Simbu, Mathew Siune, i tok Nesenel Gavman bai westim planti

mani sapos ol i holim wanpela referendum. "Ol yet (gavman bilong Somare) i kamapim ol provinsal gavman sapos ol i laik rausim orait ol i mas rausim tasol. Bilong wanem na gavman i laik go bek long pipel na askim tingting bilong pipel?"

Mista Siune i askim, "Bilong wanem na ol i no laik givim pawa long mipela long kisim akaunten bilong mipela yet i kam long ovasis long was long mani em mipela i spenim."

Primia bilong Simbu i tok Provinsal gavman em i nupela samting.

"Olgeta man i save lainim samting sapos ol i mekim rong long namba wan taim. Nesenel gavman i mas tingting gut pastaim long em i rausim provinsal gavman long wanem ol pipel i pilim amamas bilong holim pawa pinis."

Oposisen lida Iambakey Okuk i tok em i sapotim tingting bilong holim referendum. Em i tok longbipo yet i kam inap nau em i no bin save laikim provinsal gavman long wanem i kos bikpela mani moa long ranim.

Nesenel Gavman i tok las wik olsem em bai askim ilektoral Komisen long redim olgeta samting bilong mekim dispela wok. Tasol long dispela wik ilektoral komisina i tok isi tasol olsem ol i no kisim yet wanpela tok i kam stret long Nesenel Gavman long dispela samting.



Hevi bilong Awasa

Wanpela waitman long Dipatmen bilong Praim Minista i save wok hat tru long rausim planti gutpela pablik seven insait long Opis bilong Yut, Rilijen, Spot na Wimens Afeas long wanem em yet i laik mekim dispela wok.

Minista bilong Yut, Spot, Relijen na Wimens Afeas, Mista Tom Awasa, i bin kros nogut tru taim em i autim stori bilong pasin bilong dispela man.

"Dispela man i brukim mi na Nesenel Yut Kaunsil. Em i brukim mi na Provinsal Yut Kaunsil. Na em i wok long kirapim belhat namel long mi na ol opisa insait long dipatmen bilong mi."

Mista Awasa i tok long dispela via tasol bikpela kros i kamap namel long Nesenel Yut Kaunsil na Siaman bilong Opis bilong Yut na namba tu bilong em. Displa man i bin ogenaisim tupela miting bilong Nesenel Yut Kaunsil pinis na em i no askim siaman o deputi siaman bilong kaunsil pastaim na bihain em i holim dispela miting.

Mista Awasa i mekim klia olsem tupelam i ting ya i bin brukim lo bilong Nesenel Yut Kaunsil na dispela man i no memba tu long NYC.

Mista Awasa i tok emi kirap nogut tu long sampela man husat i memba long Nesenel Yut Kaunsil. Minista bilong Yut em i las man long tok orait long husat man mas kamap memba bilong NYC. Tasol nau, Nesenel Minista i kirap nogut long lukim olsem NYC i gat sampela memba

husat em yet i nosave long ol.

Mista Awasa i mekim klia olsem wanem samting NYC i toktok long em em pipel nating.

Mista Awasa i tok dispela man i wok long traim long kamapim sampela hevi insait long Nesenel Spot Institut long Goroka. Em i no tok save long Mista Kamana o prinsipal bilong NSTI na em i go het long askim narapela opisa long mekim wanpela rivi long dispela institut.

Long taim deputi prinsipal bilong NSTI i lusim Goroka i go raun long Vanimo dispela waitman i grisim seketeri bilong dipatmen bilong praim minista na tupela i flaim deputi prinsipal i kam



Awasa

long Mosbi na tokim em long mekim dispela rivi.

I no long taim bai wanpela ripot long wok bilong Opis bilong Yut i kamaut. Taim ol opisa, em dispela man i makim, i wok long mekim wok painimaut ol i no bin go insait long opis bilong Mista Awasa na askim wanpela opis o minista yet.

Gavman i Givim Han

na helpim famili long K1,200

IS Sepik Provinsal Gavman i bin givim K1,200 long famili bilong tupela man husat i bin dai tupela mun i go pinis. Plis long Wewak i bin painim bodi bilong Pius Kraufa bilong Kreer Viles na Francis Kami husat i bin dai long Sande Ogas 19.

Primia bilong Is Sepik Provins, Jonathan Sengi i bin givim K600 long papa bilong Francis Kami na arapela K600 long mama bilong Pius Kraufa long las wik bihain long wanpela liklik kibung ol i holim long tupela daiman.

Primia Sengi tok, em i bin harim toktok bilong tupela daiman taim em i stap yet long kantri Swiselan. Tasol em i bilip olsem namba tu primia Leo Unumba na gavman bai lukautim wok bilong stapim moa trabel long kamap long taim em i lusim Is Sepik.

Em i promisim ol pipel olsem ol plis long Wewak i wok yet long painim aut moa long dispela birua na bai panisim gut husat man i mekim dispela rong. Em i tok olsem, plis i bin holim pasim planti man pinis, tasol i no bin sasim ol yet.

Mista Sengi i givim tok tenkyu i go long wantok bilong tupela daiman olsem ol i no bin kirapim trabel bihain long dai bilong Francis na Pius. Em i amamas olsem Is Sepik Industriyel na Agrikalsa So i kamap

gut tru na no gat moa birua i kamap.

Mista Herman Kabai i makim maus bilong ol famili bilong tupela daiman na tok olsem, sapos em i tokaut long ol lain bilong daiman long kirapim pait, bai dispela so i bagarap. Tasol em i wet isi na lukluk long ol plis long mekim wok bilong olsem trupela kristen man.

Kabai i tok, dispela mani bai helpim papamama bilong tupela daiman ya long mekim pasin tum-buna na wasim han bilong ol long tingting lus long pikinini bilong ol.

Papamama bilong tupela daiman ya i bin wasim han bilong ol long kem bilong Kabai las Sarere. Planti manmeri tru i bin kamap long lukim ol lain bilong tupela daiman ya i mekim las tok sori bilong ol long Francis na Pius.

I kam long pas


long en. Na ol dispela manmeri husat i asua bai gat bikpela sas na baim kot long K400. Sapos man o meri i no gat mani bilong baim kot, bai ol i kalabus inap long 4-pela mun.

Ol pipel insait long Westen Hailans, Isten Hailans, Simbu, Enga na Morobe Provins i no lukaut long dispela strongpela tambu bilong Plis Fos. Sapos ol i gat ol kain gan i no gat laisens long 20 Desemba, em ol i brukim lo. Na ol bai baim kot long narapela K600. Sapos no gat, ol bai kalabus inap long 6-pela mun.

Plis Minista, Giheno i mekim namba tu tok klia insait long Nesenel Gaset olsem bai gat strongpela tambu long ol manmeri i yusim o holim ol kain kain gan na katres. Dispela strongpela tambu i sut stret long ol pipel insait long Westen Hailans, Isten Hailans, Simbu, Enga na Morobe Provins.

Ignatius Kueri i givim tok orait long tupela aplikesen em Mista Henao bin mekim long larim Kepten Abner na tupela opisa bilong em long bung wantaim Difens Kaunsila Henao long Winjammer Motel bipo long ol i ken kamap long kot long Oktoba 4.

Ol gavman opisa husat i putim sas long Kepten Abner na sip bilong em, i tok, gat 28 man long dispela sip, 7-pela dok, na ol i karim samting olsem 40 ton pis long dispela sip.



Planti manki long Mosbi i wok long traim kain kain trik nau long yo-yo bihain long ol i lukim sempion yo-yo pilaia bilong Australia Steve Wilson i wok long soim ol trik bilong em.

Filipino kepten kamap long kot

Kepten bilong Filipino pis bot, Kepten Abner Arrojado i kamap long Wewak Distrik Kot long Fraide Septemba 26. Abner i gat tripela sas aninit long piseri ekt long kalapim lo na kam painim pis long solwara bilong PNG.

Namba wan sas: long Septemba 20, 1984 Kepten Abner Arrojado wantaim 27 boskru bilong sip "Celebes Tress" i bin raun long

solwara ausait tasol long Wuvulu Ailan. Ol i no gat laisens long painim pis kam insait long PNG.

Namba tu sas: Long Septemba 20, 1984 Kepten Abner i bin yusim bot bilong arapela kantri na i no gat laisens long painim pis long PNG, i bin kisim pis long solwara bilong PNG.

Namba tri sas: Long Septemba 20, 1984, Kepten Abner i kam insait long solwara bilong PNG long hap bilong Wuvulu Ailan long bot bilong painim

pis bilong arapela kantri. Ol i no bin pulim ol net na umben bilong painim pis na putim insait long bot taim ol bin kam insait long solwara bilong PNG.

Difens Kaunsil (man husat i sanap long helpim) bilong Kepten Abner Arrojado, Mista Ra'u Henao i tokim ko, ol i Kepten Abner i no gat long long olgeta tripela sas. Kepten Abner bai kamap gen long Wewak Distrik Kot long Oktoba 4, 1984.

Mejjstret husat i harim dispela kot,

Dispela tambu i no karamapim Nesenel Kapitot Distrik.

Mista Giheno i tokaut olsem i no gat wanpela gutpela as long putim kamap dispela kain tambu yet insait long Nesenel Kapital Distrik.

Na de bilong dispela strongpela tambu bilong Plis bai stat long 20 Oktoba, 1984.

Ol pipel insait long dispela 4-pela Hailans Provins wantaim Morobe Provins i mas givim gan bilong ol i go long Plis Stesin namel long 20 Oktoba na 20 Desemba, 1984. Maski ol dispela gan i gat laisens, em ol papa bilong gan i mas givim i go long Plis. Na Plis Stesin bai givimaut ol hap pepa (risit) i go long papa bilong gan.

Ol pipel insait long dispela grup i stap daunbilo i ken kisim aplikesen fom long Plis Stesin insait long eria bilong ol na salim aplikesen go long Komisina bilong Plis long kisim gan. Ol dispela grup, em:-

Plis ripot

Ol studen bilong Makana Vokesenel skul klostu long Mosbi i bin kisim taim long wanem ol stilman i bin brukim skul bilong ol na stilman wanpela redio kaset na ol klos. Ol stilman ya i bin kisim sampela arapela samting tu bilong skul. Plis ripot i tok olsem ol man ya i bin brukim waja na go insait long skul we ol i bin kisim ol samting ya.

Ol plisman long hap bilong Wabag long Enga Provins i wok long painimaut long wanpela trabel we wanpela meri klostu i kisim bikpela bagarap long het bilong em. Plis ripot i tok olsem tupela meri long ples Birip i wok long kros long wanpela sospen na wanpela bilong ol i kirap na katim narapela long het bilong em. Ol i kisim meri ya i go long haus sik we ol dokta i bin samapim het bilong em.

Ol plisman long Mosbi i bin tokaut long ol trabel i bin kamap long dispela wik Long BP Sevis Stesin long Boroko, ol stilman i bin patim wanpela man na stilman hanwas bilong em.

1. Ol Dokta bilong animol.

2. Abatua na lain pipel bilong kilim ol animol.

3. Ol Opisa bilong beng i lukautim wok bilong karim mani i go i kam.

4. Ol Namba Wan Distrik Opisa.

5. Ol lain pipel o kampani husat i gat laisens long salim o baim gan.

6. Ol memba tru bilong wanpela Gan, Raifol o Pistol Klap.

Insait long grup bilong ol "Namba Wan Distrik Opisa," dispela gan ol i kisim i mas kam long gavman na gan i mas i gat laisens i kam long Faia-Ams Rejistri. na ol dispela opisa i no inap karim gan, sapos Plis Minista i no givim tok orait long ol aninit long lo bilong Plis.

Komisina bilong Plis, Mista David Tasion i ken tok orait long wanpela man o meri i kisim laisens long lukautim gan, sapos em i bilip olsem dispela man o meri i gat gutpela as bilong holim gan.

Bengo Go Long Ingran

Provinsal Seketeri bilong Is Sepik, Paul Bengo i go daun pinis long Ingran. Em i lusim Papua Niugini long dispela wik tasol na bai em i kam

bek bihain long tripela mun. Paul Bengo bai stadi long Royal Institut Bilong Pablik Etnimistresen long Ingran.

Stat long Oktoba 1

inap 26. Mista Bengo bai mekim kos bilong menesmen na neseneri developem. Dispela kos em bilong ol hetman long pablik sevis na ol dairekta long ol pablik sospresen.



Bilip long husat?

Wok bilong ol yut insait long kantri em i wanpela bikpela samting. Na mobeta ol pipel husat i go pas long dispela wok i wok gut wantaim long het opis bilong ol i go inap long ol provinsal yut opis.

Nau long dispela taim we yumi harim toktok bilong ol yut i wok long kamapim kain kain trabel insait long kantri i mas i gat strongpela pos bilong pis bilong Yut. na ol bosman yet i mas klia long wok bilong ol na maski long pulim tok kros i go i kam namel long ol yet.

Dispela kain pasin bilong vot i gat bilip na vot i no gat bilip em i wanpela sik bilong ol politikman insait long PNG. na mobeta yumi larim ol i mekim dispela kain pasin na maski long bringim dispela kain vot i no gat bilip i go insait long wok bilong Nesenel Yut Kaunsil.

Dispela kain pasin em bilong resis tasol long pawa na planti taim wok tru bilong ol dispela lain bilong pundaun long wanem ol i gat bikpela laik moa long kamap bos na ol i no tingting long wok tru bilong ol.

WANTOK NIUSPEPA

Nius i kamap 52 taim long yia.

Opis bilong Edita na edvetaising long PNG

P.O. Box 1982, Boroko
Telepon: 252500 Teleks: NE 22213
Edvetaising - Ph: 252500

PE BILONG WANPELA YIA, 52 NIUSPEPA

Ples	Air	Surface
Port Moresby	K20	K20
PNG	K29	K29
Australia & Sol Islan	K60	K39
New Zealand & Pacific	K78	K46
America & Europe	K118	K60

Printed and published by Rowan Sidney Callick, of Winter street Granville, at Allotment 2, Section 209, Hohola.

Vogae Pasim Kopresen

Wes Nu Britain Provinsal Eksekutiv Kaunsil i pasim daun wok bilong Glosa Developmen Kopresen insait long Kelenge-Lolo eria bilong Wes Nu Briten Provins long las wik.

Primia bilong Wes Nu Briten Provins, Mista Bernard Vogae i kibung wantaim Provinsal Eksekutiv Kaunsil bilong em long tripela wik bipo na i pasim tok long pasim daun wok bilong Glosa Developmen Kopresen. Long wanem ol i kisim wanpela ripot i kam long Provinsal Fainans Inspekta olsem K1,000 i bin lus insait long wok, bisnis bilong dispela kopresen.

Glosa Developmen Kopresen em i bisnia han bilong Wes Nu Briten Provinsal gavman. Na Kopresen i bin kisim K20,000 helpim mani i kam long Provinsal long ranim wok bisnis bilong en na

givim sevis i go long ol pipel bilong Kep Glosa Distrik.

Primia Vogae i tokaut long dispela wik Mande olsem Provinsal Eksekutiv Kaunsil i laik makim ol nupela dairekta na wanpela menasa bilong tekova na lukautim wok bilong Kopresen.

Siaman bilong Glosa developmen Kopresen, Mista Theodore Gamau i tokaut long dispela wik Mande olsem Provinsal Eksekutiv Kaunsil i asua tru long oraitim ol wokman bilong Kep Hollman long lukautim wok bilong Glosa kopresen. Long wanem bisnis bilong Glosa kopresen i narakain olgeta long Kep Hollman Kopresen husat i wok aninit long provinsal gavman.

Em i tokaut tu olsem Bot Ov Dairektas bilong Glosa Developmen Kopresen tasol i gat pawa bilong pasin daun bisnis, sapos ol i painimaut olsem wok bisnis i no go het gut.

Bikpela Wari Bilong

Yumi?

Stat yet long taim Papua Niugini i kisim independens i kam inap nau planti man husat i bin sanap long ai bilong Nesenel Kot i save go long kalabus.

Long 1981-82 Nesenel Kot i bin kalabusim 81 long olgeta 100 man husat i kot. Tasol namel long 1982 na 83 planti man bilong go long Nesenel Kot i no kamap long ples bilong kot. Nesenel kot i bin kalabusim hap namba tasol bilong ol man i kot na narapela hap i wetim taim bilong kot yet.

Insait long Mosbi 103 man i wok long wetim taim bilong ol long go kot. Tasol 82 man i bin bikhet na hait olgeta long ai bilong plis. No gat man i painim ol dispela hait man yet. Sampela taim long taim plis i sasim wanpela man ol plis i save larim dispela man i go bek long haus bilong em na wetim taim bilong kot. Long olgeta 100 man em plis i bin mekim olsem long ol 5-pela

tasol i bin go bek na kamap long kot. Olgeta narapela i go hait olgeta.

Ol jas na mejistret i bin givim moa long 15,000 waren pepa long plis long holimpas ol dispela trabelman. Plis i traimit hat tru tasol ol i no inap painim ol man ya moa. Olsem na sapos yu go long wanpela plis stesin nau yu inap lukim ol dispela waren pepa i slip nabaut long plua long wanem dispela kain pepa i pulap tru. Insait long wanpela plis stesin long bus, dispela pepa i bin bekim planti pipia long opis olsem na ol plisman i bungim sampela na kukim ol pinis.

LOKALISESEN

I luk olsem gavman i bin hariap tumas na putim ol Papua Niugini pipel yet i go kisim ples bilong ol man bilong ovasis insait long Pablik Prosekuta Opis na Pablik Solisita opis.

Insait long wok bilong lo wanpela loya i mas wok aninit long

PROBESEN

Long 1976 Nesenel Eksekutiv Kaunsil i bin givim tok orait i go long ministra bilong Jastis long kirapim probesen sevis, (larim rong man i go fri tasol em i no ken bikhet gen taim em i stap ausait long kalabus).

Dispela sevis i no bin kirap yet long taim mipela statim dispela painimaut long mun Januari 1984. Goroka tasol i bin gat dispela kain sevis tasol ol volantia i save ranim dispela wok.

Mipela i kirap nogut tru long dispela. Probeesen sevis em i no kos bikpela mani tumas long ranim, na tu em i no hat long ranim dispela kain wok. Yu ken senisim we bilong ranim dispela sevis sapos yu ting narapela we i no stret. Tasol Papua Niugini i no laikim dispela kain samting. Olsem na ol i isi isi tru long kirapim wanpela.

Sapos yu no inap bilip olsem Papua Niugini i no laikim probesen sistem yu bai no inap bilip yet sapos yu harim olsem Papua Niugini i mekim wankain long Komyuniti Wok Oda. Komyuniti Wok Oda em wanpela pasin bilong mekim wanpela rong man i wok long ples bilong yu yet. Sapos rong man i mekim wok gut em i no inap go long haus kalabus.


Tasol Papua Niugini i bin gat wanpela lo bilong Komyuniti Wok Oda stat yet long 1978! Gavman i no bin mekim wanpela samting long traimit dispela wok.

WOK BILONG PLIS

Mipela ting olsem sapos gavman i laikmi plis long mekim wok bilong en gut ol i mas givim stret wok em ol plisman tasol i tren long mekim. Nau ol plisman i mekim wok na tu ol i mekim wok em ol narapela man (i no plisman) i ken mekim. Mipela tingim ol kain wok olsem prosekusen (komiti man) VIP sekuriti, na ol arapela wok em ol sivilien manmeri i ken mekim, olsem kuskus, bosim mani na pablik rilesen. Wok bai kamap isi long ol plisman sapos dispela ol wok em mipela kolim pinis i senis na go long han bilong ol sivilien long mekim insait long plis Fos.

PLES NATING

Papua Niugini mas muv nau long traimit long stretim pasin bilong trabelman. Ol i no ken tingting tasol long kalabusim man long wanem pasin bilong man i no save senis sapos kalabus i strong tumas. Long taim jas o mejistret i painim olsem wanpela man i mekim rong em i mas tingting pastaim long komyuniti bilong dispela trabelman na bihain makim wanem kain kalabus long givim em.



●Ol trabelman i brukim haus bilong dispela meri na famili bilong em.

narapela man, husat i bin stap long taim long dispela wok, na kisim planti ekspiriens pastaim. Tasol long Papua Niugini wantu ol i save litimapim ol yangpela loya i go antap. Insait long tupela opis nau man husat i wok longpela taim tru i wok 6 yia tasol.

Kot i no inap kalabusim man kwik sapos dispela man i tokim kot olsem em i no mekim rong. Dispela nupela minimum penalti lo i mekim na planti man i save traimit long haitim rong bilong ol. Dispela i skruim taim bilong kot i go longpela.

DISTRIK KOT

Ol distrik kot i mekim wok bilong ol gut tru na i luk olsem wok bilong ol bai kamap gut moa bihain. Ol mejistret husat i mekim stret wok bilong ol em ol level 4 na 5 mejistret. Distrik kot em wanpela gutpela samting tru insait long jastis sistem, tasol Papua Niugini i no yusim ol gut. Sori tru.

VILES KOT

I luk olsem viles kot i wok long mekim gutpela wok long lukautim lo na oda insait long Papua Niugini. Viles kot i save helpim daunim kros bilong ol pipel na panisim kwik ol man husat i mekim liklik rong.

PLIS INSAIT LONG BAREKS

I luk olsem ol pipel i laikim ol plis. Tasol ol plis i save ranawe long ol pipel gen. Long taun ol plis i save stap ol yet long wanpela hap. I no olsem long ol aut stesin we yumi i ken lukim ol plisman bilong klap i stap klostu wantaim ol pipel.

Papua Niugini i toktok planti long yusim ol pipel yet (komyuniti) long lukautim lo na oda insait long eria bilong ol. Tasol dispela i min olsem pablik i mas harim olgeta tok bilong bikman. Sapos plis i laikim ol pipel long bringim wanem trabelman i wok long hait

namel long ol i go long plis ol i mas mekim. Sapos no gat, bai ol plis i sutim tok i go long komyuniti.

Olsem na yumi ken tok olsem pasin raskol em wanpela bisnis i save mekim gutpela profit. Ol man i ranim dispela bisnis i no save pret long lusim dispela bisnis long wanem nogat man bai painim ol.

Dispela bikpela hevi long lo na oda, i wok long painim dispela kantri, i no inap slek sapos ol plisman i kisim wankain trening olsem ol i wok long kisim nau. Bikhet pasin bai stap yet lng kantri i go inap taim we ol plisman i lain gut pinis long pasin bilong painimaut ol rong.

Planti plisman husat i wok insait long divisen bilong painimaut hait rong i no bin kisim trening insait long dispela kain wok. Olsem na plis i save wet tasol long trabelman yet i tokaut olsem em i bin mekim dispela rong. Long taim trabelman i tokaut pinis long asua bilong em ol plisman i save go het na makim taim bilong dispela man long kot. Ol plisman yet i no gat sampela save long pasin bilong bihainim wanpela trabelman husat i mekim dispela. Long Papua Niugini tu i no gat wanpela samting em ol i kolim forensik sevis. Dispela kain sevis i save helpim ol plisman ilong narapela kantri long ringim trabelman i go long ples klap.

Sapos yu raun long planti ples insait long Papua Niugini yu ken lukim olsem ol pipel i no laikim tru ol plisman. Sapos yu traimit long painimaut bilong wanem ol pipel i belhat long plis bai yu harim olsem sampela taim bipo ol plisman i bin kalapim pawa bilong ol na mekim pasin nogut long ol pipel. Sampela plisman i save bikhet long pablik ples.

Ol trabelman i ken mekim wanpela liklik trik tasol olsem ol i wok long mekim nau na ranawe. Ol trabelman i save senisim kwik nem bilong ol na hait isi

tasol. Wanpela man i bin mekim planti rong tru na plis i bin wok long painim em long planti mun. Ol i mekim i go na wanpela taim plis i holim em na putim em i go insait long sel na wetim kot. Tasol plis i putim wanpela spakman i go insait long sel wantaim dispela man. Long taim plis i go long rausim spakman i go ausait ol i kolim nem bilong spakman tasol trabelman i ansa na plis i larim disela trabelman i go aut.

Plis i kisim dispela man i go na kotim em long dring long pablik ples. Kot i sasim dispela man long baim rong bilong dring na taim dispela mani baim kot pinis ol larim em i go fri. Tasol man husat i bin dring tru i no bin go long kot. Narapela man nogut i kisim ples bilong em.

Yu no inap painim rekot bilong ol trabelman stat long 1968 i kam inap 1982. Plis i bungim olgeta pepa na mekim planti mekpas na larim ol long flua. Sampela rekot i lus pinis.

Insait long Papua Niugini plisman i no save stap long taim long wanpela eria o wanpela kain wok bai ol i ken kisim moa ekspiriens long wanpela kain wok tasol.

Ol "nupela" plisman bilong mekim wok painimaut i save sasim kwik wanpela man sapos sampela lain i go ripot long plis. Planti man i save pinis olsem sapos yu go kwik long plis stesin na birua bilong yu i go bihain, plis bai helpim yu gut. Insait long wanpela trabel we tupela man i pait man husat i go pas long plis stesin em man husat i kisim nogut. Na man i go bihain em i "trabelman."

RAUSIM BAREK

Olsem na gavman i no ken rausim tasol, plis barek, skwat ka, plis stesin na sampela samting bilong plis em wok i bringim ol i go long tru long laip bilong pipel. Nau em i

go moa long pes 14

Mi Bos Yet - Rev Tauta Gauga

Siaman bilong Nenesel Yut Kaunsil, Revren Tauta Gauga i tokaut olsem Yut Divisen i no inap tru go aninit long Dipatmen Bilong Praim Minista.

"Sapos Dipatmen Bilong Praim Minista i laik kisim na lukautim wok bilong Yut Divisen long kantri, Praim Minista Michael Somare i mas senisim gen wok bilong ol minista bilong em bikos, nau yet, Yut Divisen i stap aninit long Mista Tom Awasa."

Siaman bilong Nenesel Yut Kaunsil (NYC) i mekim dispela tok bihain long planti toktok i kamap olsem Praim Minista yet bai lukautim Yut Divisen, nau i stap aninit long Minista Awasa.

Revren Gauga i kros tru long sampela lain memba bilong NYC husat i bin holim wanpela kibung bilong yut long Ogas 31 inap Septemba 6 long Wape-

namanda - Enga Provins.

Em i tok, "Dispela kibung i no bihain mamalo bilong kantri bikos mi olsem siaman i no stap long dispela taim. Namba tu siaman, Salatial Tangap tu i no stap.

Long dispela kibung, ol wanwan memba bilong NYC husat i makim Peter Milikan olsem ekting siaman, i kamapim wanpela toktok long bringim Yut Divisen

nau i stap wantaim Minista Tom Awasa, i go aninit long Dipatmen bilong Praim Minista.


Siaman Revren Gauga i no laikim dispela. "Mi bos yet olsem lo bilong NYC i tok, na mi no yesa long dispela tingting. Dispela ol memba bilong NYC husat i bin kamapim dispela toktok i no kisim tok orait long mi."

Nenesel gavman i bin spenim nating

K10 tausen long dispela Wapenamanda kibung. Tasol Yut Divisen i askim gavman long narapela K10 tausen long holim trupela kibung bilong ol long Novemba.

Revren Tauta Gauga bai bungim Praim Minista Michael Somare long Fraide Oktoba 5 na toktok long wari bilong Yut Divisen.

Wanpela kibung bilong yut i kamap nau long Mosbi, we ol memba bilong yut opis long Saten Rijnon i kamap long autim wari bilong ol. Wanpela bikpela toktok bilong ol nau em long Yut Divisen.



• Wanpela tisa bilong ol aipas man long Goroku skul bilong aipas i soim ol pipel long Goroka - ol pasin na kain stail wokabaut bilong ol aipasman. Piksa Maureen Mopio.

Nu Ailan atun i go ovasis

Okinawa Fishing kampani long Nu Ailan i binsalim pis ol i painim long ol solwara bilong dispela provins i go long Fiji long 14, Septemba. Hevi bilong pis em i 743, 18 metrik ton na em inap long mak bilong K487,233. (4 handet 87 tausen 233 kina).

Namba tu raun gen em kampani bai salim em long dispela wik Fraide, 5, Oktoba. Dispela taim mak bilong pis inap long 160 metrik ton. Kodineta bilong Okinawa Fishing projek na Nu Ailan Provinsal Gavman Mista Paul Apini i tok olsem bikpela sip bilong karim dispela kago pis i go long Fiji i kamap pinis long Nu Ailan.

Dispela sip kam long Japan bai kisim pis atun ya long mama sip bilong painim pis atun, em "Seabird." Na bai karim i go long Fiji

we i gat pis fektori bilong dispela kampani i stap pinis long en bipo yet.

Dispela em i 3-pela wik bihain tasol long kampani i stat long painim atun long solwara bilong Nu Ailan. Ol i stat long painim pis long 20, Ogas tupela wik bihain long Minista bilong Praimeri Industri Dennis Young i bin sainim tok orait long 1, Ogas.

Okinawa fishing kampani i bin baim laisens, long PNG gavman long K6,000 (6 tausen kina).

Nenesel Gavman i no gat (Ekueti) rait o

skel bilong em i stap long dispela projek bilong Okinawa. Na gvaman i no inap long kisim win mani. Tasol bai ol i kisim takis tasol long kampani ya.

Wanpela tokman Kaundi Fishery hetkota long Mosbi i tokim Wantok olsem,

dispela em i wanpela praivet projek. Na wokmani bilong dispela projek, em bikpela skel bai i go long Nu Ailan provinsal gavman na ol liklik pipel bilong asples. Tasol Nenesel Gavman i no gat ekueti (skel) long en.

Pauline Laki

Earn Up To U.S. \$400 PER WEEK

Taking Snapshots in your area Part or Full-time

No experience or selling required

WRITE TO:
IFW PROMOTIONS,
P.O. Box 3222
BOKORO,
Papua New Guinea

Sainim pas i egensim NPF

Madang Wokman Yunion i no amamas long bekim i kam long opis bilong Nenesel Providen Providen Fan, na long Dairekta, Ezekiel Brown. Olsem na ol mausman bilong wan wan kampani insait long Madang taun bai kibung long Fraide, Oktoba 5 long sainim wanpela strongpela pas i toktok egensim wok bilong NPF na Dairekta Ezekiel Brown.

Dispela pas bai go long Opis Bilong Praim Minista long Mosbi. Narapela ol wankain pas tasol bai go tu long Minista Bilong Fainans, Seketeri Bilong Fainans na Minista Bilong Leba long nenesel gavman.

Mista Edward Korame, Jeneral Seketeri bilong Madang Yunion bilong ol wokman i tok, "Mi givim toktok bilong planti handet manmeri long Madang. Ating dispela tingting i wankain long ol arapela wokman insait long kantri.

"Olsem wanem tru na nenesel gavman i holim ol wokman bilong NPF na Dairekta, Ezekiel Brown i stap yet, bihain long Odita Jeneral i painim planti asua insait long wok ol i mekim stat long 1983 i kam inap nau?"

"Odita Jeneral i painimaut olsem Dairekta Ezekiel Brown i bin yusim K4,615 bilong nenesel gavman long raun long ovasis kantri. Mipela bilip Ezekiel Brown i no bekim yet olgeta dispela mani bilong gavman na mipela i askim em long bekim hariap." Edward Korame i tok.

Ol wokman long Madang i laik save tu long wanem taim tru bai ol i kisim hap pepa i tokim ol long invesmen bilong ol long NPF.

Mista Korame i tok, "Stat long Julai 1982, Ezekiel Brown i tokim ol wokman olsem em bai redim dispela pepa bilong tok save long tupela o tripela mun bihain. Mipela i no lukim yet dispela pepa. Long Janueri 1984 Brown i bin mekim wankain tok tasol. Planti mun i go pinis na mipela i wetim yet dispela hap pepa.

"Mipela bai sainim dispela pas long wanem, olgeta wokman long Madang i no gat bilip long wok bilong ol wokman long NPF."

Dispela pas bilong ol Madang Wokman Yunioni gat 4-pela strongpela tingting bilong ol wokman long en.

* Ol wokman laik stapim mani bilong ol i go long NPF, inap long taim ol NPF wokman yet i baim olgeta dinau mani em Odita Jeneral i tok ol i bin kisim long NPF. Na tu, bihain long ol wokman i kisim pepa i tokim ol long mani bilong ol long NPF invesmen.

* Dairekta Ezekiel Brown i mas givim K100 long olgeta fotnait i go long NPF inap em i bekim olgeta dinau bilong em. Bihain, Gavman i mas pinisim em long wok Dairekta long NPF.

* Rausim ol rijonal NPF opisa na putim ol NPF opisa long wan wan provins bai ol i ken mekim gut wok long ol provins.

* Planti manmeri husat i bin lusim wok long ol kampani, stat long 1981 i kam inap nau, i wetim yet bekim bilong mani bilong ol long NPF opis. Ol dispela manmeri i laikim mani bilong ol hariap. Sapos NPF i slek long givim mani bilong ol hariap, gavman i mas rausim Dairekta bilong NPF, na ol wokman bilong em na putim nupela lain.



ROYAL PAPUA NIUGINI KONSTABULARI

BIKPELA TAMBU LONG OL SOTGAN NA KATRES

WESTEN HAILANS ISTEN HAILANS SIMBU ENGA MOROBE

Bai gat BIKPELA TAMBU long lukautim o holim pasim ol kain sotgan bihain long 20 Oktoba, 1984. Sapos yu stap insait long ol provins i gat nem antap hia na yu gat laisens long lukautim pistol, raifol o sotgan, yu mas klia nau olsem bai gat strongpela tambu long holim pasim ol dispela samting namel long 20 Oktoba, 1984 i go inap long bihaintaim.

Yu mas givim gan na katres bilong en i go long plis stesin bihain long 20 de bilong Oktoba.

Las de bilong givim gan na katres i go long Plis Stesin em i 20 Desemba, 1984.

Sapos yu abrusim dispela las de na holim pasin gan yet, yu brukim lo na inap baim kot long K600. Sapos no gat, bai yu kalabus inap long 6-pela mun.

Ol manmeri insait long dispela grup i stap daunbilo i ken salim aplikesen i go long rejistra long holim na lukautim gan:

Ol dokta bilong enimol
Abatua na lain pipel bilong kilim ol enimol
Ol beng opisa bilong lukautim wok bilong karim inani
Ol namba an die trik opisa
Ol memba bilong gan, raifol o pistol klap
Ol lain pipel bilong baim na salim gan

Rot bilong larim ol dispela grup i yusim gan i no inap kamap hariap. Ol i MAS putim aplikesen insait long wanpela opisal fom i stap long ol plis stesin long 20 Oktoba, 1984 o sampela taim bihain long dispela de.

Sapos yu no stap insait long ol dispela grup na yu bilip olsem yu gat gutpela as long lukautim gan, yu ken aplai long kisim gan.

Tasol yu mas lukaut!!

Sapos plis i painimaut olsem yu holim pasim wanpela gan na katres bihain long 20 Desemba, 1984, em bai plis i holim pasim yu na kotim yu.

DISPELA TO SAVE I KAM LONG: D. TASON KOMISINA BILONG PLIS

Daunim Gutnem

Dia Edita — Mi wanpela manki bilong Not Waghi na mi laik bekim pas bilong Gabriel Pengie. Pas bilong em i kamap long Wantok Niuspepa namba 526.

Brata Pangie, yu bin skul bipo o nogat? yu tok yu stap long Bulolo. Na yu stap na mekim wanem samting long dispela hap.

Nau yumi save olsem pawa bilong skelim mani i stap long Provinsal Gavman. Na ol provinsal memba i save holim mani na skelim.

Brata, Pengie, mi laikim yu askim olpela provinsal memba bilong Fainans long dispela samting. Em i memba bilong Not Waghi insait long Western Hailans Provinsal Gavman. Em i ken kliaim tingting bilong yu long dispela askim.

Long taim bilong skelim mani, em i skelim hamas mani i go long kirapim ol liklik rot na bris long sait bilong Not Waghi?

Nesenel Palamen memba bilong Not Waghi insait long Western Hailans Provinsal Gavman. Em i ken kliaim tingting bilong yu long dispela skim.

Long taim bilong skelim mani, em i skelim hamas mani i go long kirapim ol liklik rot na bris long sait bilong Not Waghi?

Nesenel Palamen memba bilong Not Waghi, Mista William Wi i no save long dispela mani. Ating yu gat kros long em long narapela samting na yu raitim dispela pas bilong yu.

Mista Wi i save long hamas mani em Nesenel Gavman i save salim i kam long Hagen long wan wan yia na em i no kliia long wanem hap dispela mani i go long en. Em i wok bilong ol provinsal memba long

holim na skelim dispela mani.

Ating yu yet i laikim Mista Wi i kisim savol na klinim olgeta hap rot bilong Not Waghi o olsem wanem? Yu mas tingting gut na raitim pas i go long Provinsal Gavman long Maun Hagen na askim ol. Na yu no ken bagarapim gutpela nem bilong Nesenel Palamen memba bilong Not Waghi nating. Em i gat gutpela nem long palamen.

Long pinis toktok bilong mi, mi laik tok olsem Mista William Wi em i top memba bilong yumi long Not Waghi.

Paul Tumbo Kunumb, Wapenamanda, Enga Provins.



Tupela kain takis

Dia Edita — Mi sutim stret tok bilong mi go long Provinsal Gavman bilong Isten Hailans na lokal gavman insait long Isten Hailans provins. Tupela ples mi laik toktok long ol insait long dispela pas em Luta na Goroka.

Mipela man bilong ples i save baim planti samting long stua na supa maket na long bakstua. Mipela save lusim planti mani long ol dispela stua. Orait gavman i save pulim gen 3% ritel takis i kam long ol dispela stua.

Na long taim mipela i go bek gen long ples kaunsil i save kam raun na kolektim takis long ol pipel. Dispela pasin i no stret long ai bilong mi. Em i min olsem mipela i save baim tupela kain takis, ritel takis, wantaim takis bilong lokal gavman kaunsil. Mi ting em bai gutpela long ai bilong pipel sapos mipela i baim wanpela takis tasol na i no tupela olsem yupela pusim

mipela long mekim nau.

Em givim piks long yupela. Long Luta mipela i save baim kaunsil takis. Sapos mipela i go long Goroka taun na baim samting long stua, em nau stua i tekewe hap mani bilong mipela long ritel takis.

Anthony Agyfaro Bavovo, Nupuru Viles, EHP



Tok Save

Wantok Buk Klap i bin kisim wanpela sek i kam long Rose Mitil tasol mipela i no inap long salim buk i kam long yu Rose long wanem yu no bin putim adres bilong yu long pas. Olsem na mipela i holim yet dispela buk bilong yu i stap. Long taim yu lukim dispela tok save bilong yu orait salim adres bilong yu i kam hariap na bai buk bilong yu i kamap long yu.

Ol arapela rida husat i no kliia long Wantok Buk Klap orait lukluk tasol long pes 11 na bai yu lukim ol buk yu ken baim sapos yu kamap memba bilong dispela buk klap. — EDITA

Mi sem nogut tru?

Dia Edita — Mi laik pinisim wari bilong mi. Sampela bilong yumi i no save wok na yumi save stap nating long taun inap tu o tri yia. Tasol kandere o papa bilong yumi i save mekim gut long yumi.

Sapos yumi laik go limlimbur long wanpela hap long ol lain bilong yumi i save baim balus o sip na larim yumi go. Mi ting dispela pasin i stret. Tasol mi save lukim tu olsem taim yumi man bilong taun i go malolo long ples yumi no save stap longtaim long ples. Yumi save stap wan otu mun tasol na kam bek gen long taun. Long taim yumi kamap bek long taun ol i westim moa mani gen long yumi.

Yes ol brata, sapos yu wok long wanpela

kampani na bos bilong yu i givim yu mallo yu mas limlimbur i go long ples o narapela taun. Na long taim yu pinisim malolo bilong yu yu ken go bek long wok bilong yu.

Mi save belhat long ol man husat i westim mani bilong papamama long baim skul na long taim ol i pinisim skul ol i go bek na stap nating long ples. Sapos yu gat hap liklik pepa bilong yu long painim wok yu mas kam bek long taun.

Em i no gutpela long brata o papa na mama i westim bikpela mani long yu na yu go antap olgeta long ples. Mi save sem tru long ol man husat i mekim dispela pasin.

Na-Ako Poa, Kem Naen, Arawa.

Tok bilas long

grasrut

Dia Edita — Mi laik bekim pas bilong J.T. Andy. Em i tok olsem ol manmeri bilong Simbu na Wabag i save sindaun na meknais long nait i go inap long 3 klok moning. Em i laikim ol plisman i mas holim ol dispela manmeri na i go putim ol long haus kalabus.

Brata, mi tokim yu, ating yu wanpela nupela man long Papua Niugini. Yu kam long Australia o wanem hap tru? Na yu lukim ol dispela manmeri bilong Simbu o Wabag i sindaun na slip nabaut long wanem hap? I gat nem bilong Simbu na Wabag long PNG. Na yu no ken tok olsem long wanlain bilong yumitupela.

No ken tok bilas long ol dispela grasrut lain bilong Simbu na Wabag. Watpo na yu no laik go klostu long ol na tok save long ol? Yu wanpela wantok stret na yu kirap na bagarapim nem bilong ol manmeri bilong Simbu na Wabag.

Ol dispela grasrut pipel i ken luksave long yu. Tasol long hait na raitim pas i go long Wantok Niuspepa. Na ol i no save long yu wanem kain man i tok "rabisman" long ol.

Mino Kopata, Ok Tedi Maining Ltd, Boroko.

Gris bilong vot

Dia Edita — Mi gat liklik wari long pasin i save kamap long olgeta hap bilong Papua Niugini. Mi save lukim ol man husat i laik kamap memba bilong provins i grisim tumas ol pipel long votim ol. Sampela kendidet i save tok, "Yupela votim mi bai mi kisim ka o wokim haus bilong yupela. Tarangu, ol manmeri i save ting tru na ol i save votim kwik ol lain man ya. Bihain nau nogat kaikai i kamap. Wanpela bilong ol dispela kain memba em Paul Kamod bilong ples Rivo long Madang. Mi no save harim em

long redio o niuspepa. Ating em i go wail pinis.

Ating ol man i votim yu long stap tasol long han bilong yu o olsem wanem? Traim na kain hevi bilong ol pipel bilong yu i go long miting. Yu mas traime long stretim wanem kain wari o hevi em ol pipel bilong yu i gat. Ol pipel i votim yu long go na mekim dispela wok. Mi sori long wanem

sampela manmeri i bin bot nating. Yupela ol memba i asua long dispela pasin.

Tarangau sampela manmeri i bin votim yupela nating na ol i wet, wet, i go na no gat wanpela kaikai i kamap. Sampela lapun i bin wet na sik i pinisim ol long namel. S.Charlie Kerong, J.M.P. Madang.

Go bek na tok save

Dia Edita — Mi laik autim liklik tingting bilong mi long bekim pas bilong wanpela man, nem bilong em Kenny Kombuli. Pas bilong em i bin kamap long Wantok Niuspepa namba 529-21 Julai inap 28 Julai 1984. Kenny Kombuli i bilong sampela hap long Maprik long Is Sepik Provins tasol nau em i stap long Kimbe long Wes Nu Briten Provins.

Brata Kenny, long pas bilong yu, yu bin tok olsem yu gat bel hevi long ol kaunsil long Maprik long wanem ol i save kisim mani long ol manki i 18 o 19 krismas. Brata mi laik askim yu olsem; bilong wanem na yu bel hevi? Brata yu tok tu olsem ol marit man tasol mas baim takis i go long kaunsil.

Dispela toktok bilong yu em olsem toktok bilong wanpela pikinini. Kenny yu mas kliia olsem sapos ol man na meri i gat 18 o 19 krismas na sapos ol i bin stap insait long eria bilong wanpela kaunsil o siti o taun inap 6-pela mun o moa ol i mas baim kaunsil takis.

Ol pipel i gat 18 o 19 krismas em ol i no manki moa olsem yu bin tok. Mi ting olsem Greta Maprik Kaunsil i no rong long kisim mani long ol pipel husat i gat 18 o 19 krismas. Kenny, narapela taim sapos yu laik rait i go long Wantok yu mas tingting gut pastaim. Yu mas ritim gut pas bilong yu yet gen long sampela taim pas bilong yu olgeta bai no gat mining. Mi no save watpo tru na Edita i larim dispela pas i go insait long pepa.

Kenny yu no tokaut long mipela ol rida bilong Wantok Niuspepa long wanem as trua na yu bel hevi long Maprik Kaunsil long taim ol kisim takis mani long ol pipel i gat 18 o 19 krismas.

Mi laik askim yu wanpela kwesten, Kenny. Nau yu wok long stap long Kimbe tasol yu save baim takis i go long Kimbe taun kaunsil tu o nogat? Nogut yu wok long hait hait na raun long Kimbe.

Yu bin askim long Maprik taun kaunsil i save putim mani bilong ol long we na ol i no

wokim o putim kolta long Wewak Maprik rot. Yes Kenny, watpo na yu no laik lusim Kimbe na go stap long Maprik na givim han long developim asples bilong yu.

Kaunsil i laikim K10 bilong yu long kirapim sampela wok. Yu mas save tu olsem Maprik em i wanpela bikpela eria. Mani ol i kisim em i no inap long developim wanpela distrik long wanpela taim tasol.

Yu bin tok tu olsem yu bin raun long planti hap pinis na yu bin lukim ol bikpela man tasol i baim takis. Yu tok tu olsem ol save kolim dispela takis, inkam takis. Inkam takis em wanem kain takis? Inap yu raitim pas gen na tok kliia moa long mipela? Inap yu tokim mipela sapos mipela i mas baim dispela kain takis i go long kaunsil olsem wanem?

Mi gat 5-pela askim i go long Kenny Kombuli.

• Wanem kain manmeri inap baim dispela kain takis em yu kolim inkam takis?

• Olgeta manmeri long taun na ples kanaka insait long Maprik i ken baim dispela kaintakis tu o nogat? Inap yu lusim Kimbe na go bek long Maprik Distrik na bringim tingting bilong pulim inkam takis i go insait long Greta Maprik Kaunsil?

• Inap yu go soim ol pipel bilong Maprik long rot bilong baim inkam takis i go long kaunsil bilong ol?

• Inap yu kolim sampela kantri em yu bin raun pinis long en na lukim ol pipel i save baim inkam takis i go long kaunsil?

Sori, pren. Mi no save nau. Bai mi baim inkam takis i go long kaunsil o olsem wanem sapos mi go long Maprik bihain? Hia long Maprik mipela i no gat kaunsil long wanem mipela i gat komyuniti gavman.

Kenny, bai mi amamas tru sapos yu bekim pas bilong mi na bekim olgeta 5-pela askim em mi givim yu.

Oni Mole Manus Ailan.

moa pas long pes

16 na 17

LIKLIK TRAKTA



Strongpela na inap tru long olkain wok.



Yu yet i kam na lukim.



Wanpela provins husat i wok long gro hariap tru em Oro. Planti bikpela projek insait long Oro i sanap strong pinis. Sampela kain projek olsem em Higaturu Wel Pam na Kumusi Timba.

Yumi no ken ting lus tu long bikpela samting em Oro provins i helpim kantri long kamapim. Dispela em ol yangpela pipel husat i kisim bikpela save long ol skul.

Oro provins i gat ol lida husat i bin lukim waitman i bringim tamiok bilong katim diwai i go long eria bilong ol. Na ol dispela bikman bilong Oro tude i bin lukluk i stap taim olgeta pait na ros namel long ol lain wanpisin i pinis.

Wanpela man husat i lukim dispela bikpela senis i kamap long Oro, long ai bilong em, em Primia Conway Ihowe. Nau primia i save amamas long wanem ol lain bilong Binandere, Orokaiva, na Managalas i pren wantaim pinis. Oli no save pait moa. Taim primia i amamas em i save lus tingting long sampela hevi em provinsal gavman bilong em i kamapim.

Odita jeneral (man bilong sekap long mani) i bin go ong provins bilong Mista Ihowe tupela taim pinis long sekap long pasin bilong provinsal gavman long yusim mani.

Mista Ihowe i bin tok, "Bipo famili bilong mi i save wok hat long stretim olgeta kain kros namel long ol pipel. Olsem na mi bilip olsem olgeta lida bilong pipel i mas wok wantaim na bringim developmen i kam long provins bilong mipela."

Mista Ihowe i bin mekim dispela tok long kliaim astingting bilong em long senisim sampela minista insait long gavman

Noten Provins i kirap

bilong em. Long dispela taim em i kisim tupela birua bilong em long oposisen na givim tupela dipatmen i go long ol long lukautim.

Dispela tupela man, Kipling Gombo, na Lionel Handu, em tupela lida bilong Pangu Pati insait long provins asembli.

Dispela tupela man i holim nau ministri bilong Hom Afeas na Komes. Primia i tok ol pipel bilong Oro in o redi yet long harim planti tingting bilong narapela politikal pati insait long Provins bilong em. Mista Ihowe yet i save go pas long lain Independen Alaiens.

Mista Ihowe i gat planti wantok husat i kisim gutpela sku' pinis na ol dispela lain bilong em inap givim planti gutpela tingting bilong ranim gavman.

Mista Ihowe i save amamas tru taim em i stori long 30 yia bilong em insait long wok politik. Em i tok mama i karim em long 1936. Na em i save tingim yet planti gutpela wok em tumbuna bilong em i save mekim long kamapim gutpela sindaun namel long pipel bilong Oro bipo.

Mista Ihowe i save bihanim pasin bilong Oro long stori. Em i save tok, "Tumbuna man bilong papa bilong mi i bilong liklik ples Kiorota na em i save go pas long ol pipel bilong Orokaiva long pait. Pipel bilong em i save pait wantaim ol pipel bilong Sairope long Apa Kumusi (lain bilong mama).

Ol Orokaiva i bin paitim na bagarapim tru ol Sairope olsem na bos bilong ami bilong Sairope (tumbuna man bilong mama) i laik stapim pait. Em i kisim tumbuna meri bilong em, i gat 9 krismas, na givim i go long tumbuna man bilong papa. Em i tokim lain bilong papa bilong mi



• Primia bilong Oro, Conway Ihowe na meri bilong em i sanap long baksait.

long lukautim liklik meri ya gut. Na taim liklik meri i gro bikpela em bai maritim tumbuna bilong man ya. Olsem na mipela i kam long famili bilong ol pipel husat i stretim sindaun namel long pipel biong Orokaiva na Sairope. Kephas Ihowe i no gat narapela rot moa. Em i mas maritim Gilda Mary Maire long wanem marit bilong tupela bai strongim pren namel long tupela wanpisin.

Namba tu wol woa i kam na brukim sindaun bilong ol pipel. Kephas Ihowe i lusim yangpela meri bilong em na i go karim kago long pait na kago na bihanim Kokoda rot.

Long taim woa i pinis ol soldia bilong Australia na Amerika i givim presen olsem rais na tin pis, mit, na tapak i go long Kephas na olgeta arapela man husat i bin wok long tai nogut bilong woa.

Kephas Ihowe i no laikim samting bilong kaikai. Em i mekim sain long han bilong em olsem em i laikim wanpela samting bilong katim diwai. Em karim tamiok bilong em i go long ples na em namba wan man tru long mekim wanpela haus i gat pos. "Ol pipel i save baim papa bilong mi sapos oli laik yusim tamiok ya. Oli save kilim pik, na bringim i kam bek

wantaim tamiok," Mista Ihowe i tok.

Olgeta dispela stori i bilong tokaut long wanem kain man i kamap lida bilong 78,000 pipel bilong Oro tude. Politik i no nupela samting long em.

Mista Ihowe i tok, "Pipel bilong mi i makim mai long kisim maus bilong ol insait long asembli. Olsem na mi laik bai ol saveman i mas helpim mi na givim sampela gutpela tingting. Olsem na sapos yumi no gat opisesen insait long provins yumi no ken wari tumas long dispela long wanem yumi olgeta i mas wok

hat long kirapim provins bilong yumi."

Conway Ihowe i wok long sky long misin skul long taim namba tu wol woa i kamap long ples bilong em. Long taim woa i pinis em i bin go bek skul gen na pinisim namba tri yia bilong em long praimer skul. Bihain long dispela em i go long Martyrs Memorial Skul na skul inap tupela yia namel long 1948 na 50.

Long taim em i lusim Martyrsemigo stap 4-pela yia gen long Dogura Tisa koles, long Not Kos bilong Milen Be. Em i bin tis 3-pela yia

tasol na Edukesen Dipatmen i givim bikpela wok olsem Tisa-in-Sas. (Nau ol save kolim dispela posisen Het Masta).

Long 1964 Mista Ihowe i traim resis insait long nesenel ileksen. Tasol Edric Eupu i bin winim em olsem na em i go bek long klasrum na tis. Em i stap 3 yia olgeta olsem Tisa-in-Sas long Isivita. Long dispela taim em i bin kisim wanpela pas i kam long Bisop David Hand na Bisop i laik bai Conway i mas lusim wok tisa.

Bisop Hand i bin tokim Conway olsem God i gat narapela tingting na wok bilong givim long en. Conway i ken tingim yet pas bilong Bisop Hand i tok, "Pikinini, God i singautim yu." Dispela yia tasol em i raun na ol pipel bilong em ilektim em i go insait long Higaturu Lokal Gavman Kaunsil. Long taim i kamap kaunsila ol i makim em siaman na em i holim dispela wok long nupela yia. Taim ol i kirapim Noten Provins Eria Atoriti, Conway i kamap memba na i holim dispela wok long tripela yia.

Long dispela taim nau ol i bringim interim provinsal gavman i go insait long Oro. Primia Ilekta long dispela taim, Edric Eupu, i makim Conway long holim ministri bilong Komes, Leba na Turism. Long taim ileksen bilong provinsal gavman i kamap Mista Ihowe i win insait long Saiho Konstituensi.

Insait long namba tri yia bilong em olsem memba, primia i bin salim em i go lukluk raun long Australia, long kain ples olsem Sidni Kenbera, na Melbon. Em i bin raun 7-pela wik olgeta long Australia na em i amamas tru long olgeta samting em i bin lukim.

Primia Mark Taua i senisim Edric Eupu long taim Eupu i risain. I no longtaim bihain long dispela narapela provinsal ileksen i kamap. Mista Ihowe i tok, "Mi traim Saiho Konstituensi gen. Dispela taim 4-pela yangpela man i salensim mi. Tasol mi win wantaim 484 vot."

Mista Taua i givim em minista bilong home afeas, spot na rikriesen, lokal gavman kaunsil, yut na rilijen. Long taim Oro provinsal

I go moa long pes 9



• Ol pipel bilong Oro Provins i amamasim independens de.



Pacific Gold Studios

"Yu Ken Harim Nambawan Musik Tasol"

OLABOI!!

GEKKO (KAM RANG)

NUPELA KASET BILONG NUPELA P.N.G. SUPERSTAR

Harim GEKKO na band bilong em i pilai ol kain kain singsing bilong lap

"BARIKE BAND" i lap na singsing wantaim GEKKO long dispela kaset.

P.O. BOX 29, RABAU, E. N. B. P.

PHONE: 92 1330 / 92 1639

Egensim Kampani

Sina-Shingawa Timba Kampani bilong Japan husat i laik katim-timba insait long Is Nakanai eria bilong Wes Nu Briten Provins i kisim tok kros i kam long memba bilong Talasea, Mista Harry Humphries long dispela wik Trinde.

Mista Humphries i no laikim dispela timba kampani i go het na katim timba insait long Bakada eria bilong Is Nakanai.

Mista Humphries i tok em i gat tripela as long mekim kamap tok kros. Long namba wan as, em i tokaut olsem Wes Nu Briten Provinsal Gayman i tok kha pastaim long em long kain kain wok i kirap insait long Bialla Distrik.

Long namba tu as, em i tok olsem Unabult Developmen Kopresen husat i wanpela lokal bisnis grup i ken kisim sab-kontrak long dispela wok bilong katim timba. Watpo na provinsal gayman i no laik givim sans long dispela lokalbisnis?

Na long namba tri as, em i tokaut olsem dispela Sina-Shingawa Timba Kampani i bin wok planti via pinis insait long Bialla Distrik, tasol kampani i no kirapim ol wok bilong helpim ol lokal pipel insait long dispela hap.

Tok Ples Skul

- Buk 1 Wokim Basketbal Ring/Pingpong/Siso
- Buk 2 Wokim Kain Kain So
- Buk 3 Kirapim Viles Woksop
- Buk 4 Kirapim Viles Bekri
- Buk 5 Wokim Wara Teng Long Simen
- Buk 6 Kirapim Taiasevis
- Buk 7 Lukautim Ka

Planti long yumi i klia long ol kain skul olsem haikul, prraimer skul na teknikal skul. Wanem samting tru em 'Tok Ples Skul'? Sori, yu asua pinis.!

Bai mi stori liklik long yu na bai yu i ken klia long dispela kain skul. Dispela kain skul ya i stap long Mainyanda, Bulolo long Morobe Provins. Nem bilong skul ya em ELC/PNG Viles Teknik 'Tok Ples Skul.'

Nogut yu ting dispela skul em i skul bilong skulim ol studen long paitem tok ples. Nogat.

Lutheran Sios i luksave long hevi bilong ol manmeri bilong PNG. Planti i no klia ka i kam olsem wanem. O su i kam olsem wanem. O wilwil i kam olsem wanem. Olsem na sios i laik kirapim dispela skul long skulim ol yangpela long wokim ol kain samting.

Long dispela we ol yangpela ya i ken go bek long pels na tokim ol manmeri, olsem wanem ol samting yumi lukim, i kamap.

Long 1980, ol i kisim wanpela wokman bilong Luteran Sios long Jemani,

Dieter Klein long kam kirapim dispela skul.

Dieter i kam na go antap stret long Rintebe, Goroka. Em i kisim tupela helpam long wok wantaim em tu. Tupela man ya i Geling Lod bilong Morobe Provins na Bob Ape'e bilong Isten Hailans.

Ol tripela i stat pastaim long kamapim ol kain liklik buk. Long taim ol i kamapim ol dispela buk pinis, ol bai yusim long trenim ol sumatin long en. Ol kain buk ol i kamapim ol olsem 'We bilong Stretim Taia,' 'We bilong Lukautim Ka'

Stori i kam long: Bob A'ape Junius Nalau Cletus Mugula Gabriel Pise



na olkain liklik buk olsem. Lista bilong ol buk bilong ol i stap daunbilu.

Ol tripela i no save stap wokim ol dispela buk tasol. Nogat. Samtaim ol i save raun na wokim ekstensen wok. Ol i raun long ol sios grup na ol kain grup na wokim dram aven na ol dispela kain samting long ol.

Dispela skul i stap tu yia. Insait long dispela tupela yia, ol i bungim sampela hevi. Ol raskol i kam na bagarapim ol samting bilong ol.



• Pasin bilong wokim fero semen tang wara.

Orait, Lutheran Sios i lukim olsem na i kam daun skruim dispela wok bilong ol long Mainyanda, Morobe Provins.

Bipo, antap long Goroka ol i no kisim ol studen yet. Long taim ol i stat long Mainyanda, ol i stat kisim ol studen. Pastaim tru, 14 studen i kam long kisim trening.

Ol i trening long wok fama, wok mekenik, wok kamda na kain kain wok. Ol i fiksिम taia bilong ol ka na trak, ol i wokim ol basketbal ring, ol i skul long lukautim ka na ol i gat wanpela banis kakaruk tu.

Man, ol studen i tren long kain kain samting.

Ol i no stap tren tasol long senta. Nogat. Ol i go raun tu long olgeta hap bilong Bulolo long karimaut wok ekstensen. Ol i raun soim ol manmeri long wokim ol mambu simen teng wokim dram aven na ol


arapela liklik wok.

Arapela wok ol i wokim tu em long ol i kamap agensi bilong Viles Ikwipmen Saplais. Ol i kisim ol tul samting bilong VES na bihain salim gen long ol pipel.

Dispela skul bilong ol i no kisim ol yangpela bilong Morobe tasol. Nogat. Ol yangpela ya i bilong Westen Hailans, Isten Hailans, Madang, Simbu, Morobe na Not Solomons. Ol bai kisim ol yangpela bilong arapela hap tu.

Dieter, menesa bilong skul i go pinis long las mun. Tasol tupela asples i wok i stap ya i tok, "Em i orait. Em i ken go. Tasol em i no karim save i go pinis wantaim em tu. Nogat. Em i givim save long mitupela pinis."

Samtaim long neks yia, bai nupela menesa i kam long helpim tupela. Nau, em bai tupela i strongim wok i go inap nupela menesa i kam.



• Wanpela wokman bilong ELC viles Teknik.

Coleman

continental trading co. pty. ltd.
po box 7077 boroko. ph. 252200

CALLING ALL BANDS WE SELL

- amplifiers & speakers
- drumsets, sticks, skins
- guitars; electric; bass and ordinary
- strings & keys
- Music Books
- na ol kainkain samting long music

BATTERY GUITAR AMPLIFIERS

- * LEAD RYTHM — K85.00
- * BASS — K90.00

ROOK'S RADIO
PO BOX 191 LAE
behind B.P.
PH-42 4616

Pikinini mas ritim niuspepa

Gavman bilong Primia Karava i askim ol Bot ov Menesmen bilong olgeta komyuniti skul insait long Galp Provins long givim saplai bilong ol niuspepa i go long ol skul pikinini.


Primia Karava wantaim Galp Provinsal Gavman i bilip olsem ol skul pikinini bai klia long planti samting moa, sapos ol i ritim kain niuspepa olsem Wantok Nius, na ol arapela niuspepa. Aidia bilong kirapim dispela sevis i kamap long Galp Provinsal Gavman long dispela wik Mande, 1 Oktoba, 1984.

Provinsal Minista bilong Edukesen, Mista Ope Oeaka i tokaut long dispela tingting igo tu long ol tisa bilong lain komyuniti skul i stap aninit long Katolik

Misin.

Mista Oeaka i tokaut olsem Bot ov Menesmen bilong wanwan komyuniti skul i mas yusim mani bilong ol yet long baim niuspepa na givim long skul bilong ol.

Em i tokaut olsem Provinsal Dipatmen bilong edukesen i raitim kamap wanpela ripot bilong larim Galp Provinsal Gavman i givim sampela helpim mani long baim ol laibrari buk na givimaut long ol komyuniti skul. Bihain bai ol i givim dispela ripot i go long Provinsal Eksekutiv Kaunsil. Sapos dispela kaunsil i oraitim tingting bilong ripot, em bai Galp Provinsal Gavman i bihain askim bilong ol.



• Nesenel Minista bilong Edukesen, Sir Barry Holloway i opim liklik so bilong ol Vokesenel Senta insait long Mosbi las wik. Dispela so i bin kamap long Tabari Ples long Boroko.

I kam long pes?

asembli i mekim wanela vot i no gat bilip long namba tu primia, David Tago, Mista Ihove i winim Mista Tago wantaim 12 vot na Mista Tago i kisim 6-pela vot tasol. Mista Ihove i kamap diputi primia.

Mista Ihove i tok, "Long taim namba 4 yia i pinis na ileksen i kamap long Novemba 1983, 12 yang-pela boi i salensim mi insai tlong Saiho konstituensi. Dispela taim mi win gen wantaim 477 vot. Long Disemba ol brata bilong mi insait long Asembli i givim 12 vot long mi na mi kamap primia. Ol i save olsem mi gat ekspiriens long ranim provins."

Mista Conway Ihove i gat 9-pela pikinini tasol em i holim sampela arapela bikipela wok insait long provins tu.

- em i kalsa lida bilong pipel bilong em, Kiorota o Orokaiva
- Siaman bilong Seving na Lon Sosaieti
- Siaman bilong bod ov Gavana long Martys Memorial skul
- Sios lida (em i gat

laisens i kam long Bisop Han)
- Siaman bilong Oro Transpot Bod.

Mista Ihove i tok olsem olgeta pikinini bilong em i wok long givim gutpela sevis i go long pipel bilong Oro tu. Em i gat 6-pela pikinini man. Wanela pikinini bilong em Joseph Anthonius i save draivim opisal ka bilong primia yet. Narapela pikinini bilong em George King Ihove i save wok long wel pam blok bilong mama bilong em long Igora. Wanela pikinini tasol, Conway Linsley Ihove i wok long Pos Opis long Mosbi. Olgeta tripela pikinini meri bilong em i skul yet long praimer skul.

Dispela bikman bilong Orokaiva i mas wok hat nau long bungim planti narapela pipel bilong kantri na pipel bilong em yet. Nau, insait long provins bilong em, i gat ol pipel bilong Hailans, Kerema, Milen Be, na Morobe husat i kisim ples i pinis long Oro. Ol dispela pipel bilong narapela hap bilong Papua Niungi i go long mekim bisnis insait long Oro na ol

helpim long developim provins bilong Ihove.

Wel Pam na timba indastri i wok long pulim nupela man i go insait long Oro. Ol yangpela bilong Oro husat i wok long skul nau i wok hat long givim gutpela tingting i go long primia

bilong ol. Olsem na i gat sampela nupela projek moa i wok long kirap.

Ol dispela nupela projek em Tufi Fisaris na wok turis bai pulim tingting bilong planti pipel i go long provins bilong Conway Ihove.



BY APPOINTMENT TO THE ROYAL DANISH COURT

TULIP canned meat



Hot Dogs

250g
125g-



Pork Luncheon Meat


340g
200g



Cooked Shoulder Ham
454g



Cooked Leg Ham
454g



Available at your Local Store

HRD 4761

Yu ting wanem long provinsal gavman

Nesenel gavman i tok pinis olsem em bai go bek long ol pipel bilong Papua Niugini na askim ol sapos ol i laik wok bilong provinsal gavman yet.

Gavman bilong Michael Somare i askim pinis ilektoral komisen long stretim ol pepa bilong statim dispela wok bilong kisim tingting bilong ol pipel. Dispela wok em i wankain olsem ileksen. Tasol long dispela taim wan wan manmeri i mas tokaut sapos em i laikim provinsal gavman long stap yet o nogat.

Wantok i bin askim sampela pipel long autim tingting bilong ol long wok bilong olgeta provinsal gavman. Na hia em bekim bilong ol.

Gabriel Galmai em i bilong Simbu. Em i wok olsem Trefik Opisa long Jeksen ples balus.

Gabriel i tok, "Planti man long planti kain gavman i save go grisim pipel bilong ples. Ol dispela i bagarapim tingting bilong ol pipel.

"Olsem na yumi mas rausim olgeta provinsal gavman na larim Nesenel Gavman wanpela stap. Nesenel gavman bai gat wanpela tingting tasol na ranim kantri stret.

"Planti provinsal gavman i bikhet. Ol i baim gutpela ka na ol minista bilong ol i save raun long ka na i no tingting long ol pipel. Mi yet i bin stap long ples na mi lukim olsem ol provinsal memba i save tingting long ol yet tasol. Astingting bilong provinsal gavman em

bilong larim ol pipel yet long tingting gut na bringim wanem kain senis i go long ples bilong ol. Dispela i no kamap tru long wanem olgeta man em mipela ting bai i gutpela lida i go na lus tingting long pipel yet.

Boio Gamu em wanpela em i wanpela meri Hanubada. Em i save wok long Baset Ret-a-Ka long Jeksen ples balus.

Boio i tok, "Mi ting wok bilong ranim provinsal gavman insait long Papua Niugini i kaikaim planti manitumas. Olsem na yumi mas pinisim olgeta provinsal gavman.

"Yumi olgeta mas stap aninit long wanpela gavman tasol. Kantri bilong yumi em i liklik kantri olsem yumi mas gat 100 pipel tasol i wok

Francis Temu i save stap long Hohola long Mosbi Siti.

Francis i tok, "Ol Yut bilong tude i no inap larim narapela manmeri i sindaun gut long wanem gavman i no tingim ol. Provinsal gavman sistem em i wanpela rot bilong larim ol man husat i save mangalim mani i go insait long pulimapim poket bilong ol."

Mi ting olsem gavman bilong dispela kantri inap mekim gutpela wok wantaim olgeta mani em i wok long lusim nating long ranim ol provinsal gavman. Nesenel gavman i mas rausim provinsal gavman na

Morris Bomai em i bilong Suave long Simbu Provins.

Morris i tok, "Yumi olgeta i lukim pinis olsem nesenel gavman i saspenim 2-pela provin-

politik.

"Kantri bilong yumi i westim planti mani long baim planti politisen. Na planti politisen bilong yumi tu i laikim gutpela ka, haus na planti kain sevis. Planti mani i go bilong helpim ol politisen yet na developmen tru i no kamap."

yusim dispela mani long baim nupela gan, katres, sip na balus na mekim ami bilong yumi i go wankain olsem ami bilong ol kantri klostu long yumi."

"Na tu Mosbi Siti na ol arapela taun insait long Papua Niugini i painim hat long stapim yangpela bilong ol long mekim pasin raskol. Nau em sans bilong gavman long yusim sampela bilong dispela mani em i save go long provinsal gavman long kirapim sampela wok bilong mipela ol yangpela. Mi ting olsem ami bilong yumi i mas kisim moa manki i go joinim ol."

sal gavman. Nesenel gavman i wok long was yet long painisim sampela moa.

"Mi ting olsem ol i mas lusim bipo we nesenel gavman wanpela i wok. Mi bai sapotim tru dispela vot-nogat-bilip long Novemba long wanem mi save olsem Iambakey Okuk em wanpela man i no laikim olgeta provinsal gavman.

Pangu tasol i bin kirapim Provinsal gavman sistem."



I gat 30 Rum Long Maun Hagen

- Em i no stap longwe long ol stua
- I gat maket i stap klostu
- I gat ples pilai i stap klostu

Yu Ken Aplai Long Kisim Spesel Pe Bilong Yusim Motel.

MOUNT HAGEN 52 1388

CABLES: HAPARK.
P.O. BOX 81, MT. HAGEN.
TELEX: 52056 HGNPARK

Namba wan samting em i gutpela helt long olgeta famili.

Famili i gat gutpela sindaun bai i hamamas. *Johnson & Johnson* i gat olgeta samting bilong mekim famili bilong yu helti na lukim gut.



Johnson & Johnson



COLLEGE OF EXTERNAL STUDIES

Going Places

High School at home - COES helps

you with your studies



COLLEGE OF EXTERNAL STUDIES

No 116

ENGLISH GETTING A JOB

For the next three weeks we will be finding out about jobs. We will be:

- reading advertisements,
- completing applications,
- going to the interview.

This week we will be finding out about advertisements.


Here's Joseph. He will be trying to find a good job over the next few weeks.



Hello everyone

Igo

says.....



Some advertisements ask us to buy things and some advertisements tell us about jobs that are vacant (empty or available).



'POSITION VACANT' means that someone is needed to do a job. The job advertised here is for a TRANSPORT CLERK.

Reading Advertisements



Let's look at this advertisement. It is taken from a newspaper.

POSITION VACANT

TRANSPORT CLERK

required by a Lae Company.

Applicants must be educated to Grade 8 level with at least 1 years experience in the transport industry

Good Salary. No accommodation provided

Please apply in writing to:-

THE MANAGER

P.O. BOX 1028

LAE

The job will be in Lae.

This tells you that you must have studied to Grade 8 and have worked for 1 year.

You are told here that the pay is good but you will not be given a house.

If you would like to try for the job then you must write to the Manager.

Wantok BUK KLAP

LUKIM WANEM BUK YU LAIKIM NA SALIM TASOL MANI KAM NA BAI MIPELA I SALIM BUK BILONG YU I KAM.

- Putim dispela mak x insait long boks long makim wanem buk yu laikim.
- Prais bilong buk i karamapim pe bilong pos opis insait long PNG.
- Bai i gat ol nupela buk bilong Wantok Buk Klap olgeta tupela wik.

Ol buk bilong dispela wik.

Mogundi and Eka Run Away by Dianne McInnes
15 x 22
Wantok Buk Klap Prais — K1.70

Mogundi and Eka Run Away



Home Economics for Papua New Guinea by Pamela A. Norman
19 x 24
Wantok Buk Klap Prais — K525.



People of the Pacific by David and Ann Holdsworth
28 x 20
Wantok Buk Klap — K2.50



Things That Go by Paul Hunter
16 x 19
Wantok Buk Klap Prais — 75 toea tasol.



Salim dispela fom wantaim sek o posta oda bilong yu i kam long: Wantok Buk Kl' P.O. Box 1385, Port Moresby.

NEM: _____

ADRES: _____

- Yu inap long baim ol dispela buk bipo long Oktoba 26, 1984
- Ol buk bai kamap bihain long 28 de.
- Olgeta buk ya i kam long WEB Books.
- Putim oda bilong yu long dispela fom tasol.

Now you complete the answer:



Here is another advertisement to look at.

POSITION VACANT

CORAL BAY COMPANY

URGENTLY REQUIRES

A STOREMAN

LOCATION: RABAU

DUTIES: To organise and control flow of equipment and spares from the company's main store.

QUALIFICATIONS: Completed Grade 9 and must possess a Class 1 Driving licence.

Telephone the Secretary for an application form 92121

This is the company looking for someone to work for them.

This means they would like someone straight away.

The work will be as a storeman.

Location means place.

If you are given the job then you will have to do these things.

You must have finished Grade 9 and have a Class 1 driving licence.

If you would like to apply for the job then you have to telephone the secretary.

1. What does vacant mean? _____

2. Which word means money? _____

3. What is the Manager's address? _____

ANSWERS:

1. Vacant means "empty", 2. salary, 3. P.O. Box 1028, Lae.



PUZZLES 2

Look at the dates of the month of March below. A rectangle is drawn around a 3x3 numbers as shown.

MARCH

SUN	MON	TUE	WED	THU	FRI	SAT
				1	2	3
4	5	6	7	8	9	10
11	12	13	14	15	16	17
18	19	20	21	22	23	24
25	26	27	28	29	30	31

1. 3x3 numbers
middle number

Name is the middle number.

Method:

- i. Add all the numbers in the rectangle.
What is the sum?
- ii. Next multiply the middle number by 9.
What is your answer?

2. Another 3x3 numbers have been selected for you above.

(i) What is the sum of the numbers? _____

(ii) Multiply the middle number by nine.
What is your answer? _____

3. Dates for the month of May is given below.


MAY

SUN	MON	TUE	WED	THU	FRI	SAT
		1	2	3	4	5
6	7	8	9	10	11	12
13	14	15	16	17	18	19
20	21	22	23	24	25	26
27	28	29	30	31		

Select any 3x3 numbers

- (i) Find their sum.
- (ii) Find the product of the middle number and 9.
What do you notice about the sum of the 3x3 numbers and the product of the middle number and nine?
To answer the question complete the sentence below. Put in the words: [same, product, middle sum] in the appropriate space, so that the sentence makes sense.
(iii) The of the 3x3 numbers is the as the of the number and 9.

4. Here is more fun with numbers. A wheel of circles is drawn below.




Rearrange [1, 2, 3, 4, 5, 6, 7] so that every line of three numbers adds to the same sum.

There are several different solutions; see if you can find them all.

5. Another Number Wheel

Arrange the numbers 1 through 11 in the figure shown below so that the sum of all lines of three will be the same.



"GOING PLACES" COMPETITION — NO.9

ANSWERS

1. 21 SHEETS
2. COLUMN 7
3. COLUMNS 3, 4, 5, 6, 7, 8, 9, 10

SHEETS 6, 8, 10, 12, 14, 16, 18, 20

FRAMES 7, 10, 13, 16, 19, 22, 25

Congratulations to GORETTI BATTIA from MADANG who won last month's competition. The correct answers were:

1. 21 SHEETS

2. 7TH COLUMN

3. COLUMN: 5, 7, 9; SHEETS 12, 16; FRAMES: 16, 19, 21, 21, 27

cut along dotted lines

"GOING PLACES" COMPETITION NO.10

The following questions are based on this week's Living and Learning page. Answer the questions and then cut out this coupon and send it to COES to reach us no later than 25th October. Send it to:—

The Co-ordinator
"Going Places"
COES
P.O. Box 500
Konedobu, NCD.

The neatest correct entry will win K5. The winner's name will appear in "Going Places" on 1st November, together with the correct answers.

QUESTIONS:

1. How much is the special fare to the Mt Hagen Show?
2. What is the address of the Lac Company?
3. Where is the Coral Bay Company?



PRINT

Your name

and address

NOTE: The judge's decision is final and no correspondence will be entered into.

ANSWERS



- (i) should be the same as (ii)
- (ii) The sum of the 3x3 numbers is the same as the product of the middle number and 9
- (iii) should be the same as (i)

(i) should be the same as its middle number multiplied by 9

3. The sum of the selected 3x3 numbers:

1. (i) 81 (ii) 81 (iii) 108 2. (i) 108 (ii) 108

ANSWERS



Wantok SPOT NIUS



MOSBI SOKA DRO

Sarere 6 Octoba, 1984
BISINI 2

12.00 1st G.F.C. V Kula
1.30 1st Westpac V Sobou
3.00 1st Waliya V Wanzesi
4.30 1st K'wina V Murat.

BISINI 1

9.00 U19 Kunta V Mopi
10.45 U19 PNGDF V G.F.C.
12.00 U19 Guria V Sunam
1.15 U19 ANG V T'ngau
2.30 U19 R'tona V B.Kumul
3.45 U19 Yuni V Westpac
5.00 U19 Waliya V Dela Sale

DIFENS

12.30 2nd Kuni V L.S.C.
1.30 2nd Jevaha V Ali Utd
3.00 2nd K'navau V Kusebo
4.30 2nd Mokawa V Faze

GFC

12.30 3rd Sunam V PNGDF
1.30 3rd B.Kumul V KadaKada
3.00 3rd Togelu V Board
4.30 3rd K.E.Klap V Baba

ADKOL

12.30 4th Pallou V Katumani
1.30 4th V.R.G.C. V S.T.C.
3.00 4th Sulen V Gomba
4.30 4th VairaBYE

S.H.M.1

12.00 2nd Kunta V Ston Axe
1.30 2nd T'ngau V R'tona
3.00 1st Watani V Maegin
4.30 1st ANG V L.Youth

S.H.M.2

12.00 4th Kunta V Buresong
1.30 4th Y.M.C.A. V Mopi
3.00 3rd Batu Bros V Guria
4.30 3rd BumBun V Kwasis

Sande, 7 Oktoba, 1984
BISINI 1

9.00 U19 Yuni V D.Sale
10.45 U19 Kunta V Sunam
12.00 U19 ANG V Westpac
1.15 U19 Waliya V Mopi
2.30 U19 T'ngau V B.Kumul
3.45 U19 Guria V PNGDF
5.00 U19 R'tona V G.F.C.

BISINI 2

12.00 1st Murat V Watani
1.30 1st G.F.C. V L.Yuts
3.00 1st Wanzesi V Sobou
4.00 1st Westpac V K'wina

DIFENS

12.00 2nd T'ngau V Stone Axe
1.30 2nd Mokawa V Kusebo
3.00 2nd Guni V K'navau
4.30 2nd L.S.C. V Ilimo

G.F.C.

12.30 3rd B.Kumul V Baba
1.30 3rd Bunbun V Sunam
3.00 3rd K.E.Klap V Baba
4.30 3rd Guni V PNGDF

ADKOL

12.00 4th YMCA V S.T.C.
1.30 4th Buresong V Pallou
3.00 4th Mopi V Kunta
4.30 4th VR.G.C. — BYE

S.H.M.1

12.00 2nd Jevaha V Faze
1.30 2nd R'tona V Ali utd
3.00 1st Waliya V Kula
4.30 1st ANG V Maegin

S.H.M.2

12.00 4th K'mani V Gomba
1.30 4th Sulen V Vaira
3.00 3rd Board V Kwasis
4.30 3rd Togelu V K'kada

Women B Divison will play their last game on the 14 October, 1984, at the Stadium before the semi final.

GFC KISIM NAMBA 4 PLES

Straika nogut bilong GFC, Caspar Logson i skoim tupela gol na autim Kunta 2—1 insait long Bisini long las wik Sarere.

Ben Wauns

Dispela win bilong GFC i putim ol i go insait long namba 4 ples long poin lata bilong Mosbi Primia

Divisen resis. Na GFC i gat sans long go insait long kwata fainal resis wantaim Yuni, Rapatona na Guria long Sarere, 20 Oktoba, 1984.

Insait long ol narapela Primia Divisen resis long las wik, em Yuni i krungutim Mopi 2—0 long Sarere. Na Difens i rapim Rapatona 2—1 long Sande.

Moa long 50 manmer husat i lukim

dispela pilai namel long GFC na Kunta i no amamas. Long wanem ol pilaia bilong tupela sait wantaim i bosim reperi, Mau Sapek, long lukautim pilai. Dispela pasin i mekim planti asua i kamap insait long ples pilai. Na ol pilaia i kros i go i kam.

Ol pilaia bilong GFC na Kunta i no putim kamap planti smatpela stail bilong soka. Bal i wok long flai nabaut na ol pilaia bilong tupela tim i givim siksti na bihainim bal i go i kam.

Tasol tupela pilaia husat i soim gutpela pilai long dispela resis, em staika bilong Kunta, Jacob Jambi wantaim senta fulbek bilong em, Lucas Bajo.

Caspar Logoson bilong GFC i sanap risev straika na sambai long saitlain. Ol dokta long Mosbi Jeneral Hospital i tambuim em long pilai. Long wanem em i gat bagarap long ol bun long baksait bilong em. Tasol em i lukim pilai i go het na em i belsut long kikim bal. Na em i go insait long seken hap bilong pilai na sanap senta fowat bilong GFC. Na wanpela fulbek bilong GFC i kranki liklik na mekim Jambi i pundaun insait long penaltieria. Jambi yet i kisim penalti kik i na skoim gol. Na tupela tim i dro 1—1 insait long 20 minit mak bilong seken hap bilong pilai.

Pilai i go yet inap long 29 minit mak na Logason i go putim namba tu gol bilong em na mekim GFC i

go pas 2—1. Em i kisim bal na abrusim tupela fulbek insait long raithan kona. Em i wipim bal strong tru na i tulet long golkipa bilong Kunta i holim pasim bal. Na dispela 2—1 skoa i sanap strong i go inap long fultaim.

Ol dispela Primia Divisen resis long las wik i pinisim olgeta pilai insait long namba tu raun resis bilong Mosbi soka sisen. Tasol Blu Kumul na Mopi bai pilai long dispela wik Sarere na pinisim las pilai bilong ol.

Ol pilaia bilong Blu Kumul, Tarangau, Difens, Sunam, Kunta na Mopi i ken malolo na hangamapim soka su bilong ol. Bikos ol i no inap pilai moa i go inap long soka sisen bilong neks yia. Ol pilaia bilong GFC, Rapatona, Yuni na Guria bai go het long pilai insait long kwata fainal na semi fainal. Na tupela tim husat i laki bai go insait long gren fainal resis long Sande, 4 Novemba, 1984.

Mosbi i top



• Ol yangpela anda 19 soka pilaia bilong Mosbi i ken amamas long wanem ol i top tim bilong grup bilong ol long PNG.

Murat waraim Sobu

MOA Long tu hundet pipel i bin was taim Murat i bin waraim Sobou 5—1 las Sande long Bisini graun.

Alfred Kaniniba

Ating San Mig jesi bilong ol Murat i bin wokim ol Sobou i ai raun.

Long taim gem i bin stat Sobou i bin strong long kisim bal i go insait long gol eria bilong Murat tasol olgeta taim ol i bin straik i go long gol ol i bin abrus.

Samting olsem 15 minit i go insait long gem Murat i pasim bal i go long senta fil na long taim ol i kam long ol beks bilong Sobou, ol i no redi na Murat i putim namba wan gol bilong ol. Orait i no long taim bihain Sobou i bin senta kik tasol Murat i bin stilim bal gen na ol i putim namba tu gol bilong ol.

Tasol Sobou i bin pait strong na ol i bin skoim namba wan gol bilong ol long taim ol i bin stilim bal long ol difenda bilong Murat.

Murat i no isi ol i

bin stap strong na ol i bin pasim bal gut tru olsem kain bilong pilai mabol na ol i bin wokim ol Sobou i wokabaut long dispela as tasol ol i bin skoim narapela gol. Long namba tu hap, kain stail bilong Murat long mekim ol sot pas i bin putim tupela moa gol bilong ol.

Las wik Murat i bin lus gut tru long Wanzesi olsem na ol i bin pilai hat tru long winim dispela gem.

Murat i sanap yet namba tu long tes divisen soka insait long Mosbi.

MOSBI SOKA DRO

Promosenel Lig

Sarere 6 Oktoba, 1984

Taim	Tim	Reperi
Nomads		
9.00	K'yong V Gokata	B.F.C.
10.00	Korion V B.F.C.	Lukam
11.30	Butavi V Lukam	Korion
1.00	Wanama V Q.B.S.	Butavi
2.30	Golo V L'pau	W'aman
4.00	Malon V Nomads	Golo

Sande 7 Oktoba, 1984
Adkol 1

10.00	Gokata V Papane	Siule
11.30	Siule V Musawa	G'kata
1.00	Golo V L'pau	M'awa
2.30	Doka V Movei	L'pau
4.00	Palif V Momase	Doka

Adkol 2

10.00	Dokta V Tara	Lukam
11.30	Lukam V Q.B.S.	Tara
1.00	Tanubada V K'yong	Nomads
2.30	Nomads V Papane	T'bada
4.00	Butavi V Musawa	P'anc

Note: Some teams will have to play twice as we are trying to catch up with the asosiation.

Consort Brothers Holim Lae Lig Yet

Jack Metta
long Lae.

Namba wan ragbi lig klap bilong PNG, Consort Brothers bilong Lae, i winim gen 1984 primiasip long Lae long Sande, long taim ol i autim tiket bilong Ela Magani 34—24.

Samting olsem 10 tausen manmeri i bin lukim dispela gret fainal pilai namel long dispela tupela tim. Kosa bilong Brothers, Peter Bananga i tok, ol pilai bilong em i bin inap long skruim skoa i go moa yet, tasol ol i bin save olsem bai ol win. Na olsem tasol...

i slek daun long pilai bilong ol klostu long pinis bilong gem.

"Mipela i bin pilaim planti gren fainal gem long taim mipela i go insait long pilai "A" gret long 1980, na narapela gren fainal gem i olsem wanpela klap gem.

"Mi ting olsem

mipela i no soim stail bilong mipela stret. Tasol mipela win na em i samting tru." Bananaga i tok.

Kosa bilong Ela Magani, Luxie Metta i tok wanpela tim i mas win narapela i lus long olgeta gem. "Ol lain bilong mi i no pilai olsem mi bin trenim ol. Ol i no go antap na takel. Planti taim Brothers i bin lukim planti hul i stap namel long difens lain bilong mipela na ol i ran i go long dispela hap.

"Tasol mipela i lus long trupela pasin bilong spotmempis. Brothers i bin pilai

gut tru na ol i win. Em i gutpela."

Long taim bilong kik-op, Magani i bin pilai strong tru. Insait long 10 minit tasol, ol i bin kikim wanpela gol na putim wanpela trai.

Tasol Brothers kwiktaim i daunim dispela poin bilong Magani wantaim tripela trai i kam long huka Joshua Lakora, senta Ipe Hineho, na seken rowa, Chris Siriosi. Hapbek John Kapo i kikim tupela gol tasol na Brothers i nilim skoa bilong ol olsem 16 poin i go pas long Magani 6.

Klostu long hap-



• Dispela gren fainal gem namel long risev gret, Magani i lus long Taranga. 18—16. Magani i lus long "A" gret na tu long risev gret.

taim, Magani i kisim wanpela gol moa na winim 8-poin long taim belo i tok long malolo.

Long seken hap Brothers i no bin westim taim, bikipela polanesian fran rowa bilong ol, Iosefa Falaniko i brukim lain bilong Magani na putim trai long namel stret bilong tupela pos. Kapo i kikim gol na Brothers i surik i go antap long 22 poin.

Bihain long dispela, tupela tim ya i ran wantaim long putim trai. Magani i bin skrap tru long apim poin bilong ol. Tasol Brothers tu i bin strong tru long stap long fran. Long taim 5—8 bilong Magani, Karu Noho i go putim trai, winga bilong Brothers, Zachariah Lepali i bekim. Na taim narapela winga bilong Brothers Sam Kaiwari i go putim

wanpela moa trai, senta bilong Ela Magani, Ila Akuru i bekim. Na tu kika bilong tupela tim ya i bin kikim wanwangol na taim belo bilong fultaim i kirap, Brothers long fran wantaim 34 poin na winim Magani husat i stap long 24 poin.

Tok man i mas go long Brothers. Ol i bin pilai olsem wanpela tim. Dispela primiasip em i namba tri taim bilong ol long winim namel long 5-pela yia ol i bin stap insait long "A" gret ragbi lig.

Olgeta lain bilong Brothers i pilai moa, moa yet tasol Ipe Hineho, Benny Allan, Chris Siriosi na John Kapo i go pas long olgeta. Long sait bilong Magani, Paça Mugi, Karu Noho, tupela brata, Vai Veoi Karava na Ila Akuru i pilai hat tru.

Skoa, Brothers 34

J.Lakora. I. Hineho, C.Siriosi, I.Falaniko, Z. Lepali, S.Kavari, Trai, J. Kapo 5 gol.

Long dispela wiken, Brothers bai go antap long Goroka na pilai wantaim Angco Brothers bilong Goroka.

Long Risev gret gren fainal, Tarangau winim Magani, 18—16. Difens winim Morobe Tigers 18—10 long Anda 19, na Royals winim Morobe Tigers 16—14 long Anda 18.

"A" Gret Primiasip

1974 inap 1978: Waraths

1979: Ela Magani
1980: Brothers
1981: West Panthers
1982: Ela Magani
1983: Brothers
1983: Brothers

Brothers tu i holim taitel bilong kembri nesenel klap sempion.



• Consort Brothers i winim Gren Fainal long Lae. Wanpela pilai bilong Brothers, Joe Katsir i soim pawa bilong em long foxcat lain. John Kapo long lephan i bekap tasol sapos Joe i laikim helpim. Brothers win, 34—24.

SOFTBAL DRO

WIK 1 — SANDE 7 OKTOBA, 1984

TAIM	DAIMON 1	REPERI	1.30	YMCAAD V Agogol	R.Meli
9.00	TIM	REPERI	3.00	ESA V Yokomo	A.Girana
	ANGGZ V Uni	R.Ratia	4.30	ZZZZ Karanas	
10.30	Agogol V Mazda	C.Hopkins			
		P.Tonga			
12.00	NissanGZ V BPElcom	J.Pupua			
		R.Tedor			
1.30	B.Iagles V Yokomo	P.Mesak	9.00	B.Eagles V Insur	A.Nemar
		Y.Zaitsu	10.30	ESA V Karanas	N.Pascoe
3.00	Demons V NGI	J.Tokome	12.00	Taubar V NGI	K.Kaumi
		S.Morita			
4.30	Kabiu V Malangan	J.Pidik	1.30	Tarangau V Kabiu	J.Sogat
		M.Tako	3.00	YMCAAD V Aviat	B.Loahin
	DAIMON 3		4.30	Gazelle V Demons	E.Kedek
9.00	SPIA V Manolos	B.Diap			
10.30	BPElcom V B.Eagles	P.Keehan			
		T.Mochida			
12.00	Chebu V Mazda	M.Pupun			
		M.Katsuta			
1.30	NisanGZ V NGI	C.Bais			
		G.Madao			
3.00	Malangan V Kabiu	L.Paivu			
		D.Lager			
4.30	Fuji V YMCAAD	N.Tata			
		A.Hara			

Chebu C grade withdrew from the competition. Executive will decide a team from D grade.

Steward
9.00 T.Apana
10.30 C.Hopkins
12.00 W.Kaputin
13.30 P.Mesak
15.00 S.Betson
16.30 R.Rolly

Skoa bilong
30/9/84

Diamond 1
SPIA 9 Insur 7
Kabiu 15 Mazda 15
Agogol 6 Yokomo 6
Demons 5 B.Eagles 13
BPElcom 4 NGI 5
Nissan 6 AvdevML 5

Diamond 3
B.Eagles 25 Yokomo 7
YMCAAD 5 NGI 12
Fuji 14 Mazda 2
BPElcom 3 AvdevML 3
Nissan 9 Kabiu 2
Chebu 16 B.Eagles 9

Yokomo Salensim Braun Igels

SOFBAL sisen bilong man insait long Mosbi bai go insait long namba tu wik long dispela Sande. Na i gat 5-pela gutpela resis bilong ol "A" gret man bai kamap. Tasol hatpela bilong ol dispela resis bai kamap long taim Yokomo i egensim Braun Igels insait long Daiman 1 long hap pas 1.

Planti sapota bilong sofball pilai insait long Mosbi i klia olsem Jonbili Tokome i go pas long Yokomo tim. Na Yokomo i kamap sempian "B" ret tim long 1983-84 sisen. Na Tokome bai soim strong bilong em na mekim Yokomo i memem Braun Igels.

Yokomo em i nupela tim insait long "A" gret resis. Tasol ol i dro 6-6 wantaim Agogol long las wik na i gat strongpela sans long abrusim Braun Igels nau.

Dispela resis namel long Yokomo na Braun Igels em i namba tri "A" gret pilai insait long Daiman 1.

Namba wan "A" gret pilai long Daiman 1 bai stap namel long Agogol na Mazda Kaps. William Kaputin bilong Agogol bai egensim Michael Kalas bilong Mazda Kaps. Dispela tupela tim i dro wantaim birua bilong ol long las wik. Na tim husat i tingting gut na pilai bai win. Tasol i luk olsem lain bilong Kaputin bai abrusim Mazda Kaps.

Elkom bai salensim Gasel insait long namba tu pilai long 12 klok apinun. Elkom i bin lus 5—4 long NGI long las wik na i mas bekim dinau. Sapos ol i no bungim tingting na pilai stret, em bai ol sup stret long Gasel. Na bihain long namba tri resis namel long Yokomo na Braun Igels bai gat narapela hatpela sofball pait i kamap namel long Demons na NGI long 3 klok apinun.

Pitsa bilong Demons, Patrick Kila wantaim Boe Lahui, Dave Martin na Tau Apana i luksave long asua ol i mekim long las wik. Ol bai stiaim tim bilong ol na tekewe tiket bilong NGI. Ol pilai bilong NGI i laki tru na i abrusim Elkom 5—4 long las wik. Tasol ol i mas lukaut long Demons.

Ragbi yunion gren fainal

Sarere Oktoba 6 1984 bai i narapela bikpela de bilong pilai Ragbi Yunion insait long Mosbi.

Gren fainal bilong dispela yia bai kamap long dispela de, na long lukluk bilong planti pipel, nogat wanpela strongpela gem olsem i bin kamap bipo.

Gren fainal bilong dispela yia bai kamap long dispela de, na long lukluk bilong planti pipel, nogat wanpela strongpela gem olsem i bin kamap bipo.

Tupela strongpela tim tru bilong Mosbi, Waliya ol long bun bilong Daru na Medics ol dokta long Taurama bai pait long painimaut husat tru i mas kamap king bilong Ragbi Yunion long 1984.

Waliya i gat planti man bilong ran spit tru.

Wanpela gutpela samting long dispela tim em olsem ol i bin pilai gut tru long dispela yia na winim planti strongpela tim bilong bipo olsem Difens, Yunivesiti na Bratas. Dispela i mekim ol i kamap maina primia bilong dispela yia.

Tasol insait long Medics tim i gat planti yangpela na bikpela pilaia. I gat tupela o tripela bikpela Tonga na sampela Samoans i mekim fowat lain bilong Medics i hevi olgeta. Ol dispela lain i ken winim planti bal bilong Medics.

I gat planti as long Medics i mas winim 1984 gren fainal. Ol i bin go long gren fainal las yia tasol ol i lus nogut long Difens.

Las Sarere Medics i bekim dinau bilong em taim ol winim gut Difens 18-6 in-

sait long meja semi fainal na stapim ol soldia long kam pait insait long dispela gren fainal.

Em i no isi long wanpela tim i skoaim kain poin olsem egensim Difens, Medics i brukim dispela posin pinis olsem na Waliya bai i gat wanem?

Bikpela fowat bilong Medics, Hemaloto, i kam bek pinis long Tonga na i luk olsem Medics bai kism Siale Akuo'ola i kam long Lae long strongim moa fowat lain bilong ol. Fowat lain bilong Medics tasol i bin mekim na Medics i go insait long gren fainal nau.

Beklain bilong Medics i stat long pilai stret insait long las tu wiks na sapos John Milan na Michael Mai i pilai gut wantaim Waliya bai nogat sans long winim 1984 gren fainal.

Sofbal i stat tru

MOSBI sofbal bilong ol meri bai stat long dispela wiken, Sarere 6, Oktoba. Tasol dispela em pri-sisen tasol we il bai glasim ol tim na putim ol long ol gret. Ol i stat bihain tumas long ol man long wanem i gat ol hevi long stretim ileksen long ol nupela bosmeri bilong Asosiesen.

Pauline Laki

Las wiken, Sarere 29, Septemba, Asosiesen bos na memba i kibung long makim ol nupela bos.

Dispela de yet ol meri i makim Mis Rose Kekedo olsem Pre-

siden long namba tu taim gen. Mis Kekedo bai holim dispela wok inap 2-pela yia.

Namba tu Presiden em Misis Mary Karo. Hatpela wok bilong lukautim mani bilong Asosiesen em Nancy Kamara i holim. Na Debbie Raymond i

seketeri.

Dispela ol memba i stap long Menesman: Ruth Tokome, Veitu Rumery, Molly Pouru, Sandy Kila, Anne Kerepia na Albert Karo. Olgeta i holim 2 yia kontrak. Tasol Albert tasol bai i stap wanpela yia tasol.

Na Pablisiti Opisa bilong Asosiesen em olgeta yet i makim gen Karl Hopkins.

Dispela sisen i gat sampela moa nupela tim i kam insait long Asosiesen. Dispela i mekim Asosiesen i tingting long tupela nupela Daimon 3 na 4 bai ol i stretim gut graun gen.

Las sisen ol meri i no yusim Diamon 4. Dispela graun i stap klostu long netbal graun.

POIN LATA

MOSBI SOKA POIN LATA

Primia

(bihain long wik 18)

TIM	G	W	D	L	F	A	P	Bornd	17	9	6	2	32	21	24
Guria	18	12	4	2	57	13	28	B.Kumul	17	11	1	5	43	20	23
Yuni	18	11	4	3	47	17	26	K'Kada	17	8	7	2	36	20	23
Rapatona	18	10	4	4	40	26	24	PNGDF	17	5	7	5	38	26	17
GFC	18	9	3	6	30	36	21	Guria	16	5	3	8	30	36	13
T'gau	18	8	2	8	21	37	18	Sunam	15	5	3	7	23	24	13
PNGDF	18	7	2	9	34	34	16	KE Isuzu	17	4	4	9	24	46	12
Sunam	18	6	3	9	32	38	15	Bunbun	17	2	5	10	20	43	9
B.Kumul	17	5	4	8	24	44	14	Batu	17	2	4	11	20	56	8
Kunta	18	5	2	11	21	44	12	Kwasis	16	2	3	11	19	42	7
Mopi	17	2	—	15	30	52	04								

3rd Divisen (Wik 17)

Togelu	17	12	4	1	41	16	28	Pailou	16	2	—	4	41	12	24
Baba	17	11	3	3	44	18	25	Buresong	15	8	5	2	35	13	21
								YMCA	16	7	6	3	29	23	20

I go moa long pes 4

Meri soka i paul

Soka gem bilong ol meri long Mosbi i wok long bagarap tru nau. I no bikos ol meri i no save long kism bal. Tasol, bikos ol wok bilong etministres i no ran gut tumas. Ol lain manmeri husat i save go lukluk long pilai bilong ol meri (i no planti manmeri) i ken tokaut olsem dispela toktok i tru.

Pilai bilong ol meri i nogut tru long dispela sisen na tupela meri kondineta bilong Wimens "A" na "B" gret, Kelsi Omoi na Jean Norrie i tokaut pinis olsem tupela i no save kism helpim i kam long PMSA (Mosbi Soka Asosiesen) long ranim gem bilong ol meri. Olsem na tupela i tingting long lusim dispela wok kodineta.

Na sapos ol i lusim dispela wok, husat bai lukautim ol dro na kain samting olsem long tim bilong ol meri? Sapos dispela belhevi i kamap, meri soka long Mosbi bai pundaun olgeta.

Wanpela mausman bilong ol meri soka long Mosbi i tok long las wik Sande, "PMSA i no givim sapot moa long ol meri soka. PMSA i no soim laik long ranim ol pilai bilong ol meri. Tasol ol meri i traim hat yet long pilai na ol i kism sapot i kam long boipren na man bilong ol tasol. Olsem na dispela i bilip olsem etministres bilong soka i no gat bikpela laik long promotim meri soka."

Soka bilong ol meri i ran gut tru long las sisen. Long dispela taim ol meri pilaia i gat asosiesen bilong ol yet na ol yet i gat etministresen dipatmen bilong ol. I gat manmeri long eksekutiv bot bilong ol meri

husat i bin wok hat long promotim soka. Olsem na long dispela taim, meri soka long Mosbi i gat nem.

Long dispela sisen, PMSA i lukautim olgeta pilai bilong ol man na meri tu, na wok i go hat liklik. Nupela seketeri bilong PMSA, William Wi i go insait long opis tupela mun i go pinis na em i traim yet long painim gutpela rot long ranim wok bilong em.

Em i laik wok gut wantaim tupela wimens soka kodineta, tasol tupela meri kodineta tu i painim hat long wok gut wantaim PMSA bikos ol i pilim olsem PMSA i no gat laik long ranim soka gem bilong ol meri. Dispela tok i kam long wanpela mausman bilong ol meri.

Dispela sotpela sisen bilong ol meri long "A" divisen i pinis nau na ol "B" gret tasol i pait yet long pinisim namba tu raun bilong ol. Bai ol i pilaim nokaut gem long tupela wik bihain.

Las wiken, pilai bilong ol "B" gret meri i paul nabaut, na tupela bilong ol 9-pela tim long "B" gret tasol i pilai. Dispela tupela tim em Mopi na GFC.

Ol meri Stone Axe, Wanama, Blu Kumul, Gaima na Tarangau i lusim ples pilai bikos ol i no amamas long dro bilong las wiken gem.

Ol Stone Axe i no laik pilaim Wanama bikos ol i bin bung pinis long dispela las raun. Stone Axe i no laik resis wantaim Tarangau bikos tupela tim i pilai wantaim pinis i go longtim bipo. Dro i paul na ol pilaia i bruk lusim Konedobu Pilai Graun.


Meri "B" Poin Lata

Waliya 28, Mopi 26, B.Kumuls 19, GFC 16, Stone Axe 11, Gaima 11, Wanama 9, YMCA 9 na Tarangau 6.

Dro bilong Sande 7/10/84

Mopi Vs B.Kumuls, GFC Vs Tarangau, Waliya Vs Stone Axe, Wanama Vs Gaima. Bye YMCA.

HEALTH and FITNESS!



We stock a complete range of health foods, vitamins and minerals to give your health vitality essential for a healthy, better life.

CALL INTO ONE OF OUR SHOPS



JOHNSTON'S PHARMACIES

CARING FOR ALL THE FAMILY

Basketbal Sempionsip Pundaun

1984 Hailans Basketball Sempionsip long Goro long independe wiken i pundaun olgeta. Dispela toktok i kam long wanpela opisa bilong Goroka Basketball Asosiesen bihain tasol long ol independens gem i makim pinis bilong 1984 sisen.

Maureen Mopio long Goroka.

Mista Andrew Columbus, namba tu presiden bilong Goroka Basketball Aso-

siesen i tok, "Dispela Hailans Basketball Sempionsip i no kamap gut. Ol lain bilong oganaisim dispela sempionsip i no bin tingting long mekim ol pilai i amamas long taim ol pilai long Goroka."

Mista Columbus i tok, 1984 Hailans Basketball Sempionsip. I no gat prais bilong ol tim husat i win long semi na gren fainal gem. Moa yet, i no gat kibung i kamap namel long ol opisa bilong Hailans Basketball Asosiesen long stretim program

bilong dispela sempionsip long mekim em i de bilong ol pilai i ken amamas liklik.

Ol opisa bilong Kainantu, Goroka, Hagen, Mendi, Simbu, Minj na Banz i no toktok gut na mekim dro bilong wiken pilai. Olsem na ol pilai i stat long eni taim ol pilai i kamap long basketbal kot. Dispela kain stail program i kamap long ol nokaut gem tu. Mista Columbus i tok.

Ol nokaut gem i bin kamap long Spot Institut long Goroka.

Long pilai bilong ol meri, Kainantu, Simbu, Goroka 1 na 2 wantaim Hagen tim 1 na 2 i bin pilai long painim tupela gren fainal tim.

Long ol man, tupela tim bilong ol man long pilai long gren fainal em Hagen 1 na Goroka 1. Gren fainal tim bilong ol meri em Simbu na Goroka 1. Ol dispela tim i no bin pilai long gren fainal bikos kain kain kros i kamap na ol pilai i lusim pilai, namel yet long gren fainal, na i kam ausait long ples pilai. Gren fainal pilai

i kamap long Mande Septemba 17.

Mista Eka, man husat i go pas long Hailans Basketball Sempionsip i tok, Basketball gren fainal i no kamap bikos, Tony Lavapo bilong Hagen husat i wanpela bikman long oganaisim dispela sempionsip i no gat bikpela laik long wok bung wantaim em.

Tasol Volibal Sempionsip long Goroka i bin kamap gut tru. Presiden bilong Volibal Federesen, Kenel David Josiah i tok, "Mi gat bikpela

amamas long ol oganaisim bilong dispela independens volibal sempionsip."

Long dispela sempionsip, 7-pela asosiesen olgeta i bin kamap long volibal sempionsip. Tim bilong ol man i kam long, Mosbi, Lae, Ramu, Wewak, Goroka, Yonki, na Bereina. Tim bilong ol meri i kam long Lae, Mosbi, Wewak, Yonki, Goroka na Bereina.

Kenel Josiah i tok olsem em i amamas tru long lukim ol yangpela manmeri

bilong Bereina i kamap long dispela sempionsip.

Haus Bilas i bikpela sponsa long dispela sempionsip. Haus Bilas i givim wanpela bikpela tropi long tim husat i kamap namba wan ples long volibal sempionsip, long ol man na meri wantaim.

Volibal spot em i wok long kamap strong tru nau long PNG.

Long neks yia, 1985, volibal sempionsip bai kamap long Wewak.

VANIMO; BASKETBAL GREN FAINAL DRO

Trinde nait, 10 Oktoba 7 klok

Ol Man:

A gret: Waramo V Tarakum
B gret: Waramo Ruts V Sandaun

Ol meri:

A gret: Waramo V Yunaitet
B gret: Waramo V Mediks

VANIMO VOLIBAL SKOA

OL MERI OL MAN

Wutung Yut (1) 2 Lido NGI 2 Lido fofiet (2) 0
Endeavours (2) - Yuna- Guria 2 Woks fofiet
itet: fofiet Sandaun 0 Yako (1) 2
Royals (1) 2 BCB: fofiet Guria (2) 2 Koswatsas: fofiet
Waromo 2 Guria 1 fofiet
Lido (1) 2 Royals (1) 1 Yako (2) 2 Royals (2) fofiet
Nalu 2 Yako 1 fofiet
Falkan 0 Wutung (1) 2 Waramo 0 Lido 0 (tupela wantaim fofiet).

POIN LATA

VANIMO VOLIBAL

OL MAN

1. Guria (2) 24
2. Yako (2) na Yako (3) 22
3. NGI 19
4. Yako (1) 18
5. Guria (1) 17
6. Waramo 16
7. Royals (2) 13
8. Koswatsas na Sandaun 11
9. Woks 10
10. Lido (1) na Lido 2 9

OL MERI

1. Wutung Yut (1) Falkans, Yako na Nalu olgeta i gat 24 points 23
2. Wutung Yut (2) 19
3. Waromo (1) 19
4. Guria na Endeavours 18
5. Lido (1) 17
6. Yunaitet 16
7. Lido (2) 15
8. BCB 12
9. Royals 11

Dai bihain long trening



• Newby Pius

WANPELA man bilong Manus i bin dai kwiktai bihain long wanpela soka praktis long Panguna long Septemba 11.

Man ya em Newby Pius bilong Lorengau, long Manus Provins. Newby i bin pinisim stadi bilong em long Sivil Enjiniaring, long Yunivesiti ov Teknoloji long 1982 na i go wok long Panguna.

Em i bin pundaun tasol bihain long wanpela soka praktis na em i dai olgeta. Ol i kisim bodi bilong em i go bek long Manus na planim.



• Basketball sempionsip long Goroka taim Hagen i pilaim Simbu long nokaut gem. Namba 4 bilong Hagen Romena i blokim Elizabeth long skoa. Piksa Maureen Mopio.

Ol netbal sta bilong Sandaun

Nalu i kamap Vanimo netbal kwin gen, taim ol skelim gut tru na daunim pawa bilong Yunaitet 14-10 long Sandaun netbal gren fainal las wiken.

Ari Haba

Dispela em i namba tu taim Nalu i karim taitel ya. Las yia em i namba wan taim tru long ol i holim dispela namba olsem Kwin bilong Vanimo netbal.

Moa long 100 pipel bilong dispela boda taun i bin lukim dispela gren fainal. Tupela tim wantaim, Yunaitet na Nalu, i pilai strong tru long namba wan hap. Klostu 5 minit samting i stap long hap taim. Na Yunaitet i pulmapim 4-pela gol. Dispela i mekim Nalu i gat 8 na Yunaitet 4.

Tasol bihain long hap taim Nalu i no wet moa.

Ol i laik winim dispela pilai na i wok long mekim save long wilwilim Yunaitet. Gol suta Mary Tobudi bilong Yunaitet husat i bin kisim namba "Most Improved" gol suta, i no abrusim net long taim em pulmapim bal i go daun long ring.

Vanimo haiskul i sanap long namba 3 ples. I bin gat 8-pela tim olgeta i statim dispela netbal sisen bilong ol meri long mun Epril.

Bihain long gren fainal i pinis. Presiden, Misis Viola Iakata i amamasim tupela tim, wantaim na i givim ol prais long ol pilai i holim namba insait long dispela sisen.

Em i bin kisim ful sapot tru i kam long sista bilong em yet Racheal Tobudi, Kori Paul, na Veronica Ikidi. Dispela 3-pela meri i bin apim tru nem bilong Yunaitet long wanem ol i smat long swingim bal hariap i go, i kam. Ol i bin pilai long senta na wing difens na wing atek.

Strong bilong ol i bin

brukim banis bilong Elizabeth Toue, Lucy Pumeru, Margaret Buri husat i no popaia long netim al. Nalu i bin tu-gut na Yunaitet i no inap long ketsap long standed bilong Nalu.

"Best na Fairest" prais i bin go long Kori Maraka bilong Yunaitet. Na yangpela, Sepik ya, "Blut Makau" Margaret Uri i kisim namba tu prais "Rana-ap".

"Most Improved" prais i bin go long Racheal Tobudi bilong Yunaitet. Na "Most Konsisten," prais i bin go long Veronica Ekima i karim dispela namba. Em i bilong Vanimo Haiskul.

Leonie Felix bilong Bismark i kisim namba tu prais i go long haus.

"Most Improved" gol suta em Mary Tobudi. Vanimo netbal sisen i bin pinis olsem las wiken. Na Presiden Viola i singaut long moa meri i kamap wantaim moa netbal tim neks yia long mun Epril gen.

POIN LATA

i kam long pes 3

Gomba	16	7	6	3	22	16	20
Kunta	15	9	1	5	30	11	19
K'mani	15	8	3	4	29	15	19
Kaira Bros	16	7	3	6	35	21	17
Sulen	15	4	2	9	17	29	10
STC	15	2	5	8	13	23	9
Mopi	15	3	2	10	13	38	8
V.RFC	16	—	3	13	6	60	3

1st Divisen

Wanzesi	18	15	1	2	69	24	31
Murat	17	12	1	4	40	23	25
Waliya	16	6	6	4	37	32	22
K'wina	15	9	3	3	34	21	21
Wespac	17	6	7	4	34	20	19
Sobou	17	6	5	6	42	39	19
L.Yuts	17	7	5	7	38	30	17
Kula	17	7	2	6	30	37	16
GFC	16	4	4	6	32	41	12
ANG	18	4	4	10	26	44	12
Watani	15	1	3	11	14	42	5
Maegin	17	1	1	15	29	69	3




FORESTS (5)

Last month in Forests you learnt about Forest conservation and an idea about the saving of forests. This month we will look at two more other ideas on the saving of forests.



FOREST CONSERVATION SOME DIFFERENT IDEAS ABOUT THE SAVING OF FORESTS

1. HELP FROM LANDOWNERS
2. DON'T BURN THE GRASS

DON'T BURN THE GRASS
DON'T BURN THE GRASS
DON'T BURN THE GRASS



People who burn the grass are killing the living things in the soil. If you look around you, you will see more of the living things that would die in a grass fire.



DON'T BURN THE GRASS

Don't burn the grass
Fire kills animals
Fire kills insects
Fire kills plants
Fire kills trees
Fire kills birds
Don't burn the grass

Grassland is hot
Grassland gets dry
Hot dry land will bring little rain
Rain can't come if the air is too hot and dry
Grassland is hot
Burnt land is black hot in the sun
Not much rain will fall on hot burnt land
Don't burn the grass

Fire kills seeds, seeds in the soil
Seeds won't grow, plants won't grow
Fire kills plant food, plant food in the soil
Fire makes soil dry
Graun i nogat gris moa
Fire makes soil poor
Don't burn the grass

Fire makes smoke
Smoke goes in the air
Smoke goes up from earth
Smoke takes good things out from the ground
Smoke takes good things out from the plants
Good things go away into the air
No more good things left in the soil
No more good things left for the plants
Don't burn the grass

DON'T BURN THE GRASS.

3. FOREST POLICY POLICY = RULES, GUIDELINES

Man can be a friend to the trees... if he is, he will always have them around in the future.

4. Natural resources and environment.

We declare our fourth goal to be for Papua New Guinea's natural resources and environment to be conserved and used for the collective benefit of us all, and be replenished for the benefit of future generations.

WE ACCORDINGLY CALL FOR:—

- (1) wise use to be made of natural resources and the environment in and on the land or seabed, in the sea, under the land, and in the air, in the interests of our development and in trust for future generations; and
- (2) the conservation and replenishment for the benefit of ourselves and posterity, of the environment and its sacred, scenic, and historical qualities; and
- (3) all necessary steps to be taken to give adequate protection to our valued birds, animals, fish, insects, plants and trees.

COLD POWER "DISHING FOR KINA" RESIS

**WINIM
K3,500**

**Cold
Power**
LAUNDRY DETERGENT

Yu ken winim planti kina i pulap long dis

- * Namba wan prais em K500
- * I gat 10-pela prais bilong K100
- * 200 prais bilong K10

Yu mas katim piksa i stap long baksait bilong ol 200 gram o 500 gram Cold Power paket. Raitim nem na adres bilong yu long dispela fom i stap daunbilo na salim wantaim piksa bilong Cold Power paket i kam long laki dro. Yu ken salim planti piksa na fom i kam na bai yu gat planti sans long winim ol kina i pulap long dis.

TINGIM GUT, olsem yu mas salim wan wan fom na piks insait long skin pas na salim i kam. Skin pas i mas i gat fom na piksa em yu bin katimaut long baksait bilong ol 200 gram o 500 gram paket bilong Cold Power.

COLD POWER I KEN MEKIM OL SAMTING I KLIN TRU NA NAU EM I TAIM BILONG YU LONG TRAIM NA WINIM OL KINA I PULAP LONG DIS!

Nem Bilong Yu:
Adres:
Telepon:

Yu mas putim ansa bilong dispela liklik askim: Hamas dis olgeta i stap insait long piksa long baksait bilong ol 200 gram o 500 gram paket bilong Cold Power?

Ansa:

Nau, yu mas katim piksa long paket bilong Cold Power na salim wantaim fom i go long:
**Cold Power "Dishing for Kina" Resis,
Praitvet Mail Bag, Mosbi.**

De bilong salim ol fom bai pinis long Fraide, 12 Oktoba, 1984. Nem bilong ol wina bai kamap long Pos Kuria Niuspepa long Tunde, 23 Oktoba, 1984.

Ol wokmanmeri bilong Colgate-Palmolive (PNC) i no ken stap insait long dispela resis.

Provinsal gavman long PNG

taim bilong senisim kain pasin bilong plis bilong yumi bai ol pipel i no ken ting moa olsem ol plis i bilong narapela hap na i wok long go egensim yumi.

Insait long plis fos tu, yu ken lukim olsem ol opisa no save wok longpela taim long wanpela hap. Ol i save trense hariap hariap na wok bilong ol i save senis klostu klostu. Yu no inap lukim wanpela opisa i mekim wanpela wok tasol na winim l yia long wok ya.

Long taim ol plisman i muv kwiktaim tumas dispela i min olsem ol i mas tekewe pikinini bilong ol long nupela skol klostu klostu. Natu ol i no bin gat longpela taim long mekim pren gut wantaim ol pipel insait long komyniti. Sampela plisman i gat ol pikinini husat i wok tu tasol ol i slip na muv wantaim papa. Ol dispela kain liklik samting tasol inap bagarapim wok bilong plis, long wanem sapos famili bilong plisman i no amamas plisman tu bai no inap amamas tumas na mekim gut wok.

Nau sapos wanpela plisman i mekim rong ol bos bilong em yet i save givim em strongpela mekim save. Ol i ken rausim em tu, sampela taim. Tasol dispela i no inap. Ol plisman husat i mekim rong i mas go long kot olsem ol man nating.

LOK AP LONG BUS

Plantu man i bin kros taim gavman i pasim ples we plis i save lokim ol rong man insait long ol aut stesin. Ol provinsal edministreta, nesanel na provinsal politisen i bin kros taim gavman i mekim dis-

pela, long wanem ol i bilip olsem ol man husat i mekim liklik rong tasol i mas stap bek long eria bilong ol na mekim sampela wok long helpim gen komyniti. Ol wantok bilong dispela man bai lainim wanpela samting tolong dispela kain kalabus.

Sapos yu lukluk long ol haus kalabus insait long Papua Niugini bai yu inap lukim olsem plantu haus kalabus insait long ol narapela kantri i winim bilong dispela kantri. Dispela em long wanem i no gat inap man long mekim dispela wok long hia. Na tu ol man bilong ranim gut tren long lukautim haus kalabus i no save wari olgeta taim long wanem ol yet i no inap saplaim samting em ol i laikim. Ol i save long wanem samting i sot. Tasol ol yet i no inap saplaim dispela samting.

Mipela i kirap nogut olsem maski taim wok i no ran stret long ol haus kalabus i no gat plantu trabel tumas i kamap. Sapos i gat kain hevi olsem insait long ol haus kalabus long r rapela kantri bikpela trabel moa save kamap.

Olsem na kabinet i mas stat long raitim wanpela lo kiwktaim nau long stapim olgeta viles, distrik na nesanel kot long kalabusim husat man o meri gat krismas aninit long 16.

Provinsal gavman bai stap olsem wanem bihain? Dispela kain askim bilong Nesanel gavman bai bungim wan wan manmeri liklik taim bihain.

Las wik Kabinet i bin tok orait long holim wanpela refarendum bilong painim wanem tingting ol pipel i gat long provinsal gavman.

Long taim Praim Minista, Michael Somare, i tokaut long tingting bilong gavman bilong em, em i tok, "Pipel bilong dispela kantri i givim pawa long mipela long ranim dispela kantri. Tasol nau bai mipela i givim dispela strong i go bek long pipel na larim ol yet i tokaut long tingting bilong ol long provinsal gavman sistem em yumi gat nau."

Provinsal gavman i bin stat long taim sampela provins i laik bruk lusim olgeta arapela provins na kamapim kantri bilong ol yet.

I bin gat wanpela moa samting i mekim na gavman i bihinim tasol tingting bilong Pater John Momis long kirapim provinsal gavman. I no gutpela long kolim Papua Niugini olsem wanpela demokratik kantri tasol ol pipel bilong en long gras rut level i no gat sans bosim wok bilong ol yet.

Olsem na Haus ov Asembli i sanapim pos bilong provinsal gavman insait long ogenik lo na not Solomons i kamap namba wan provins long traime dispela nupela kain gavman.

Nau, 9-pela yia tasol bihain long Papua Niugini i kisim independens Nesanel gavman, aninit long Pangu Pati na Michael Somare yet, i gat tupela tingting gen.


Plantu pipel i wok long komplek long wok bilong provinsal gavman bilong ol na sampela memba bilong nesanel palamen tu i joinim ol dispela pipel na komplek.

Sampela Nesanel politisen i lukim olsem ol i no gat wok moa long mekim Primia i bosim pipel bilong ol long ples na samting i no save isi tu sapos primia na nesanel memba i no bilong wanpela politikal pati.

Long taim Iambakey Okuk i wok olsem Deputi Praim Minista long 1981, em i bin tokim ol studen long Yunivesiti olsem em i no laikim provinsal gavman. Long wanem Papua Niugini i wok long lusim mani long baim ol man husat i mekim wantaim wok em ol nesanel politisen ken mekim.

Dispela yia tasol wanpela memba, Mista Paul Wanzik, i bin askim wanlain bilong em insait long nupela haus palamen long rausim olgeta provinsal gavman na bringim bek lokal gavman kaunsil. Em i tok bipo taim provinsal gavman i stap yet plantu gutpela wok i save kamap.

Nesanel gavman i rausim tupela nesanel gavman pinis long dispela yia. Em i rausim Enga Provinsal gavman long Februari na tupela wik i go pinis Manus i bihainim Enga i go aut.



• John Nilkare:

Enga na Manus i mekim wankain rong olsem na Nesanel Gavman i autim tupela. Tupela i no bin yusim gut mani bilong ol. Tingting bilong nesanel gavman long holim refarendum i kamap long taim plantu provinsal i stat long baim nupela eksekutiv ka bilong ol.

Long seim taim tu plantu primia na provinsal na nesanel minista i wok long raun i go long ol ovasis kantri olsem Japan na Amerika na Australia.

Dispela kantri i gat 3 na hap milion pipel tasol. Na i gat 109 nesanel politisen na moa long 400 provinsal politisen long lidim dispela 3 milion pipel.

Gavman i mas baim ol dispela memba gut winim ol man nating i wok long pablik sevis na kampani. Ol dispela kain man i ken raun i go long wan wanem hap long laik bilong ol. Ol mas gat gutpela haus na ka bilong raun insait long en. Sapos i no gat dispela haus na ka bilong raun insait long en. Sapos i no


gat dispela kain laip ol lida bilong Papua Niugini i save komplek nogut tru. Sampela minista insait long provinsal gavman i bin risain long taim ol painim olsem gavman bilong ol i no inap larim ol long yusim dispela kain sevis.

Nau nesanel gavman i laik lusim dispela hevi i kam long han bilong wan wan man na meri bilong Papua Niugini. Yu ting yumi mas gat provinsal gavman yet o maski?

Long taim lain bilong Michael Somare i bringim provinsal gavman i kam insait long ol i no bin askim pipel tu. Na sapos ol i bin askim tu bai ol i no inap kisim gutpela ansa tu long wanem plantu pipel bilong Papua Niugini i no save gut long rot bilong holim pawa. Nau olgeta provinsal lida em ol bikman, ol i no wankain olsem ol grass rut pipel.

Dispela i mekim na ol pipel bai wok hat long sevim plantu lida long bihain. Ol lida i no luk olsem ol ilaik sevim pipel moa.

Moa neks wik



• Iambakey Okuk

DISKAUNT MAKET NA MOSBI FENITSA HAUS KENNEDY ROT, GORDONS

Kam na lukim kain kain samting i gat diskaun prais insait long bakstua bilong mipela nau.

I gat klos, silika na koten laplap, su, hanbek, switkes, kaving, basket, samting bilong haus-kuk, kain kain tuls, matres, pilo, samting bilong ol liklik pikinini i pilai long en, wilwil bilong ol pikinini i pilai long en, wilwil bilong ol pikinini, wilsia bilong ol bebi, ol kanda samting na plantu kain tebol, bet na arapela samting yu gat laik long en.



ROYAL PAPUA NIUGINI KONSTABULARI

TAIM BILONG KISIM BEK OL GAN

NESENEL KAPITAL DISTRIK WESTEN HAILANS ISTEN HAILANS SIMBU ENGA MOROBE

Sapos yu stap insait long dispela Provins i gat nem antap na yu gat sampela kain sotgan i no gat laisens bilong en, yu harim dispela tok save gut. Yu mas kisim ol dispela sotgan i no gat laisens na givim i go long plis stesin i stap long hap bilong yu, namel long 20 Oktoba na 20 Desemba, 1984. Bai yu no gat kot, sapos yu bihainim dispela tok save insait long dispela taim ol i makim long en.

Sapos 20 de bilong Desemba i pinis na ol i painimaut olsem yu gat sotgan, em bai plisman i holim pasim yu na kotim yu.

Insait long mekim save bilong dispela asua, em bai yu bai kot long K400. Sapos no gat, bai yu kalabus long 4-pela mun.

Sapos yu stap insait long Westen Hailans, Isten Hailans, Simbu, Enga o Morobe Provins na yu brukim lo i tambulim ol manmeri long lukautim sotgan, bai yu baim kot long K600. Sapos no gat, bai yu kalabus long 6-pela mun.

Em i gutpela long holim pasim sotgan o nogat? — No gat ya —

Givim i go long plis nau!

TOK SAVE I KAM LONG: D. TASON KOMISINA BILONG PLIS

KOPI PRAIS

KOPI	
Gret	
Y - K2.15	Inap K2.50
X - K2.22	Inap K2.40
A - K2.30	Inap K2.50
Robusta	— K2.00 - K2.05
Kalnantu	— K1.60 - K1.63
Goroka	— K1.50 - K1.64
Kundilawa	— K1.55 -
Minj/Banz	— K1.40 - K1.56
Maun Hagen	— K1.38 - K1.68
Wapenamanda - Lae	— Arabic- K1.40 - K1.50
Robusta	— K1.20 -
Wewak Robusta	— K1.00
Madang Arabic	— K1.00
Robusta	— K1.00

SUS Kina

September 21 633.50 588.92

22	650.00	609.58
23	683.00	636.53
24	667.50	622.32
25	667.00	625.23

ELA MOTORS

USED VEHICLES

Aninit long K2,000

Toyota Hi-Ace Bus White 15 seater, goes well, popular bus.
Nissan C20 Van White, 1 owner, good tyres, popular delivery van.
Subaru 600 White sedan 2 door, good cond., 1 owner.
Toyota Corolla Orange wagon, goes well, good tyres.
Mazda 808 Blue wagon, manual nice interior.

Aninit long K3,000

Nissan C20 White bus, 1 owner, very reliable unit, reg till 85.
Mazda 323 Beige manual, sedan, nice interior, radio, good tyres.
Datsun 120Y White, low mileage, make a reasonable offer, radio.
Toyota 1000 White ute, popular unit, good cond.
Ford 1600 White ute, reg till May 85, nice cond.
Mazda 929 Yellow sedan, very good cond., extra popular, Auto air/c. stereo.
Suzuki 800 White sedan, 1 owner, low mileage, reg till 85.
Toyota Hilux Green ute, full reg, low mileage, very popular unit.
Toyota Landcruiser Black, short wheel base hardtop, make a reasonable offer.
Toyota Corolla Blue, station wagon, reg till 85, good cond.

Aninit long K4,000

Subaru 1600 Beige utility, good tyres, 1 owner, excellent cond. 2 years old.
Mazda 929L White 4 door, air, radio, good condition.
Mazda 929L Red, auto, air, radio, nice interior, very handy.
Datsun 180B White, wagon, nice black interior, good tyres, reg March 85, air, radio.
Toyota Starlet Green, 1 owner, nice condition, very popular unit.
Mitsubishi Galant Red, manual 4 door sedan, with air, radio, goes well, make reasonable offer.
Toyota Corona Liftback White, manual, fully reg, good cond.
Mitsubishi L200 Red ute, good clean unit and popular.
Mitsubishi Sigma White 4 door sedan, auto, air, low mileage.
Suzuki SJ410 Blue hardtop 4WD, good cond, low mileage, full reg.

Aninit long K5,000

Toyota Cressida White sedan, manual with air, c/stereo, radio, nice beige interior, very popular unit, the only one in stock.
Toyota Hilux 4WD Blue, double cab, new tyres, 1 owner, popular unit.
Toyota Landcruiser Orange 4WD pick up, goes well, reg till June '85.
Datsun Laurel Bronze, 4 door

sedan auto, air, c/stereo, good cond.
Daihatsu Charade Red, manual, air, radio, 1 owner, any reasonable offer.
Toyota Hilux 4WD Yellow pick up, good cond, very popular.

TOYOTA SPESEL BILONG MIPELA

Toyota Corolla 1984 model, 4 door liftback manual with air, c/stereo, radio and more options, 4 months old, showroom cond, blue colour.
Toyota Hilux 4WD Green, single cab pickup, 4 months old, new 1984 models, 12,000 km, very popular units.
Toyota Corona 1983 Deluxe model, Ex demo, green, auto with air, c/stereo, radio etc. New tyres, low mileage, scotch tint. Excellent cond.
Toyota Corona 1983 Deluxe model, silver, manual, air c/stereo, radio etc, 1 owner, low mileage, nice beige interior.
Toyota Cressida Maroon, manual sedan with air, c/stereo, radio, low mileage, superb cond.



Moa long 120 ka!
Kain kain ka inap long
poket bilong yu

Salim ka bilong yu long mipela. Top pe long ol ka i no ran
planti kilomita tuma. Starlet, Hilux, o Cruiser pickup.

Nau em i taim bilong toktok wantaim
mipela long kisim wanpela nupela TOYOTA.

**ELA MOTORS
USED CARS**

OP MON - FRI 8 AM - 5 PM
SARERE 8 AM - 12 PM

PHONE 217036 EXT 412, 413




Stretim ol strit lait

Dia Edita — Long 4-pela yia olgeta nau mi stap long Lae na misave wokabaut long ol dispela rot, 2 mail, i go Wes Taraka setelman, na Taraka setelman.

Olgeta taim mi painim i gat laik long Is, Wes Taraka. Tasol long 2 mail i no gat wanpela strit lait i stap insait long ol dispela 4-pela yia. Long wanem ol spakman i save raun na brukim ol balp. OI save tromoi ston antap na brukim ol balp.

Dispela i mekim Elcom i save westim taim na mani long putim gen nupela balp. Wanem taim tru ai ol pipel i yusim gut het bilong ol. Olgeta taim ol i bagarapim ol samting bilong lukautim wokabaut bilong publik long nait na san tu.

Narapela samting long 2 mail i gat planti dripman na pasindia i stap nabaut na pulap long ol haus bilong ol wantok. Em i taim nau long komiti long 2 mail long no ken slip. Ol i mas smat. Na komiti mas sekap long ol blok haus long 2 mail na ripot long Provinsal Gavman.



Ol 2 mail setelman komiti i mas smat long helpim ol pipel. Ol komiti memba em mausman bilong ol. Long wanem komiti i sanap long bringim kain hevi olsem i go long siti kaunsil o Siti Interim Otiriti.

Olgeta nait no gat lait i save stap long blok 1 i go inap long blok 6 olgeta long dispela 2 mail stelmen. Sapos birua i kamap o man i bagarapim meri wanem kain bagarap i kamap.

Na ken komplek. Sutim olgeta toktok i go long komiti na bai ol i karim pen.

Yupela komiti memba i mas lukaut. Long wanem sapos birua i kamap long tudak ples we i no gat lait em bai yupela komiti memba yet i kisim taim. Tingim dispela na ripot long siti otiriti orait.

Nerosh Kirin,
2 mail setelman, Lae.

Memba Bilong Daulo Stap We?

Dia Edita — Mi gat bikpela komplek i sut i go long provinsal memba bilong Daulo. Em i no save raun na lukluk long mipela ol pipel i stap long Kenangi na Mangiro eria. Na mipela i no lukim wanpela helpim i kam long mipela long developim wan wan viles.

Mipela i gat bikpela sori. Mipela i save olsem Nesenel Palamen i stap antap na i save salim mani i kam long han bilong ol provinsal gavman. Na ol i save katim dispela mani na tilim i go long wan wan distrik long developim ol ples.

Tasol mipela i no lukim dispela kain han i kam long gavman. Na em i namba wan komplek mi laik autim nau.

Long namba tu poin, mipela ol pipel i painim hat long kisim dinau-man i long mekim sampela wok na developim

"SORI OL WANPLES, MI GAT BIKPELA WOK LONG TAUN.."



ol ples. Tasol ol beng opisa i save tokim mipela long lukim memba bilong mipela na dispela memba i ken tok orait na mipela kisim mani.

Dispela rot i hat tumas. Na bikpela hangre i save kamap long mipela. Haus i save

paia. Graun i save brukim na kisim ol gaden kopi o gaden kaikai i go. Ol dispela asua i save givim hatwok tru long mipela.

Long namba tri tok, em mi laik salim bikpela tenkyu long olgeta memba bilong Isten Hailans Provinsal

Gavman. Yupela i no ken lukluk klostu long yupela tasol. Tingim ol man i stap longwe na lukluk long baksait tu.

Peter Ilapowe,
Poidomo Viles,
Watabung, E.H.P.

Meri I Gat Spea Pat Tu?

Dia Edita — Mi laik sapotim pas bilong brata hia, Franklin H. Tsitia. Em i bin komplek long pe bilong ol meri. Mi tu mi no gat laik long ol papamama bilong ol meri i salim ol long ol man long bikpela mani. Mi no gat bilip long dispela ol kain marit.

Tasol wari bilong mi i narakain long Franklin Tsitua. Em i go olsem. Sapos wanpela hap long skin bilong meri i bagarap, man bilong em inap kisim spea pat long

ol papamama o long ol wan bisnis bilong dispela meri tu o nogat?

Sapos nogat, yupela i mas tingting pastaim na salim ol yangpela pikinini meri bilong yupela long husat man i gat laik long maritim ol.

Yupela i mas tingim tu husat i save kamapim ol dispela pikinini meri long bel bilong mama. Mama tasol inap long kamapim wanpela pikinini? Nogat tru. Yupela husat papamama bilong meri i save salim ol pikinini bilong

yupela, ating yupela i no gat save tru. Het bilong yupela i pulap pinis long ol rabis tingting bilong mani tasol.

Olsem wanem? Yupela i save wokim mani tu. Sapos nogat. "Sem On Yu Stret."

Yu husat i laik komplek long dispela, rait tasol i go long Wantok Niuspepa bai mi gat sampela moa long givim i go long yu.

Xavier Bade,
Arawa, NSP.

Moa laki pilai

Dia Edita — Mi gat wanpela wari em mi laik autim long Wantok Niuspepa. Na mi laik bai planti man na meri i mas sapotim mi.

Planti pipel i save laik pilai laki na winim mani. Bipo, long 1970 na 71 i gat "Find The Ball" kompetisen. Dispela em wanpela gutpela kompetisen tru. Dispela gem em wan-kain olsem Laki Tiket tasol.

Olgeta de, taim pilai ya i stap yet long Pos

Koria mipela sampela lus lain i save laikim tru na pinisim Pos Koria niuspepa hariap. Mipela trai hat tru long makim bal na 10 toea stem bilong mipela i save lus nating.

Dispela em wanpela gutpela pilai tru long wanem husat manmeri i makim stret i ken winim mani. Hap bilong dispela mani i save go insait long helpim spot.

Nau mi lukim Wantok Niuspepa i mekim wankain gutpela pasin taim em statim Laki Bingo Resis. Dispela i gutpela tru long wanem Wantok Niuspepa i helpim mipela sampela lus manmeri husat i no save ritim Inglis. Mipela save laikim Wantok Niuspepa tru olsem na dispela niuspepa i save pinis hariap tru hia long Not Solomons Provins.

Tenkyu tru, Wantok Niuspepa, long dispela Bingo Resis. Tasol mipela laikim wanpela

moa laki pilai olsem Find The Ball. Bai mipela gat planti pilai long traime.

Yupela ken sasim 10 toea long wan wan pilai na 10 toea long stem o postal oda. Yu ken winim mani tu long Wantok Niuspepa.

Em tasol. Mi poket bruk na lus man hia long Not Solomons Provins. Olsem na mi askim long laki tiket.

Yal Tom Tomakua,
Arawa.



Dia Edita — Mi laik bekim pas bilong Kenny K. Kombuli bilong Kimbe, Wes Nu Briten Provins. Pas bilong em i kamap long Wantok Niuspepa namba 529.

Pas bilong Kenny i tok olsem Kaunsil takis i dia tumas. Na em i komplek long ol singel man i no ken baim kaunsil takis. Em i laik bai ol marit tasol i baim takis i go long kaunsil. Kenny i askim tu olsem ol kaunsil long Maprik i save putim takis mani we?

Mi bai bekim ol askim bilong yu i go olsem:

Olgeta lokal gavman kaunsil insait long Maprik Distrik i save kisim takis mani inap long K10 i kam daun long K5 long wan wan yia. Dispela i no bikpela mani, em i liklik mani tasol. Mi mas tok klia olsem takis long K5 i go inap K10 long wan yia em i no bikpela mani. Em i samting nating long ol pipel.

Mi laik askim yu Kenny, yu save baim kaunsil takis tu o yu raun nating tasol long Kimbe. Ating yu wanpela man wok long stap nating long Kimbe na yu wok long hangamap tasol long ol wantok i stap long Kimbe.

Namba tu bekim, lo bilong Lokal gavman kaunsil seksen 55 i tok olsem olgeta manmeri i winim 18 krismas na antap i mas sindaun long eria bilong wanpela kaunsil winim 6 mun orait bai em i ken baim takis i go long dispela kaunsil. Yu no inap abrus na i no baim takis. Sapos yu no baim takis na yu abrusim taim em kaunsil i makim em bai yu mas gat kot. Sapos yu no baim kot bai yu kalabus.

Lo i no tok bai ol marit manmeri tasol i mas baim takis. Sapos krismas bilong yu i winim 18, yu tu i mas baim takis. Nau yet kaunsil i save kisim takis i kam long ol man tasol. Ol meri i no save baim takis.

Mi askim yu gen, sapos yu wokman bilong gavman o kampani ol bai i no inap tok olsem dispela man i singel olsem na em i no mas baim takis. Ol i no inap tok, singel man i no inap baim inkam takis bilong gavman.

Pasin bilong gavman em olsem, sapos wanpela man i singel em i mas baim moa takis i go long gavman. Na marit man, i gat pikinini, bai baim liklik inkam takis tasol.

Kenny na askim yu long skelim gut ol dispela toktok. Kaunsil i gat pawa aninit long lokal gavman Ekt long wokim rul bilong en. Wanpela kain lo bilong en em long kolektim takis mani i kam long pipel bilong en long olgeta yia.

Long namba tri askim bilong yu, yu bin laik save long wanem hap kaunsil i save putim mani bilong en.

Kaunsil i save mekim baset bilong en long olgeta yia. Em i save makim hamas mani em i laik pulim i kam insait na hamas mani bai i go aut long ol projek bilong en.

Mani kaunsil i pulim long takis i save go long wokim rot, lukautim rot, mekim nupela et pos, klinik, pam wara, teng wara, wokim haus bilong ol tisa, klasrum long ol komyuniti skul, wokim bris long rot, na planti arapela wok moa.

Mi laik askim yu Kenny, yu bin tingting long wanem kaunsil tru

insait long Maprik long taim yu sutim dispela tok bilong yu? Mipela i gat 4-pela Lokal Gavman Kaunsil insait long Maprik distrik.

Nem bilong ol em, Dreikikir Lokal gavman kaunsil, Yangoru Lokal gavman Kaunsil, Wosera lokal gavman kaunsil, na Greta Maprik Lokal gavman kaunsil. Bikos i gat 4-pela lokal gavman kaunsil insait long Maprik mipela i no save long wanem o husat kaunsil tru yu toktok long en. Em bai gutpela sapos yu bin tok stret long wanem kaunsil yu gat kros long en. Tasol pastaim, mi laik bai yu bekim ol dispela askim bilong mi:-

Sapos yu stap long Maprik, yu save go raun long wan wan eria bilong ol kaunsil insait long Maprik distrik tu o nogat?

Sapos yu bin raun long eria bilong yu em bai yu inap lukim wanem wok kaunsil i save wokim olgeta yia wantaim mani ol pipel bilong yumi i save baim takis long en.

Kenny, yu save baim takis tu o nogat? Yu save baim takis i go long anem ol kaunsil insait long Maprik? Nogut yu wanpela man husat i wok long toktok nating.

Wok bilong putim kolta stat long Wewak na kam long Maprik em i no wok bilong kaunsil. Takis mani bilong pipel i no inap long baim olgeta wok bilong putim kolta long Sepik haiwe. Dispela wok bilong Sepik haiwe em i bilong bikpela gavman, i no kaunsil.

Kaunsil i no pulim mani nating long ol yangpela manki. Kaunsil i bihainim stret dispela lo i tok sapos wanpela man i winim 18 krismas dispela man i

mas baim kaunsil takis. Mi askim yu Kenny, sapos yu no baim takis long wanem yu tok yu singel man, na larim tasol ol marit long baim takis, wanpela taim kaunsil bai mekim wanpela projek long ples bilong yu.

Sapos kaunsil i wokim wanpela Et Pos long hap bilong yu na taim yu singel man isik, yu bai go long wanem hap tru long kisim marasin?

Sapos yu kisim marasin em i min olsem yu kisim helpim o sevis nating long dispela Et Pos em yu no bin wok hat long en.

Nau yu tok olsem yu stap long Kimbe. Dispela i min olsem yu save raun nating na yu no save baim kaunsil takis. Na taim yu kam long ples yu bai benefit nating long sevis na hatwok bilong ol narapela pipel long ples. Bikpela sem bai go long yu yet. Yu no helpim na kirapim sampela developmen long ples bilong yu.

Sapos husat narapela man moa i sapotim toktok bilong yu, mi bai save kwik olsem dispela man i wankain olsem yu. Yutupela i raun nating tasol long arapela provins na komplek long kaunsil takis long asples.

Long pinisim olgeta tok bilong mi, mi laikim askim yu Kenny K. Kombuli. Taim yu pinisim olgeta pipia rais long Kimbe yu ken kam na raun i go long eria bilong Maprik lokal gavman kaunsil na bai mipela soim yu wanem wok ol kaunsil i save wokim olgeta yia.

Karis Kombiamen,
Presiden, Maprik
Kaunsil.

Tok Save i go long ol man i save salim pas long Wantok. Sapos yu no putim nem tru bilong yu long pas mipela i no inap prinim leta bilong yu.

Soim ves long Baibel

Dia Edita — Milaik sapotim brata Karry Kuma long pas bilong em i bin kamap long Wantok Nius long Sarere 25 Ogas. Het tok bilong em, Jisas bai kam long Amerika.

No gat wanpela sapta o ves insait long baibel i tok olsem Jisa bai kam long Amerika. I gat wanpela God tasol na i gat wanpela buk baibel bilong em tu.

Ol ves insait long baibel i ken tokim yu olsem Jisas bai kam long klaut bilong heven na olgeta ai bai lukim Jisas. Jisas bai kam long Isait, long ples we san i save kam antap long en.

God i no save senisim pasin o toktok bilong em. Graun na heven na olgeta samting bai pinis. Tasol toktok na pasin bilong God bai stap olsem yet.

Olgeta wantok bilong mi, God i no inap tru senisim tok bilong em na salim Jisas i kam long Amerika. God bai salim Jisas long rot em baibel i autim. Olgeta man na meri husat i gai pinis na yumi olgeta manmeri i stap laip yet bai lukim Jisas.

Sapos i gat sampela ves bilong baibel i tok olsem Jisas bai kam long Amerika, plis raitim gut gen long wanpela pas na salim i go long Wantok Niuspepa bai yumi olgeta i ken sekim gen baibel bilong yumi. Yumi olgeta mas kisim

ansa i kam long baibel bilong yumi stret.

Planti yia i go pinis planti kain misin i kam long Papua Niugini na strongim bilip bilong yumi olsem God i mekim graun, heven, na olgeta samting long graun na heven manmeri tu wantaim.

God i salim Jisas i kam dai long rapusim olgeta sin bilong yumi. Na taim Jisas i kirap em i go bek long heven long redim ples bilong ol man husat i harim tok bilong God insait long baibel. Baibel i tok olsem Jisas bai kam wanpela taim moa long graun. Long taim em i kam namba tu taim, em bai givim wanpela kain laip em bai no inap pinis.

Plis ol manmeri bilong Papua Niugini, harim gut dispela tok. Jisas i bin tok olsem, "Taim i laik kam namba tu taim, bai yu lukim giaman propet i kisim nem bilong mi na go pas na mekim bilip bilong yupela i kol. "Dispela em wanpela sain olsem yumi mas bihaintim tok bilong baibel stret.

Yupela ol manmeri bilong Mosbi na bilong lotu Mormon; mi ting olsem dispela em i namba wan taim bilong yupela long harim gut nius olsem na yupela kirap nogut.

Nogat wanpela strongpela graun ami

long dispela graun inap stapim olgeta sain em Jisas i bin promisim yumi long lukim pastaim long em i kam. Wanem samting Jisas i tok bai kamap, bai i kamap stret. Yupela mas sanap strong long bilip bilong yupela.

Yupela ol man insait long gavman i mas askim gut ol kain kain misin i kam long Papua Niugini. Mi save olsem taim wanpela misin i laik go insait long wanpela kantri em i mas askim laik bilong gavman pastaim. Gavman i mas askim ol dispela nupela misin long kain bilip ol i gat. Sapos bilong bilong ol i no stret long tok bilong baibel oraif rausim ol i go bek.

God i givim yupela gutpela save, gutpela wok na posisen bilong mekim wok bilog em na mekim dispela kantri i stap stret long ai bilong God. Mi pilim olsem gavman i mas stadim baibel tu long wanem gavman i sot long bilip bilong en.

Sapos gavman i save na i was long ol dispela sain em baibel i toktok long en no gat narapela man bilong ausait bai kam na pulim ol lida bilong yumi.

Namugi Detaro.

"Amele I Paradais"

Dia Edita — Mi gat bikpela wok tru na mi no save laik long raitim pas i go long olgeta Niuspepa, tasol long dispela taim sampela tok giaman na tok paul i kamap long brata ya Mista Ulim Damu long Not Cost Rod, Madang long leta bilong em i kamap long Wantok Nius 30 June, '83 olsem na i laik bekim.

Yes, brata, nau mi bai bekim pas bilong yu long maus bilong mi na maus bilong olgeta Amele man na meri husat i stap long dispela graun.

Amele pilim em komiti bilong mi i makim maus bilong ol i no sot long wanpela samting. Komiti bilong mi i bin askim Provinsal Gavman na Madang Town Kaunsil long stapim maket long hap-taim tasol long ol dispela as:

1. Mipela i bin laik demonstrait i go long Provinsal Gavman long tokim em long rausim ol Sepik Squatter.

2. Mipela laikim maket i stap bai birua namel long mipela na ol Sepik i

no ken kamap ken.

3. Givim taim long pipel bilong mipela wantaim ol Sepik i gat bel kros i stap bai pinis.

4. Long Gavman bai cksen hariap long petisen bilong mipela.

Mista Ulim Damu, komiti bilong mi i bin was gut long ol samting i wok long kamap long taim bilong maket i pas. Taun yet i bin sot long rais, na nau yet i sot tu, ol wokman na meri bilong Pablik Sevis i no gat gutpela kaikai olsem fres kaikai na kumu na taro, yam, aibika, kaukau na banana, taro kongkong, trai kokonas na ol abus bilong bus.

Ol wokman bilong kampani, skul sumatin long Haiskul, Tek Skul, Hautikal Skul, husat i save wok hat long developim provins bilong yumi. i no bin kisim gutpela kaikai insait long 3-pela wik olsem na wok bilong ol i wok long pundaun.

Mipela i tingim tu ol ples klostu long taun we ol i save kisim kaikai long maket.

Ol bisnis long taun olsem ol tret stua, klap, beng, i wok long go daun long bisnis bilong ol. Na Provinsal Gavman na Taun Kaunsili save kisim takis long dispela ol bisnis. Long dispela as, brata, mipela i askim Kaunsil long opim maket hariap tru. Planti Memba bilong Komiti i no bin laik long maket i op hariap. Tasol mi wanpela i bin strong na maket i op hariap. brata Ulim Damu, yu save kam raun long hap bilong Amele tu o nogat?

Amele em "I PARADISE." Mipela i pulap long kaikai. Kaikai i save go daun long maket, ol manmeri bilong baim ino save pinisim na ol mama i save kisim kaikai i kam bek. Brata, ating yu save salim kokonas, kakao na buai tasol.

Sampela ol Amele i karim kaikai i go salim long Sek. Yulup na Mugil, ating mi no save, kaikai bilong mipela bai ol i hariap long baim na bilong yu bai i stap yet.

Tasol brata, Bisnis em

Bisnis, yu sekim C.M.B. Opis na bai yu save hamas ton ekspot kakao Amele i save salim long wanpela, wanpela yia. Yu no ken hangamap long ol plantin bilong ol misin na kampani, em yu kisim na tok em yu wan! Amele i givim bel long olgeta manmeri long ol wokman long taun (18,000 populesen) na ol skul sumatin tu.

Brata Damu, mi laikim vukam long Opis bilong mi bai mitupela patrol na yu ken lukim ol bisnis bilong ol Amele.

Em tasol na lukim yu!

Benny M. Ulul, Secretary to Committee

Tingting na toktok

Dia Edita — Mi wanpela boi bilong Boana na mi stap long Lae. Mi bin lukim wanpela pasin long PMV na tingting bilong mi i no stret long dispela pasin.

Wanpela meri i bin krosim pikinini bilong em insait long bas na tok, "Yu no olsem longlong man bilong Boana." Ating dispela meri i ting em wanpela savemeri bilong Japan i kam marit long Kamukumung.

Yu no ken tok bilas long ol Boana olsem ol leba bilong yu. Na no ken tok bilas long pipel bilong Nawae na tok yu gat save. Sapos yu go wok long opis orait yu ken mekim dispela tok. Tasol yu dispela meri nating, nogat save bilong yu, na yu mekim dispela tok olsem na yu mas em.

Ating save bilong yu i winim save bilong olgeta arapela manmeri bilong Morobe. Yu kain meri olseri i mas kamap bos bai rapela olgeta i kam wok leba long yu.

Angat G. Gie, Moms Viles, Boana.

Ol bikpela skul manki

Dia Edita — As tingting bilong mi em "Gret 6 drop aut."

Long ples bilong mi em mi wok long sori tru long ol gret 6 husat i bin pundaun long gret bilong ol. Long ol

dispela sumatin i gat ol manki husat i liklik tru tasol ol i bin pinisim gret 6. Long sampela manki ol i mas go insait long gret wan taim ol inap olsem long Inglis yu save tok, "They are

suppose to attend grade one when they are in this age group."

Askim bilong mi olsem, Olsem wanem Government bilong Papua Niugini inap long alowim ol manki husat i bin pinisim gret 6 bilong ol long ol yia i bin pinis?

Long dispela ting bilong mi em bai i luk gut sapos ol tripela sumatin long wokim gret 6 bai wok olsem ol yia i go pinis we ol draipela manki i bin statim skul bilong ol.

Em bai gutpela sapos ol tisa i skulim ol driapela sumatin na sapos ol dispela sumatin i pundaun em bai ol inap long wok.

Kiso Ramei,

Salim ol pas i kam long

WANTOK
BOX 1982
BOROKO

Wanem Kain Mormon Sios?

Dia Edita — Mi bin ritim long Wantok Niuspepa bilong Julai namba 7 de, 1984 olsem wanpela nupela sios i kamap pinis long kantri bilong yumi. Dispela sios em i Mormon Sios na mi laik askim yupela sapos em i trupela o giaman sios.

Mi no bin amamas tru long lukim stori bilong ol long niuspepa na olsem tasol mi bekim pas long dispela stori.

Em ya ol kain kain toktok bilong dispela Mormon Sios. Ol i tok, ol arapela sios i kisim toktok bilong ol long ol man, na ol Mormon i

kisim toktok bilong ol long God stret. Ol i tok tu olsem dispela lotu olsem ol memba bilong em i ken maritim moa long wanpela meri.

Ol i tok, i gat 4-pela kain heven. Sapos man i laik go long heven tru, ol i tok olsem, em i mas marit. Ol i no bilip olsem olgeta samting long buk Baibel em i kam stret long God. Wanpela bikpela toktok bilong ol em olsem nupela Jerusalem bai kamap long Amerika na Krai yet bai kamap long bosim graun na graun bai kamap nupela na stap olsem Paradais.

Mi bin ritim ol dispela poin em ol i bin raitim na mi no amamas. Mi no save wanem kain tingting ol sampela husat i ritim dispela stori bilong Mormons Sios bai tok.

Mi laik bekim tok olsem. Mipela i save bihainim toktok bilong Buk Baibel bikos dispela ol toktok i kam long God stret. Bilong yupela ol Mormon, em toktok Joseph Smith i bin raitim na yupela i ritim na bihainim tasol.

Long namba 4 poin bilong ol, ol i tok, sapos man i laik go long heven, em i mas marit.

Mipela i no gat dispela kain tok long Buk Baibel. Baibel bilong mipela i tok, heven em i ples bilong husat man, kain kain manmeri, maski marit o single o pikinini na lapun tu, sapos bilip bilong ol i strong, ol bai go long heven.

Dispela toktok bilong Krai bai kam long Amerika na nupela Jerusalem bai kamap long hap na Amerika bai kamap Paradais em i giaman toktok tru. Baibel i tokim mipela olsem long taim Jisas Krai i laik kam bek long graun, em bai kam

namel long klaut, na olgeta manmeri bai i lukim em long ai bilong ol yet.


Mi no laik harim moa toktok bilong dispela nupela Mormon Sios. Ol bos bilong lotu Mormon is mas kisim dispela lotu i go bek gen long Amerika na no ken kirpaim long PNG na paulim tingting bilong ol kristen pipel long hia.

I gutpela long yupela husat i memba bilong Mormon Sios i lusim na bihainim trupela sios na stretim laip bilong yu.


Robson Poma, SDA Misin, Yangoru, Is Sepik

DYNAMAC BRUSHLESS TYPE 6

Steamships 1824-1984




TU-10E
10KVA/8KW
THREE PHASE



SU-5
5KVA/8KW
THREE PHASE

TU-20
20KVA/16KW
THREE PHASE



- DIESEL GENERETA
- LIKLIK MENTENENS
- NOGAT BIRUA LONG TAIM BILONG WOK
- INO INAP LARIM YU DAUN

AVAILABLE FROM
Steamships-MACHINERY

Sole Distributors in Papua New Guinea

Sandaun Yut Wik

Namba wan wik bilong dispela mun, em Sandaun Provinsal Yut Wik. Na 8-pela Yut grup bilong Vanimo distrik i kamap pinis long Vanimo taun las wiken yet. Dispela ol grup i gat moa long 300 memba.

Dispela yut grup i kam long hap bilong Laitre, Ningrum, Wutung, Mushu, yako, Waramo, Vanimo viles (Lido) na Bewani eria. Yut wik festival bai go inap long Sarere, 6 Oktoba, dispela wiken.

Provinsal memba bilong Sandaun gavman, i lukautim wok bilong ol yut meri na rikriesen, Mista Jacob Talis i bin opim dispela yut wik long Mande.

Bikpela samting long program bilong ol i gat spots tasol. Bai i gat resis, soka, basketbal, volibal, netal na sofbal bilong ol meri. Bai i gat resis long katim diwai selim na skrapim kokonas, rile na resis insait long kopra bek. Na bai i gat ol kain kain resis namel long ol Yut grup.

Ol yangpela meri tu bai resis long kamap Mis Sandaun Yut wik kwin. Dispela eria i bilong ol meri tasol. Na ol eksekutiv i no tingting long ol man olsem 'Provinsal Yut ov the Year.' Dispela ol yangpela meri bai bilong long tumbuna bilas.

Dispela ol yangpela manmeri i no skul ol i stap nating long ples. Na sampela bilong ol i pinisim gret 6 tasol long komyuniti skul.

Prais bilong givim long ol grup i win bai i kam long Provinsal Gavman. Na Provinsal Yut Kaunsil i givim bikpela helpim tru long mani na kaikai. Tasol long transpot em ol yut yet i painim rot bilong ol long kamap long Vanimo taun.

Olgeta dispela yangpela manmeri i slip long ol klasrum long Vanimo komyuniti skul.

Nesanel Yut wik i bin kamap long mun Ogas. we planti provinsal yut kaunsil na grup i binmekim kain kain so i kamap long eria bilong ol. Tasol Sandaun, o Vanimo distrik i laik ranim narapela yut wik bilong ol yet. Na bihain bai i kamap olsem West Sepik Provinsal Yut Wik.

Pikinini bai orait o nogat?

DIA LAIPLAIN,

Gel pren bilong mi emi hap susa bilong mi tu. Sampela pipel i save tok olsem sapos mitupela dispela meri i marit, pikinini bilong mitupela bai kamap kranksi, o sapos nogat, pikinini bilong mipela bai i hap longlong.

Mi laik askim; lo i tok orait long mipela i marit o nogat?

KLOSTU OLSEM WANEM?

DIA PREN,

Sapos dispela meri em i smol susa bilong yu, em i min olsem papa o mama bilong em i brata o susa bilong papa o mama bilong yu.

Lo bilong Papua Niugini i oraitim wanpela man long maritim smol susa o kasen bilong em.

Tasol sapos yu tingting gut yu bai inap lukim ol tumbuna bilong yumi i gat lo bilong ol yet long marit. Olsem na mipela i ting yu yet i mas toktok wantaim sampela bikmanmeri insait long famili bilong yu o viles bilong yu sapos yu laik save gut long dispela.

Yu bin wari tu nogut pikinini bilong yu i no kamap gut. Em i tru olsem sapos tupela wanblut i kamapim pikinini, pikinini bilong tupela i gat bikpela sans long painim sampela hevi.

Yumi man i gat sampela rong insait long bodi bilong yumi. Sampela taim dispela rong i save bihainim blut. Olsem na planti man o meri insait long wanpela famili inap gat

LAIP



LAIN

dispela rong, tasol yu no inap lukim dispela rong long wanem em i hait i stap.

Long taim tupela manmeri insait long sem famili i bung long kamapim wanpela pikinini, tupela i bungim dispela rong blut antap long pikinini bilong tupela. Olsem na bai yu lukim olsem asua i kamap ples klia antap long pikinini bilong tupela.

Tasol i no dispela tasol i save kamapim sik pikinini. I gat sampela moa as bilong wanem pikinini i no kamap gut. Maska sapos wanpela man na meri bilong em i bilong longwe famili i gat sans yet long pikinini bilong tupela long painim sampela kain asua long bodi bilong ol. Tasol yumi save lukim olsem planti taim olgeta pikinini i kamap stret long bel bilong mama na stap laip.

Sapos tupela wanblut i marit tupela i skruim sans bilong kamapim sik pikinini i go bikpela. Tasol dispela i no min olsem olgeta pikinini bilong tupela bai no inap kamap stret. Sampela taim olgeta pikinini bilong tupela bai kamap gut tasol.

Tasol, namba wan samting tru, painimaut tingting bilong famili bilong yutupela pastaim. Ol bai ting olsem wanem sapos ol i lukim tupela pikinini insait long famili i marit. Insait long Papua Niugini planti marit save kamap gut long wanem famili bilong man na meri i sapotim marit ya.

LAIPLAIN.



• Ol mama bilong Yunaitet Sios Wimens Felosip i amamas long taim ol i bung wantaim long Koki, Mosbi.

Kalabus Ranawe

Tupela yangpela man husat i bin stap long haus kalabus bilong ol yangpela man insait long Bomana haus kalabus i bin ranawe long Sarere 29 Septemba.

Ol man ya em Gabriel Sevese Oroa husat i gat 15 krismas na em i bilong Kukipi viles long hap bilong

Galp Provins. Longpela bilong em inap long 164 sentimita na em i gat ol mak ol i katim long pes ilong em.

Narapela yangpela man em Gabriel Moreka Mora husat i gat 16 krismas na em i bilong ples Uritai long Galp Provins. Longpela bilong em 164 sentimita.

Nupela Opis Long Kavieng

Gabriel Achun Botol Kampani i opim nupela brens opis bilong en insait long Kavieng long las wik Sarere. Na moa long 200 manmeri i go bung long Kavieng Golp Klap na amamas wantaim ol bosman bilong dispela kampani.

Menesing Dai-rekta bilong Gabriel Achun Botol Kampani long Rabaul, Mista Peter Chue i go stap insait long dispela bung. Na em amamas long kampani i kirapim bisnis insait long Nu Ailan Provins.

Gabriel Achun Botol Kampani i gat het opis na faktori


bilong en long Rabaul, Is Nu Briten Provins. Na em i mekim kamap na salim Coca-cola, Sofdeing, Fanta, Schweppes, Orchy na Vita i go long planti hap bilong PNG. Em i gat narapela het opis long Mosbi husat i go pas long salim ol Vita dring.

Dispela kampani i gat narapela opis long Lae. Ol i gat nupela brens nau long Kavieng na i gat plen long kirapim narapela bres gen long Kimbe, Wes Nu Briten Provins. Long taim opis i kirap pinis, ol i stat long salim ol sofdring insait long Nu Ailan Provins long 1 Julai 1984.

Relax... go fishing!


WITH CLARK EVINRUDE

first in outboards



Evinrude 35
Top performance

K 1363



Evinrude 25
Fisherman's dream

K 945



Evinrude 15
just right

K 793

Evinrude® 35

Evinrude® 25

Evinrude® 15

P.O. BOX 1259, BOROKO 21-2039 — 21-3590

MARINE
TEL: 21-2039

**I STAP
NAU LONG
PNG**

EICHER

24-133HP RANGE

OL NAMBAN WAN TRAKTA ANINIT LONG SAN

(Pe bilong en i daunbilol)

Ol i wokim long Wes Jemani long wok long kantri i gat planti maunten olsem PNG. Ol Eicher trakta i gat nem long wok long ol kain ples olsem.

**ASKIM OL FAMA LONG IS AFRIKA,
MIDEL IS, INDIA NA ESIA!**



THE EICHER 3 MODEL RANGE

<p>MODEL 242 Liklik tasol inap tru</p>	<p>MODEL 35 SUPER GOLD Smat tru long wok</p>	<p>MODEL 45 HIND Strongpela pawa bilong en</p>	<p>Yu ken baim tu... Eicher masin, ensin na ol pam long 25HP aircooled na watercooled.</p>		
<ul style="list-style-type: none"> • 24 BHP • 8 Forward and 2 Reverse Speeds • Power Take-Off • Differential Lock • Hydraulic Lift • Headlight, Tail Light and Plough Light. • Independent Brakes for Short turns. 	<ul style="list-style-type: none"> • 35 BHP • 8 Forward and 2 Reverse Speeds • Automatic depth and draft control hydraulics • Power Take-Off • Disc Brakes 	<ul style="list-style-type: none"> • 45 BHP • 10 Forward and 2 Reverse Speeds • Draft-O-Matic hydraulics with double acting external circuit • Hydraulic Brakes • Power Take-Off 	<p>Mouldboard Ploughs</p>	<p>Disc Ploughs</p>	<p>Offset Disc Harrows</p>
			<p>Tillers & Ridgers</p>		

EICHER

**NAMBAN WAN ANINIT LONG SAN... PE BILONG EN I
DAUNBILO**

Long kisim moa tok save long ol EICHER trakta na masin, lukim namban wan nesenel kampani i gat bisnis long ol traka.



International Marketing Corp. Pty Ltd.

P.O. Box 914, Port Moresby Phone: 213956 or 213966

EICHER DEALERSHIPS
Sappos yu gat taik long kamap wampela dita bilong
Eicher Trakta, salim dispela hap pepa i go
NEM
ADRES
TELEPON



• Yuniwesiti em i no ples bilong buk pensil tasol. Nogat ya. Ol yangpela ya bilong Morobe i soim olsem ol i pas strong yet long pasim tumbuna.

Primia Seeto Go Long Japan

Primia bilong Nu Ailan Provins, Mista Robert Seeto bai tokaut long nupela wok senis bilong tuna indastri insait long provins bilong em bihain long taim em i kam bek long Japan.

Primia Seeto wantaim provinsal deleget bilong em i go long Japan na bai kam bek long PNG long Sarere, 29 Septemba.

Ol pipel insait long provinsal deleget, em Primia Seeto na Seketeri bilong em, Mista John Thomas, Provinsal Minista

bilong Woks na Saplai, Mista Samson Gila na provinsal memba bilong Not Lavongai, Mista Essau Passingan. Oli bin lusim PNG na go long Japan long Trinde, 19 Septemba, 1984.

Nu Ailan Provinsal Gavman wantaim Okinawa Pis Kampani husat i wok long kisim tuna insait long solwara bilong Nu Ailan Provins i bung wantaim na stretim rot bilong dispela lukluk raun bilong Primia Seeto na provinsal deleget bilong em. Na Meneasing Dairekta

bilong PNG Tuna Dvelopmen Kopresen long Mosbi, Mista Naritsugu Kurima i go wantaim dispela grup bilong Primia Seeto. Mista Kurima i save wok aninit long Dipatmen bilong Praimeri Indastri long Mosbi.

Okinawa Pis Kampani i laikim Primia Seeto wantaim lain bilong em i luksave long bisnis bilong Okinawa Pis Kampani long Japan. Na bihain bai ol i ken stretim toktok long kirapim tuna o pis indastri i kamap bikipela moa long Nu Ailan Provins. Dis-

pela Okinawa Pis Kamani bilong Japan go het long kisim tuna insait long solwara bilong Nu Ailan Provins bihain long taim ol i sainim tok orait wantaim Nesenel Gavman, na Nu Ailan Provinsal Gavman.

I gat as bilong larim Mista Essau Passingan i stap insait long dispela grup bilong Primia Seeto. Bikos eria bilong em long Not Lavongai i karamapim hap solwara we Okinawa Pis Kampani i save kisim tuna long en. Na em i gutpela tingting long larim Mista Passingan i luksave long bikipela bisnis insait long Japan na tok klia long ol pipel bilong em.

Tokaut long rot bilong yusim mani

Memba bilong Kerema insait long nesenel palamen, Mista Aron Noaio i bin askim nesenel gavman long traim na tokaut bai ol i yusim K31 milion i kam long Asian Dvelopmen Beng olsem wanem.

Mista Noaio i tok em i bilip olsem bikipela hap mani bai i go long wokim gut ol rot insait long Papua Niugini

na em i bin putim wanpela askim i go long nesenel gavman olsem bai ol i givim hamas mani long helpim ol wok bilong mekim rot insait long Papua Niugini.

Wanpela wok stadi, Wol Beng i bin mekim i bin tokaut olsem hap long dispela mani i mas go long mekim wok long namba tu hap bilong Hir-

itano Haiwe, long Sentral Provins.

Mista Noaio i bin tok olsem Minista bilong Transpot, Mista Mathew Bendum i save mekim tok tasol long palamen long salim ol buldosa long helpim ol wok bilong mekim ol rot, tasol wanem taim bai ol i salim dispela buldosa i kam long Galp Provins.

Bihain long taim Primia Seeto na deleget bilong em i kamap long Nu Ailan, bai Namba Tu Primia, Demas Kavuvu i kisim narapela provinsal grup na go lukluk raun long Kwinslan, Australia. Na grup bilong Mista Kavuvu bai lusim PNG na go daun long Kwinslan long Mande, 29 Oktoba, 1984. Na ol bai kam bek long Sande, 4 Novemba, 1984.

God tasol i save long wanem kain samting Salvesen Ami i mekim kamap insait long Papua Niugini.



GIVIM HELPIM MANI WANTAIM BEL AMAMAS



Salim helpim mani bilong yu i go long:

THE RED SHIELD APPEAL
P.O. Box 505
Mosbi.

YU KEN PUTIM DISPELA HELPIM MANI BILONG RED SHIELD APPEAL LONG WANPELA BENG I STAP KLOSTU LONG YU INSAIT LONG PAPUA NIUGINI.

Red Shield Appeal 1984

Straik i pinis

tasol tok i no stret yet



•Mr SAPIAS

Siaman bilong NBC, Mista Austin Sapias i sutim tok i go long ol NBC teknisen, husat i bin straik las wik long bagarapim ol transmita waiya, bilong karim ol toktok bilong Kalang na Karai sevis long Waigani transmita stesin na NBC 5 mail studio.

Ol toktok i kam long tupela redio Kalang na Karai sevis i no bin kamap gut long las wiken. Na Mista Sapias i salim tok sori bilong em long ol pipel i komplens sevis i no kamap gut long ol redio bilong ol.

Mista Sapias i tok, NBC i sot long wokman long teknikal divisen bilong em. Olsem na bai sevis i kam long tupela redio stesin sampela bai i no inap long kamap gut inap taim olgeta samting i stret na ol teknisen i go bek gen long wok.

Tasol ol 20 Provisal Teknisen, 20 junia teknisen na 40 senia teknikal opisa long Mosbi em ol i bin mekim tupela de stap wok las wik i go bek gen wok bihain long belo long Mande, 1, Oktoba.

Ol i mekim stap wok long wanem NBC i bin apim pe bilong baim tupela hostel, Wonga na olpela studio hostel long 5 mail i go antap long K60 long wanpela fotnait, stat long Janueri 1, dispela yia.

Bipo ol i save baim K30 tasol. Na dispela nupela mak em K30 moa. Ol teknisen i stap long dispela tupela hostel i painim yet olsem maski ol i baim K60 long olgeta fotnait, kaikai na samting bilong yusim i stap long hostel i no gutpela.

Ol i tok K60 em i dia tumas na no gat gutpela samting i stap long hostel. Olsem na ol i mekim dispela straik. Ol Provisal teknisen i sapotim ol wanwok bilong ol long Mosbi tu long wanem long taim ol i kam long kos long

Mosbi, ol i save i stap long dispela tupela hostel tu.

Wanpela teknisen i bin tokim Wantok long Trinde, 3, Oktoba, olsem NBC Menesman i no stretim ol hevi bilong ol yet.

Em i tok, "Mipela i go bek wok aste. (Mande, 1 Oktoba) bikos mi lusim pe tasol. Mi lusim K19 long wanpela de mipela i no kamap long wok."

Ol i salim pinis pas i go long siaman. Na ol i tok sapos Mista Sapias i no stretim wari bilong ol bipo long 4 klok long Fonde, 4, Oktoba bai olgeta hetkota, senia na provinsal teknikal opisa na teknisen bai i mekim bikipela stap wok tru.

Taim ol i mekim dispela stapwok i bin gat tupela kontrak opisa bilong ovasis i bin lukautim ol wok. Wanpela long 5 mail studio na narapela long Waigani transmita stesin.

Tasol, Mista Sapias i tok, NBC Menesman i no luksave long dispela straik bilong ol teknisen. Long wanem i no lo aninit long NBC olsem wokman i no amamas long pasin bilong wok long NBC i mekim stap wok o arapela industrial eksen. Em i tok dispela em i "Illegal."

Em i tok, NBC i save lusim K147,744 long lukautim dispela tupela hostel olgeta yia. Na i gat 38 wokman i slip long dispela tupela hostel. Dispela K30 ol i baim inap olsem K2.14 long wanpela de. Na dispela inap olsem K29.640 long olgeta yia i kam long ol. Em i tok tasol planti samting em NBC i save, lusim moa mani long lukautim tupela hostel.

Siaman Sapias i askim pinis Teknikal Sevisis Dairekta bilong em, Mista Stans Ona long traim stretim dispela bilong ol teknisen. Tasol ol i laikim siaman yet i mas stretim.

Ol teknisen i stretim nau toktok wanpela wanpela independen grup (union) long helpim ol. Na teknisen i tokim Wantok olsem, "mipela i memba bilong PEA." Tasol i gat narapela lain tu i helpim ol teknisen.

Maria i lukim ol pikinini long Yugoslavia

Stori hia Theresa M. Karminski i bin raitim long Immaculata Masasin.

Pater H. Fischer, MSC, i bin tanim.

Long tripela yia nau samting i kamap long wanpela liklik viles long Saut-Wes hap bilong Yunoslavia long Yurop. Samting hia i save senisim pasin bilong planti tausent pipel, na mekim saveman bilong ol Komunis i wari.

Ples hia ol i kolim Medjutorje. Long tok ples bilong ol em i min "Namel long ol Maunten." Samting olsem 300 pipel i stap long ples hia. Ol i fama, na klostu olgeta i Katolik.

Stat long 24 June, 1981, klostu olgeta nait, Maria i save kam long siksipela yangpela pipel long ples hia. Ol i foapela meri na tupela manki, na ol gat 10 inap long 17 krismas long taim Maria i kam long ol namba wan taim.

Inap nau, Katolik Sios i no tokaut yet sapos i tru o nogat, mama bilong Jisas i kam tru long ol. Tasol ol pris na ol pipel long ples i bilip tok ya i tru tumas, na ol i bihainim bilip bilong ol.

Long taim Maria i stat long kam long ol, ol i bin stat long telimautim ol stori long ol sikman i kamap orait wantu, olsem ol long Lourdes na long Fatima. Taim ol dispela stori i bin go nabaut, planti manmeri i bin kam long lukluk na pre. Planti pipel long ol hap nabaut i bin stat long kam long maunten, na planti tausent pipel i tok ol i bin lukim planti samting i narakain.

Long August, 1981, ol pipel long hap i bin tok san i stat long tantanim na kam klostu long ol, taim graun i go tudak liklik. Long narapela taim, wanpla bikipela paia i kirap long maunten. Taim ol plis i kamap, ol i no bin painim samting i kuk. Olgeta manmeri i bin stap, i bin lukim hap tok "MIR" (bel isi long tok ples bilong ol), antap long skai. Ol hap tok kamap long lait.

Long sampela arapela taim strongpela lait i save raunim wanpela bikipela kruse ol i bin wokim long ston antap long maunten. Ol i bin lukim dispela kruse i tantanim long planti kala lait long klostu olgeta de. Pater na ol sista long Medjutorje i tok dispela tok i tru.

Ol komunis plis i wari tru long planti manmeri, yangpela inap long ol lapun, i soim bilip bilong ol nau. Ol samting hia i bin kamap long wanpela kantri we ol i bin pasim planti handet haus lotu na wokim museum long ol

bilong soim ol skulmanki ol samting bilonglotu i samting bilong taim bilong tudak.

Ol komunis i ting olsem sapos intres long lotu i kirap sen, em i ken bagarapim kantri bilong ol. Na pasin bilong ranim ol Katolik i bin kamap planti taim bipo long Yugoslavia, na em inap kamap gen.

Provinsal gavman long hap i wok long paitim dispela interes long lotu; ol i givim program long muvi na danis na kain kain pilai bilong pulim ol yangpela manmeri klia long lotu. Tasol ol yangpela manmeri bilong Medjutorje i save go yet long lotu na long ol Baibel stadi.

Bihain Gavman i bin traim pasim ol pilgrim long go long hap. Ol i bin pinisim ol bas long ran long hap, na pasim ol rot bai ol ka i no inap ran long hap. Tasol planti tausent manmeri i save wokabaut namel long ol maunten bilong kamap long hap. Gavman i bin raunim maunten olgeta long waia, na husat man i go insait long dispela banis i mas go long kalabus.

Ol plis i bin tambuim pater long wokim lotu long ol hap nabaut; em i mas mekim insait long haus lotu tasol. Na bihain long dispela taim, olgeta pre miting i bin stap insait long haus lotu, na Maria tu i kam lukim ol pikinini insait long haus lotu. Nau ol pipel i lap na tok: "Mipela i gat gutpela gavman tru, ol i save tokim ol pipel ol i mas go long haus lotu."

Bihain long tambuim dispela maunten Maria i bin kam long en, gavman i putim moa hevi long ol. Ol i bin kalabusim pater bilong ol, Pater Jozo Zovko, OFM, na ol i tokim em: em i mas tok em yet bin kirapim ol dispela stori long Maria i kam long ol pikinini, na pulim ol pikinini yet long autim ol stori, o bai ol i kalabusim em long taim tru.

Pater Zovko i bekim tok bai em i pinisim ol visit bilong Maria sapos em inap, tasol em i no inap bosim heven. Long 23 Oktoba, 1981, ol i pasim sentens long Pater Zovko, long kalabus em long tri ha nap yia long wanem em i "mekim tok nogut i wok long bagarapim sekuriti na gutpela sindaun bilong kantri."

Ol plis i pasim ol pikinini Maria i bin lukim, na traim pretim ol long strongpela tok. Ol i traim mekim ol i tok ol stori long Maria i kam i bin tok giaman. Tasol ol pikinini i no pret liklik. Ol i bin tok Maria i stap wantaim ol na ol

plis i ken mekim wanem samting ol i laik.

Ol plis i bin kalabusim moa long 50 arapela pipel long dispela tok long Maria i kam long Medjutorje. Long taim mi bin stap, wanpela long ol pris i mas go long plis, na ol i askim askim em long planti samting long siks aua olgeta. Ol sista tu i mas mekim olsem planti taim. Tasol ol i go het long wok bilong ol long bel isi. Ol i save tasol long lotu, na ol i no toktok liklik long politik.

Olgeta hatwok bilong gavman long pinisim dispela kirap bilong bilip i no bin win liklik. Maria i save kam yet long ol, na planti tausent i bin tanim bel. Long 1983, samting olsem 3000,000 (3 handet tausent) pipel i bin go long Medjutorje long 25 June, em de Maria i bin askim ol long makim olsem nupela festo de bilong em olsem "Kwin bilong Sekan."

Ol tok save bilong Maria, em i save givim long ol pikinini bilong tokim ol pipel i save tingting long Kraist. Em i askim ol pipel long tanim bel na kam bek long God. Em i promisim bel isi long olgeta man i bilip. Em i askim olgeta long mekim planti sakrifais na pre. Em i askim yumi long ritim Gtinius na bihainim em long laip bilong yumi. Em i askim yumi, olsem em i bin mekim long Fatima, long pre long Korona na kisim ol Skaramen.

Ol i save tok: Maria i bin telimautim tenpela tok hait long ol pikinini, na ol i mas telimautim ol long Pop long wanpela de bihain.

Ol pikinini i mekim klia tok long taim Maria i save tok long sekan, em i tok moa long wanpela bel isi long insait long yumi, i save kamap long yumi taim yumi i tanim bel. Em i tokim ol tu long graun i klostu pinis long wanpela bikipela bagarap tru. Pekato i bin mekim kamap dispela bagarap, na em i mas kam nau, tasol sapos planti pipel i pre, ol inap long mekim em i moa sotpela. Na olsem, Maria i askim yumi long pre long olgeta de, konpes long olgeta mun, na mekim planti sakrifais na hapim kaikai.

Wanpela taim, Maria i bin tok: "Ol Kristen manmeri i bin lusim dispela save; ol inap long abrusim woa na ol bagarap bilong graun yet sapos ol i pre na hapim kaikai." Tasol, ol pikinini i tok sampela bagarap i mas kam bikos planti manmeri i bin pasim bel bilong ol long God.

Namba tu Pater long Sen James Peris long Medjutorje, Pater Tomislav Vlasic, i bin tokim mi: ol pipel long hap i no moa save wokim bikipela pekato. Planti long ol i save kaikai bret na wara tasol long olgeta Fraide. Ol misa long olgeta de i save pulap, na planti pipel i save kam pre long ekaristia long olgeta de. Long olgeta Sande, 35 o 40 prist i mas harim ol konpesio namel long Misa bilong moning-taim na bilong nait.

Ol yut i bin tokim mi ol i laik go long lotu, na bihain long taim Maria i stat long kam lukim ol pikinini, ol i bin bihainim gutpela pasin tasol. I tru tumas laip bilong lotu i kamap strong moa long dispela hap. I tru yumi mas wetim tok bilong Sios bilong tokaut long Maria i bin kam tru long dispela hap bilong Yugoslavia, tasol mi tok tru tumas, i gat bikipela samting tru i kamap long hap.

Pater John Bertolucci, bosman bilong "St. Francis Association for Catholic Evangelisation" i bin kam long hap bilong wokim wanpela televisen piksa long ol samting i bin kamap long Medjutorje. Bihain long namba wan visit bilong em, em i bin tok: "Mi bin pilim samting i bin mekim mi i nildaun na daunim mi yet olgeta. Mi no bin inap long yusim kamera bilong mi long potaim ol samting; mi bin pilim olsem samting bilong heven tru i kamap long mi."

Wanpela taim ol i bin askim em hamas taim moa em inap long kam lukim ol, na Maria i lap liklik na bekim: "Olsem wanem, yupela i les pinis long lukim mi?"

Ol pikinini i tok: Maria i putim viel i waitpela tru, na dres bilong em i grey liklik na i karamapim lek bilong em olgeta. Ol i ken lukim liklik hap bilong gras bilong em long han kais bilong pes bilong em. Pes bilong em i braun liklik olsem ol yangpela meri bilong dispela hap. Wanpela ring long sta i lait tru i save raunim het bilong em. Klostu oltaim em i ave lap liklik, na em i litimapim han bilong em i go antap long heven. Tasol sampela taim em i save lukluk olsem em i wari, na em i nildaun na pre: "Pikinini bilong mi, mi laikim tumas, lusim ol planti pekato ol i save mekim long graun."

Bihain long lukim Maria, ol pikinini i save go bek wantaim ol bikipela lain pipel, na Pater i statim Misa. Long laip bilong mi

olgeta, mi no bin lukim strongpela pre olsem mi bin lukim long dispela nait long Medjutorje. Yangpela na lapun, man na meri, ol Pater, Sista, na ol pipel olgeta i pre strong tru na adorim na tenkim God. Ol i lotu tru long Ekristia long daunpasin tru.

Taim bilong lotu olgeta i go inap long tripela aua, na olgeta pipel i bin pre strong tru long dispela taim olgeta, wantaim bikipela laik na respek. Bihain long Misa na prea long oraitim ol sikman, ol manmeri i bin go ausait na i kol liklik. Tasol gavman i bin tambuim ol ka long ran long dispela hap, na olsem planti i mas wokabaut longwe tru long go bek long ples bilong ol. Sampela arapela i stap tasol long haus lotu.

Olgeta nait dispela haus lotu i pas tru olsem 1,600 pipel long wanpela viles inap long 300 pipel stat. Long Sarere na Sande, ples i pas tru long ol manmeri i kam long pre long korona, Misa, warwai, na bung long planti lotu.

Ol bos bilong gavman i belhat tru bikos ol i no inap pasim dispela strongpela lotu. Ol i bin pasim lotu planti taim bipo, na ating ol i ken mekim gen bihain. Tasol ol lain bruder na sista wantaim ol pipel i bin tok ol i redi long dai long bilip long Kraist sapos ol i mas. Dispela kain bikipela laik i save kirapim hap long dispela tok profet Maria i bin autim long Fatima: "Bihain bai Kor Imakulata bilong mi bai i win, ol Tussia bai i tanim bel, na wanpela taim bilong sekan na bel isi i kamap long graun."

Maria i bin promis bipo bai taim sekan i kam, na ating wanpela de bihain Sios i ken tok em i mekim gen long Medjutorje. Ating God i laik wokim long sios olgeta kain strongpela bilip mi bin lukim long dispela liklik viles namel long ol maunten.

Ol manmeri long Menjutorje i wanlain long Katolik bilip bilong yumi. Yumi fri long bihainim lotu, tasol long ol misa bilong olgeta de liklik lain bilipman tasol i save kam bilong kisim Santu Komunio.

Maria i bin kamap long Medjutorje long namba wan taim long festode bilong jon bilong Baptais, man God i bin salim bilong witness long Jisas na redim rot bilong Mesias. Tok save bilong Medjutorje i olsem tok bilong Jon i singautim yumi long tanim bel na makim rot bilong Lord.



• Ol lam meri Fiji tu i mekim singsing bilong ol long taim ol i opim dispela senta bilong ol pipel bilong Tari.



• Praim Minista Michael Somare i bin katim dispela rop bilong opim nupela Huli Kristen Komyuniti Senta.

Nupela Huli Kristen Komyuniti Senta

Wok bung wantaim na helpim dispela em tingting bilong gavman bilong yumi nau em i namba wan tingting ol kristen

manmeri mas bihainim long kamapim gutpela sindaun insait long famili, wantok long viles na ol pipel long kantri.

Praim Minista

Michael Somare i mekim ol dispela toktok long ol pipel bilong Huli long Wabia erialong Saten Hailans Provins long taim em i opim nupela Huli Kristen Komyuniti Senta las wik.

Mista Somare i givim tok tenkyu tu i go long Yunaitet Sios long Wabia. Yunaitet Sios i bin helpim ol pipel bilong Huli long kirapim dispela kristen komyuniti senta. Na tu ol i go pas long planti wok

developmen long Waiba.

Mista Somare i tok, olsem ol arapela gutpela kristen komyuniti senta long kantri, em i bilip bilong Huli kristen komyuniti senta i ran gut. Em i bilip bai ol pipel bilong Huli i bung na wok wantaim long kirapim dispela nem bilong nupela senta bilong ol.

“Mi save bai yupela i yusim dispela senta, i no long lotu tasol o mekim wok bilong sios tasol. Mi bilip bai yupela i bung long dispela senta long helpim wok bilong yut, trening ol yangpela manmeri na pikinini long sindaun gut. Yupela bai yusim dispela senta long lainim ol meri long kain kain nupela save.”

Tingting bilong ol Huli pipel long kirapim dispela senta em long bungim ol manmeri wantaim na holim ol bikpela kibung na kain kain wok bilong kirapim

sios na viles.

Wok bilong sios na yut developmen i save stat long ol viles. Olsem na Mista Somare i tokim ol pipel bilong Huli olsem ol kain santa olsem i gutpela tru long viles developmen. Dispela kain senta bai bungim ol bikman bilong viles husat i save long pasin tumbuna tasol, na ol yangpela manki husat i go pinis long skul. Tupela lain wantaim bai soim rot long ol arapela lain manmeri long narapela kain viles laip. Laip bilong sindaun long tupela kain pasin wantaim. Nupela na olpela pasin.

“Olgeta man husat i helpim long kamapim dispela senta i mekim gutpela wok tru” Mista Somare i tokim ol.

“Dispela pasin em i namba-wan tru. Klostu olgeta pipel long Huli eria i wok wantaim Yunaitet Sios, Lokal pipel na rijonal opis bilong yupela tu.”

Ol pipel yet i bin putim K2,500, rijonal opis long Tari i givim K5 tausen, provinsal memba Mista Tiabe i givim K500, na nesenel memba, Marabe Makiba i givim K1 tausen, Fiji Wi-mens Felosip i bin givim tu K500 na mi yet i laik givim sampela mani.

Mista Somare i givim K1,500 long ol pipel bilong Huli na em itok tenkyu long Tari Lokal Gavman Kaunsil long givim transpot long ol Huli pipel long muvim ol kago bilong wokim dispela senta.

Em i tokim ol pipel long wok hat nau olsem ol i gat gutpela Kristen Senta na kirapim gutpela kristen laip long Huli. Em i tokim ol long no ken brukim banis bilong dispela senta na no ken rait nabaut long banis tu.

“Yupela i laikim dispela senta na olsem yupela i wok hat long kirapim. Olsem na yupela mas lukautim gut.” Mista Somare i tokim ol.

Sande lotu

Frank Mihallic

28 SANDE BILONG YIA
14 Oktoba 1984

Planti taim Jisas i laik wokim wanpela tok piksa bilong heven, em i save tok olsem, “Kingdom bilong heven i olsem wanpela bikpela kaikai o wanpela maritkaikai.” Olsem em i mekim tude long stori bilong Matyu 22, 1-10).

Taim bilong bikpela kaikai, o pati, o sindaun nabaut long tebol em oltaim i min taim bilong amamas na taim bilong hepi. Olsem na planti taim Jisas i yusim dispela piksa bilong givim aidia bilong amamas long heven. ...

Long Gutnius yet planti taim Jisas i yusim taim bilong kaikai bilong amamas wantaim ol gutpela. Yu ting long maritkaikai bilong Kena, na kaikai long Gutfonde nait, na kaikai wantaim tupela poroman long Emeas, na kaikai long haus bilong Lasarus, na kaikai wantaim Sakias na wantaim ol Farise.

Long stori bilong kaikai long Gutnius bilong Tude, papa bilong bikpela haus na famili i singautim planti pipel i kam amamas wantaim em. Olsem tasol na Jisas i singautim yumi long amamas wantaim em, hia long graun na bihain tu long heven. Las buk bilong Baibel, em Revelesen i gat bikpela stori bilong bikpela pestokaikai bilong Lem bilong God. Buk ya i pinis long amamas Na Buk Baibel i stat tu long stori bilong amamas bilong paradais.

Pasin belgut na amamas na hepi em i pas gut tru long ol Kristen. Ol Kristen ol i Aleluya pipel. Ol i tingting long win bilong Ista na bilong win long las de. ... Ol Kristen i ting long God i gutpela papa na gutpren bilong ol.... Em i sambai klostu oltaim oltaim. Em i laikim ol. Na taim ol i pundaun, em i litimapim ol bek.

Inap planti handet yia moa Sios em i ples bilong amamas. Olgeta Sande em i de bilong amamas. Tasol bipo i gat samting olsem 100 moa pestode bilong amamas na malolo.

Yu lukim ol lotu bilong sios ol i pulap long singsing na song. Ating yu no save, ol pasin bilong paitim gita na kain kain musik, na singim olkain musik, na raitim musik long pepa em i kamap long Sios yet. Sios em i mama bilong musik.

Long Olpela Testamen yet ol Juda i singim

planti sam. Sam em i wanpela kain beten yu mas singim na planti ol sam i singsing amamas long God. Yes, lotu em i samting bilong hepi na amamas. Na relisen tu em i samting bilong belgut. Na God i laikim olsem.

Long Sios yumi gat planti santu ol i gat biknem long pasin helpim bilong ol. Yu ting pastaim long Sen Fransis ... em i man bilong wokim singsing long olkain samting olsem san na mun. Maski em i aipas pinis, em i singsing amamas na tenkyu long God long lait na long ol pasin na gras na sayor na tri ... Sen Tomas More long Englan em i tok pani na tok pilai long man i bin kam long katim nek bilong em. Em i no kros; em i no pret. Em i hepi long go long heven nau tasol.

Ol santu tru ol i manmeri bilong hepi. Long ol bikpela haus lotu long Yurop ol i gat kala kala glas piksa long ol windo na taim san i lait, ol i gat naispela kala tru. Wanpela liklik boi oltaim i lukim ol santu i sanap long ol dispela piksa long windo. Na wanpela taim ol i askim em, santu em i wanem samting, em iting long windo na i tok, “Santu em i wanpela man o meri i gat lait insait long em.”

Na dispela tok i tru. Santu i hepi na dispela i mekim pes bilong emi lait. I olsem lait i stap insait long wanpela lam na i sut i go long olgeta hap, na i givim lait long ol samting nabaut. Em i gutpela piksa bilong wanpela kristen ... Kristen em i no man bilong pes drai. Nogat. Em i man i save smail na i gat pasin long tenkyu long God long olgeta samting. Namba wan beten bilong oltaim em i: Tenkyu, God. Tenkyu, Jisas.

Pasin hepi em i save pulim manmeri i kam long God. Em i olsem hani i pulim ol anis na korakum. Tasol, sore, sampela lain Kristen ol i wariman. Ol i wari tumas long sin na bekim nogut na mekim save bilong God. Tasol dispela kain pasin i no save kamap long Nupela Testamen. Mobeta yumi lukim God i gutpela papa na papa bilong marimari. Jisas yet i promis, “Gutpela taim bilong mi bai mi givim long yupela.” Ol Kristen i alleluya pipel, ol i hosanna pipel, ol i Sande pipel. Kaman, yumi soim - bai ol manmeri i ken joinim yumi.



• Planti manmeri i bin kamap long taim ol i bin opim dispela komyunit senta.

Kusai bilong Surataura

Long bipo, bipo tru i gat tupela gutpela poroman i stap long wanpela ples. Nem bilong namba wan man, em i Surataura. Na em bilong poroman bilong em, em Kuwoko.

Long olgeta de, dispela tupela man i save poroman gut tru na raun long olgeta hap insait long hap bilong ol. Bihain long taim ol i helpim papamama bilong ol pinis, ol i save bun-gim na raun na me-kim ol kain kain wok na bihainim pasin bilong ol yangpela man.

I gat daripela singsing i kamap long ples bilong dispela tupela poroman, long wanpela de. Na lain pipel bilong narapela ples i kam bung na resis long singsing. Long dispela taim bipo, em ol yangpela meri i save mangalim ol yangpela man husat i save mekim smatpela pairap long kundu.

Surataura i bilasim bodi bilong em na em i luk smat moa. Na kundu bilong em i kraik bikipela moa. Long wanem em i gat gutpela skin bilong kapul long maus bilong kundu bilong em.

Tarangu Kuwoko i gat kundu. Tasol em i no gat skin bilong kapul long taitim long maus bilong kundu. Olsem na em i go askim Surataura.

Kuwoko i go askim Surataura olsem, "Poroman, Dispela skin bilong kapul ya.. yu kisim we?"

Surataura i bekim tok olsem, "Hei, pren, Yu mas go tokim mama bilong yu na yu tekewe skin bilong skru bilong em. Yu mas kisim hap skin bilong skru na taitim long maus bilong kundu bilong yu. Em nau kundu bilong yu bai kraik bikipela moa."

Kuwoko i go askim lapun mama bilong em strong na i katim skin long skru bilong mama bilong em. Orait, Kuwoko i kisim skin bilong skru na i go pinis. Tasol planti blut long lek bilong lapun mama bilong em i kapsait i go i go na em indai.

Surataura na Kuwoko i stap insait long singsing long nait i go inap long narapela moning gen. Na olgeta manmeri i go nabaut long ples bilong ol. Kuwoko i go kamap long haus bilong em na i kirap



nogut tru.

Kuwoko i lukim lapun mama bilong em indai na slip i stap. Na em i go bek na krosim Surataura olsem, "Poroman, yu giamanim mi na mi kilim lapun mama bilong mi."

Tasol Kuwoko i no kros na pait wantaim poroman bilong em. Na em i sori tasol long lapun mama bilong em. Orait. Em i karim mama bilong em na i go planim em. Na em i gat strongpela tingting long bekim dinau antap long poroman bilong em.

Kuwoko i tingim gutpela rot pinis long bagarapim poroman bilong em. Na em i wokim bikipela banis na wokim gaden insait long em. Surataura i helpim Kuwoko long sanapim banis na digim graun long planim kaikai. Na pasin bilong poroman namel long tupela yet i no pinis.

Kuwoko i save bilas gut tru na i go wok long nupela gaden bilong em. Na em i bilas na singsing. Em i kalap klap na pairapim ol gras nabaut insait long gaden. Em i wokim paia na kukim ol gras insait long gaden.

Tasol em i no pret long bikipela lait na smok bilong papa. Em i kalap i go pas na lait bilong paia wantaim smok i karamapim em. Insait long graun i gat ol draipela hul, em Kuwoko yet i bin digim. Na em i save kalap i go daun long hul na karamapim em yet, long taim lait bilong paia i kam karamapim em.

Long taim lait bilong paia i kamap klostu long em, em i save kalap kwiktaim i go daun long wanpela hul na hait. Em i save kalap i go antap na singsing long taim paia i lait na abrusim dispela hul em i stap long em. Em i mekim dispela pasin planti i go na i paulim Sura-

taura stret.

Surataura i kirap na askim Kuwoko olsem, "Olsem wanem na paia i no kukim bodi bilong yu?"

Na Kuwoko i tok, "Yu mas singsing na kalap kalap i go kam, long taim paia i kamap klostu. Lait bilong paia i no inap kukim yu, sapos yu singsing na sanap namel stret long hap paia i laik long en."

Surataura i bilip long toktok bilong poroman na em i bihainim toktok bilong em tasol. Tasol paia i kukim hanlek, het, nus, pes, yau na olgeta hap bodi bilong em. Paia i kukim olgeta bilas bilong em tu na olgeta skin bilong em i kuk na i pen nogut tru.

Em i slip na i wok long tantanim bodi bilong em i go i kam. Tasol pen i no pinis. Em i kirap na ran go long bikipela wara. Em i pundaun i go insait long wara na slip. Em i slip insait long wara i go i go na olgeta skin bilong em i kol.

Tarangu Surataura i lukim olgeta bodi bilong em i kuk na blak olgeta, long taim em i lusim wara na go ausait. Em i klia nau olsem poroman bilong em i giamanim em tru.

Surataura i go tokim Kuwoko olsem, "Mi ting yu tok tru na mi bihainim olgeta toktok bilong yu. Tasol paia i kukim mi na mi bagarap olgeta nau. Olsem na mi no inap poroman

wantaim yu moa. Bikos yu kamap gutpela man yet na mi tarangu i bagarapim skin bilong mi pinis. Na ol meri i no inap laikim mi."

Pasin bilong poroman i bruk long dispela taim. Surataura i ranawe i gat stap long narapela hap. Na Kuwoko i sem long bagarapim poroman bilong em na em i ran i go stap long narapela hap. Na tupela i senisim bodi na kamap liklik grasop.

I gat blakpela liklik grasop i save kalap kalap nabaut long ol ston. Na i gat kain kain liklik pipia i pas long skin bilong em. Dispela grasop em i Surataura tasol.

Na i gat narapela kain grasop i save digim hul i go insait long graun. Olgeta taim bai yu ken lukim dispela grasop i karim ol kaikai bilong em na kisim i go insait long hul bilong em. Na dispela grasop em i Kuwoko.

Ol wanlain grasop bilong Kuwoko i klin na ig at gutpela kala long skin bilong ol. Tasol wan lain grasop bilong Surataura i skin blak olgeta. Long wanem sit bilong paia i bin kukim skin bilong lida bilong ol bipo, bipo tru. Sapos yu lukim dispela lain grasop, bai yu ting em sit bilong paia. Tasol nogat. Em Surataura yet.

**Mathias Uba,
Blok Namba 1489,
Galai Wan (1),
Kimbe, W.N.B.P.**

Namaliu autim hevi

MINISTA bilong Foren Afeas, Mista Rabbie Namaliu i tok aut strong tru dispela wik long ai bilong planti lida bilong wol long ol hevi em Indonesia i givim long PNG. Mista Namaliu i bin toktok long namba 39 kibung bilong Yunaitet Nesen long Nu Yok, Amerika.

Mista Namaliu i tokim dispela bikipela kibung olsem PNG gavman i no save amamas long planti bekim, em Indonesia i save givim, bihain long Indonesia i kamapim hevi o bagarap long sait bilong PNG long boda mak.

Foren Afeas Minista i tok, "Gavman bilong mi no bin bilipim tru ol gisim em Indonesia i save givim. Dispela samting i kamap planti taim."

Em i tok, "Wanpela taim tasol Indonesia i tokaut long pablik olsem ol i no min long brukim boda mak. Dispela em taim ol opisa bilong tupela kantri i bung wantaim na pasim hap rot i brukim oda i go insait long sait bilong PNG. Dispela taim tasol Indonesia i tokaut ol brukim boda mak. Na oli tok sori long PNG."

Mista Namaliu i tok PNG gavman i save givim ona na rispek long boda mak bilong ol kantri i stap klostu long en. Na i no laik kamapim hevi wantaim narapela kantri.

Tasol dispela kain sindaun i no kamap long Indonesia. Na em i tokim Jeneral Assembl, Indonesia i no soim kain rispek na ona long long PNG olsem tupela kantri i tok orait long mekim long 1979.

Mista Namaliu i tokim ol planti lida bilong wol long kibung olsem.

1. Long 21, Jun, 1984, 53 soldia bilong Indonesia brukim mak i go na kamapim bagarap long PNG.
2. Long 1983, bikipela rot Indonesia i wokim i brukim boda mak long 4-pela hap i sut i go kamap long sait bilong PNG.
3. Tu-pela jet balus bilong pait

bilong ami bilong Indonesia i bin kamap long PNG sait long 27. Mas, 1984. Tupela balus ya i no kisim tok orait na i brukim mak.

Mista Namaliu i tokim kibung olsem i gat moa hevi i kamap long boda. Dispela hevi em moa long 10,000 Wes Irian pipel husat i sitisen bilong Indonesia nau i stap long planti kem i stap long boda eria long PNG sait.

Dispela i givim moa hevi long gavman bilong PNG long lukautim ol dispela pipel. Long wanem wok mani bilong gavman na sindaun bilong ol asples pipel long ol dispela boda eria i no gutpela tumas. Na dispela i kamapim moa trabel long gavman na asples pipel tru.

Mista Namaliu i tok i gat planti bagarap i kamap long ol dispela Wes Irian pipel we sik i kisim ol na i no gat inap i kaikai na sampela manmeri na pikinini indai pinis.


Mista Namaliu i tok olsem PNG i tokim ol refuji pinis long tingting long wanem as tru ol i lusim asples bilong ol na ranawe i kam na PNG i no stap insait long ol trabel em ol refuji i bin pret na ranawe long en.

Em i tokaut olsem PNG i amamas long Yunaitet Nesen i givim bikipela helpim long lukautim ol dispela refuji. Na em i askim Yunaitet Nesen Jeneral Assembl long helpim PNG gen long larim na kisim wanem ol West Irian pipel em gavman i painim olsem ol i no ken i go bek.

Tasol ol arapela pipel i no gat wari o rong na i no pret long ami bilong Indonesia bai i go bek. Long wanem ol pipel bilong PNG i no inap long lukautim ol longpela taim tumas.

Tasol Mista Namaliu i tok long painim aut tru wanem manmeri i no mas i go bek, i wok bilong ol "autoriti" o lain bilong PNG gavman.

Na bai gavman i askim Yunaitet Nesen Hai Komis bilong Refuji na ol memba bilong Yunaitet Nesen Jeneral Assembl long helpim PNG painim nupela ples kantri bilong sindaun bilong ol long bihain taim.



**PREN BILONG YU
INAP OLTAIM**




PHANTOM

COMIC

Dispela stori bilong Pantom em i narakain long olgeta arapela bipo. Dispela stori em bilong Julie. Pikinini meri bilong namba 16 Pantom i bin kamap wanpela Pantom tu. Tasol ritim sotri na painimaut olsem wanem na ol pantom man tasol i save mekim wok. Ol Pantom meri tu i gat wankain strong. Julie em i namba wan Pantom meri long holim wok bilong pait egensim ol man nogut.

Ritim Pantom Komik namba 797. Em Pantom komik tru.

NO 797



MANILA, FILIPIN SEPTEMBER 21 — Ol raiot plis na soldia bilong Presiden F. Marcos i blokim rot bilong samting olsem 30 tausen manmeri husat i mekim protes wokabaut mas long soim belhevi bilong ol egensim Marcos. Raithan Liklik brata bilong Benigno Aquino, opposisen Lida bilong Filipin husat i dai piuis, Agapito Aquino i pulim 30 tausen manmeri long mekim protes mas.



NU YOK, AMERIKA SEPTEMBER 22 — Maricica Puica bilong Rumania i winim wan mail resis na winim tropi. Em i sanap long namel. Wendy Sly (raithan) bilong Ingran i kamap seken na Christina Boxer i kamap namba tri ples.





APOSTERBIK, NETERLAN SEPTEMBER 23 — Prins Charles i toktok wantaim wanpela man husat i bin pait long namba tu bikpela pait bipo. Dispela ol lain man i bin pait long bikpela pait i kamap long Arnhem. Arnhem em i bikpela siti long Neterlan. Prins Charles i toktok long man ya bihain long lotu bilong tingting longol paitman long Sande.

LONDON INGRAN, SEPTEMBER 21 — Studen bilong stadi long mekim kain kain haus na samting olsem, Mike Tenkin i painim wanpela nupela rot pinis bilong ol manmeri husat i laik wokabaut antap long solwara.



LAUDERDALE, AMERIKA SEPTEMBER 21 — Martina Navratilova i katim bikpela kek tru. Em i bin winim namba 56 tenis gem bilong em na holim taitel bilong meri tenis inap 56 taim nau.



CO-AIR
Co-ordinated Air Services Pty. Ltd.

EM BALUS KAMPANI BILONG YU

EM I SEVIM

**MORobe PROVINS
LONG LAE — 42 3707
NA
LONG WAU — 44 62411**

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.